

# Ymgynghoriad ar y Cyd-ddatganiad drafft ar Bysgodfeydd

Dyddiad: Ionawr 2022



© Hawlfraint y Goron 2022

Mae'r wybodaeth hon wedi'i thrwyddedu o dan Drwydded Llywodraeth Agored f3.0. I weld y drwydded, ewch i [www.nationalarchives.gov.uk/doc/open-government-licence/](http://www.nationalarchives.gov.uk/doc/open-government-licence/)

Mae'r cyhoeddiad hwn ar gael yn <https://consult.defra.gov.uk/sustainability-devolution-and-legislation-team/jfs/>

Os oes gennych gwestiynau am y cyhoeddiad hwn, cysylltwch â:

[jfs@defra.gov.uk](mailto:jfs@defra.gov.uk)

[www.gov.uk/defra](http://www.gov.uk/defra)

## Cynnwys

Cyflwyniad .....	6
Pwrpas yr Ymgynghoriad.....	7
Crynodeb o'r JFS hwn .....	7
Sut cafodd y JFS hwn ei ddatblygu.....	8
Sut i Ymateb i'r Ymgynghoriad hwn .....	9
Hyd yr Ymgynghoriad .....	9
Ymatebion .....	9
Cyfrinachedd a Diogelu Data .....	9
Cwestiynau'r Ymgynghoriad .....	11
Ymholiadau.....	11
ATODIAD 1: Ymgynghoriad ar y Cyd-ddatganiad drafft ar Bysgodfeydd.....	12
Crynodeb Gweithredol .....	16
Pam Cyd-ddatganiad ar Bysgodfeydd? .....	16
Pam mae pysgota'n bwysig? .....	16
Beth yw polisiau'r JFS? .....	16
Pam Cynlluniau Rheoli Pysgodfeydd?.....	17
Sut y byddwn yn mesur cynnydd?.....	17
Cyflwyniad .....	18
Pwysigrwydd pysgota i holl wledydd y DU.....	19
Fframwaith Rheoli a Chefnogi Pysgodfeydd y DU (y Fframwaith Pysgodfeydd) .....	19
Cytundebau Cenedlaethol a Rhyngwladol.....	20
Protocol Gogledd Iwerddon .....	20
Cwmpas y JFS .....	21
Effaith y JFS a'r FMPs.....	21
Atebolrwydd.....	22
1. Ein huchelgais cytûn .....	22
2. Amcanion ar gyfer Pysgodfeydd .....	23

2.1	Dehongli'r Amcanion .....	23
2.2	Cymhwyso'r Amcanion .....	27
2.3	Amcanion fesul Maes Polisi .....	28
3	Rhoi'r JFS ar waith .....	30
3.1	Egwyddorion .....	30
3.2	Gwyddoniaeth a Thystiolaeth .....	31
3.3	Y Broses Adrodd ac Adolygu .....	34
3.4	Monitro .....	34
3.5	Gweithio mewn Partneriaeth .....	35
3.6	Gwneud Penderfyniadau Cyfranogol .....	35
4	Rheoli Pysgodfeydd yn Gynaliadwy .....	36
4.1	Sut ydym yn Rheoli Pysgodfeydd .....	36
4.2	Cyflawni'r Amcanion Pysgodfeydd trwy'n Polisiâu .....	39
4.2.1	Cyfleoedd Pysgota .....	39
4.2.2	Stociau heb Gwota .....	44
4.2.3	Cysylltiadau Rhyngwladol Ehangach .....	44
4.2.4	Capasiti Pysgota .....	45
4.2.5	Hawl i bysgota yn nyfroedd y DU .....	45
4.2.6	Pysgota Anghyfreithlon, heb ei Gofnodi a heb ei Reoleiddio .....	45
4.2.7	Lleihau Sgil-ddalfeydd ac Osgoi Dal Rhywogaethau Sensitif .....	46
4.2.8	Dadleoli .....	47
4.2.9	Cynllunio Gofodol Morol .....	47
4.2.10	Ardaloedd Morol Gwarchoddedig (AMG) .....	47
4.2.11	Sbwriel Môr .....	48
4.2.12	Dyfroedd Arfordirol a Dyfroedd Croyw .....	48
4.2.13	Newid Hinsawdd .....	48
4.2.14	Dyframaethu .....	50
4.2.15	Pysgota Hamdden yn y Môr .....	50

4.2.16	Cynhyrchu, Marchnata a Bwyta Bwyd Môr .....	50
5.	Cynlluniau Rheoli Pysgodfeydd .....	53
5.1	Cyflwyniad .....	53
5.2	Beth yw Cynllun Rheoli Pysgodfa? .....	54
5.3	Penderfynu pa stociau i'w cynnwys mewn FMP .....	55
5.4	Perthynas FMPs â'r Amcanion Pysgodfeydd.....	56
5.5	Perthynas rhwng FMPs a'r Cynlluniau Rheoli Presennol .....	57
5.6	Asesu Terfynau Cynaliadwy .....	57
5.7	Monitro ac Adolygu FMPs.....	57
	Atodiad A: Rhestr o'r Cynlluniau Rheoli Pysgodfeydd arfaethedig .....	59
	Atodiad B: Geirfa .....	65
	ATODIAD 2: Ffurflen Ymateb yr Ymgynghoriad ar y JFS .....	71
	ATODIAD 3: Asesiad Effaith Naratif ar gyfer y JFS .....	72

# Cyflwyniad

Mae pysgodfeydd môr yn bwysig iawn i'r Deyrnas Unedig – mae'r sector bwyd môr yn ffynhonnell bwyd, swyddi, diwylliant, balchder ac ymdeimlad cryf o berthyn yn ein cymunedau. Mae'r stociau pysgod y mae'r cymunedau hyn yn dibynnu arnyn nhw yn cefnogi gweithgareddau hamdden hefyd ac yn cyfrannu'n fawr at iechyd ecosystemau'r môr.

A'r DU bellach wedi gadael yr Undeb Ewropeaidd, rydym am ddisgrifio yma ein cynlluniau ar gyfer cefnogi polisiâu pysgodfeydd cynaliadwy fydd wedi'u creu'n unswydd i ateb gofynion ein diwydiant ac amgylchedd ein moroedd. Mae [Deddf Pysgodfeydd 2020](#) (y Ddeddf) yn ymgnawdoli mewn cyfraith ein hymrwymiad i bysgota cynaliadwy, er lles cenedlaethau pysgotwyr y dyfodol, ond hefyd er mwyn i'n hamgylchedd morol allu ffynnu. Mae'n fframwaith sy'n ein rhwymo'n gyfreithiol i ddiogelu ac adfer stociau, cynnal diwydiant bysgota cynaliadwy a gwarchod yr amgylchedd. O fewn y Ddeddf, pennwyd set o amcanion ar gyfer ein pysgodfeydd sy'n gosod cyfeiriad strategol i'r DU ar gyfer rheoli pysgodfeydd yn gynaliadwy. Mae gofyn i awdurdodau polisi pysgodfeydd y DU ddatblygu Cyd-ddatganiad ar Bysgodfeydd (JFS), ac amlinellu ein polisiâu ar gyfer cyflawni, neu gyfrannu at gyflawni, ein hamcanion.

Mae gan Lywodraeth y DU, Llywodraeth Cymru, Llywodraeth Gogledd Iwerddon a Llywodraeth yr Alban hanes o gydweithio'n gynhyrchiol â'i gilydd ar reoli pysgodfeydd i ddiffinio a gwireddu gweledigaeth y DU ar gyfer cefnforoedd a moroedd glân, iach, diogel, cynhyrchiol a bioamrywiol. Rydym wedi paratoi'r JFS hwn gyda'n gilydd at ddiben ymgynghori ac yn croesawu'r cyfle i gyflwyno'n polisiâu a'r camau rydym am eu cymryd i wireddu'n huchelgais gytûn dros bysgodfeyd cynaliadwy.

Mae rheoli pysgodfeydd yn bwnc sydd i raddau helaeth wedi'i ddatganoli yn y DU. Fel rhan o Fframwaith Rheoli a Cefnogi Pysgodfeydd y DU (y Fframwaith Pysgodfeydd), mae'r JFS hwn yn fecanwaith ar gyfer rheoli'r gwahaniaethau o ran polisi gan bennu amcanion cyffredin y gall yr holl weinyddiaethau gyrchu atyn nhw.

Fel Gwlad arfordirol gyfrifol, mae'r JFS yn esbonio'r fframwaith polisiâu ar gyfer gweithio â'n partneriaid rhyngwladol i sicrhau bod adnoddau'r pysgodfeydd rydym yn eu rhannu'n cael eu rheoli'n gynaliadwy dros y tymor hir. Trwy'r JFS hwn, a'r polisiâu a'r mesurau rheoli a ddaw ohono, bydd awdurdodau polisi pysgodfeydd y DU yn gweithio gyda'i gilydd i ddarparu diwydiant bysgota llewyrchus ar gyfer cenedlaethau'r dyfodol tra'n diogelu, adfer a chyfoethogi'r amgylchedd morol y mae'r diwydiant a'r gymdeithas ehangach yn dibynnu arno.

Mae'r ddogfen ymgynghori hon yn gofyn ichi am eich barn am y JFS drafft. Mae'r sylwadau a gawsom yn haf a gwanwyn 2021 gan amrywiaeth eang o bartïon trwy grŵp rhanddeiliaid Cymuned Buddiannau (Col) y DU wedi dylanwadu ar y drafft.

Mae'r JFS drafft wedi'i osod yn unol â pharagraff 3(1) o Ran 1 o Atodlen 1 o'r Ddeddf gerbron Senedd y DU, Senedd Cymru, Senedd yr Alban a Chynulliad Gogledd Iwerddon,

a chaiff pob un o'r rhain gynnig penderfyniadau neu argymhelliion ynghylch y ddogfen ddrafft. Rhaid i awdurdod polisi pysgodfeydd roi datganiad wedyn gerbron y ddeddfwrfa berthnasol yn esbonio'i ymateb.

**Y dyddiad cau ar gyfer ymateb i'r ddogfen ymgynghori hon yw 5 Ebrill 2022.**

## Pwrpas yr Ymgynghoriad

Mae'r ymgynghoriad hwn yn gofyn am eich barn am y Cyd-ddatganiad drafft hwn yn ATODIAD 1 y ddogfen hon. Caiff ei gynnal yn unol â pharagraff 2 o Ran 1 o Atodlen 1 o'r Ddeddf. Rydym yn cydnabod bod trafod â rhanddeiliaid yn hollbwysig i sicrhau bod y JFS yn ateb ei ddiben ac rydym yn awyddus i glywed gan unrhyw un sydd â diddordeb ym mholisiau'r JFS, a chan aelodau'r cyhoedd, neu unrhyw un y gall effeithio arno.

Mae'r ymgynghoriad hwn yn arbennig o berthnasol i:

- Unigolion, grwpiau neu fusnesau sy'n ymwneud â'r sectorau pysgota, bwyd môr neu ddyframaethu;
- Unigolion, grwpiau neu fusnesau eraill sy'n defnyddio'r môr, er enghraifft, diwydiannau morol fel olew a nwy, ynni adnewyddadwy ar y môr a chyrrff hwylio;
- Grwpiau buddiant cenedlaethol a lleol fel mudiadau amgylcheddol a hamdden anllywodraethol, a ffederasiynau diwydiannau.

## Crynodeb o'r JFS hwn

Mae'r JFS hwn yn cynnwys polisiau ar gyfer cyflawni, neu gyfrannu at gyflawni, yr amcanion ar gyfer pysgodfeydd, fel sy'n ofynnol gan y Ddeddf. Yn ogystal, mae'n cynnwys datganiad sy'n esbonio sut y bydd yr awdurdodau polisi pysgodfeydd yn defnyddio Cynlluniau Rheoli Pysgodfeydd (FMPs) i gyflawni, neu gyfrannu at gyflawni, yr amcanion pysgodfeydd, a datganiad ar sut y cafodd yr amcanion pysgodfeydd eu dehongi a'u cymhwyso yn ôl y gofyn wrth lunio'r polisiau a'r cynigion.

Mae'r JFS hwn wedi'i ddrafftio yn unol â'r egwyddorion yn y Memorandwm Cyd-ddealltwriaeth ar y Fframwaith Pysgodfeydd.

Mae'r JFS yn cynnwys y penodau canlynol:

Mae'r **Cyflwyniad** yn esbonio beth yw'r JFS ac yn esbonio'i gefndir. Mae'n esbonio pam y cafodd ei ddatblygu a sut mae'n cyd-fynd â'r Fframwaith Pysgodfeydd ehangach. Disgrifir cwmpas y JFS a'r gofyn ar i bob awdurdod polisi pysgodfeydd weithredu yn unol â'r polisiau sydd ynddo.

Mae **Pennod 1: Ein huchelgais cytûn** yn disgrifio uchelgais cytûn y DU i reoli ein pysgodfeydd a'n dyframaeth mewn ffordd gynaliadwy at safon byd, gan ganolbwyntio ar y tair prif thema sef:

- Diogelu a lle bo angen, adfer ein stociau pysgod;
- Lleihau effeithiau pysgota ar yr amgylchedd morol ac arfordirol;
- Cefnogi diwydiant pysgota modern, cryf ac amgylcheddol gyfrifol.

Mae **Pennod 2: yr Amcanion ar gyfer Pysgodfeydd** yn cynnwys rhestr o'r holl amcanion ar gyfer pysgodfeydd, a sut y mae'r JFS yn eu dehongli. Mae hefyd yn cynnwys datganiad sy'n esbonio sut y cafodd yr amcanion eu hystyried wrth lunio'r polisiau yn y JFS, ac yna ceir crynodeb ar ffurf tabl o feysydd polisi pob amcan.

Mae **Pennod 3: Rhoi'r JFS ar waith** yn amlinellu sut y bydd yr awdurdodau pysgodfeydd cenedlaethol yn rhoi'r polisiau yn y JFS ar waith drwy arfer eu swyddogaethau ac yn unol â'r amcanion ar gyfer pysgodfeydd. Bydd yr egwyddorion canlynol yn sail ar gyfer rhoi'r JFS ar waith:

- Gwyddoniaeth dda a sylfaen dystiolaeth gadarn i lywio penderfyniadau polisi a rheoli;
- Cydweithio ar draws y pedwar awdurdod polisi pysgodfeydd, a chyda rhanddeiliaid, gwledydd arfordirol eraill a phartneriaid rhyngwladol i reoli pysgodfeydd yn effeithiol;
- Gwneud penderfyniadau cyfranogol trwy sicrhau llais i'r sectorau morol a bwyd môr, Sefydliadau Anllywodraethol (NGOs) a chymunedau arfordirol yn y penderfyniadau a fydd yn effeithio arnynt.

Mae trosolwg o'r broses adrodd ac adolygu a monitro hefyd wedi'i gynnwys yn y bennod hon.

Mae **Pennod 4: Rheoli pysgodfeydd yn gynaliadwy** yn nodi sut y bydd y JFS yn sicrhau bod pysgodfeydd yn cael eu rheoli'n gynaliadwy. Mae'n disgrifio sut yr eir ati i ymdrin â rheoli pysgodfeydd ac yn nodi polisiau ar gyfer cyflawni, neu gyfrannu at gyflawni, yr amcanion ar gyfer pysgodfeydd.

Mae **Pennod 5: Cynlluniau Rheoli Pysgodfeydd** yn esbonio sut y mae'r awdurdodau polisi pysgodfeydd yn cynnig defnyddio FMPs er mwyn cyflawni, neu gyfrannu at gyflawni, yr amcanion ar gyfer pysgodfeydd. Mae'r bennod hon hefyd yn disgrifio'r berthynas rhwng [Cynlluniau Aml-flwydd yr UE \(MAPs\)](#) sydd wedi'u dargadw a'r FMPs. Yn Atodiad A y JFS, ceir rhestr o FMPs sydd wedi'u cynnig.

## Sut cafodd y JFS hwn ei ddatblygu

Cafodd y JFS ei ddatblygu ar y cyd gan yr awdurdodau polisi pysgodfeydd. Fel rhan o'r broses ddrafftio, cafodd rhanddeiliaid gyfrannu at drwy'r Col. Mae gan y Col aelodaeth eang gyda chynrychiolwyr o bob rhan o'r sector i gynyddu'r mewnbwn a sicrhau



arbenigedd eang. Trwy'r Col, cafodd rhanddeiliaid gyfrannu at sawl cam o'r broses ddrafftio.

Mae'r awdurdodau polisi pysgodfeydd wedi cynnal Asesiad Effaith naratif ar y cyd o'r JFS. Mae hwn yn ATODIAD 3 y ddogfen ymgynghori hon

## Sut i Ymateb i'r Ymgynghoriad hwn

Caiff yr ymgynghoriad hwn ei gynnal yn bennaf drwy borth ar-lein Gofod y Dinesydd, sydd ar gael yn Gymraeg ac yn Saesneg. Fodd bynnag, byddwn yn croesawu ymatebion e-bost a chopïau caled hefyd os nad ydych yn gallu cysylltu â'r arolwg ar-lein. Fe welwch ffurflen ar gyfer ymateb dros e-bost neu ar ffurf copi caled yn ATODIAD 2 y ddogfen hon ac ynghlwm wrth y dogfennau cysylltiedig ar wefan y Dinesydd.

Mae fersiynau print bras, braille ac ieithoedd eraill o'r ddogfen hon ar gael o ofyn amdanynt.

## Hyd yr Ymgynghoriad

Bydd yr ymgynghoriad yn para 12 wythnos, gan ddechrau am 09.30 11 Ionawr 2022 ac yn gorffen ar 5 Ebrill 2022. Rhaid i ymatebion ein cyrraedd erbyn 23.59 5 Ebrill 2022.

## Ymatebion

Gallwch ymateb:

- Ar-lein trwy borthol ar-lein Gofod y Dinesydd: <https://consult.defra.gov.uk/>
- Trwy e-bostio: [jfs@defra.gov.uk](mailto:jfs@defra.gov.uk)
- Trwy'r post at:

Cydlynnydd Ymgynghoriadau Defra

Kings Pool, Unit 4 Foss House,

1-2 Peasholme Green,

York, YO1 7PX

Ar ddiwedd y cyfnod ymgynghori, byddwn yn paratoi crynodeb o'r ymatebion ac yn ei roi ar wefan Llywodraeth y DU a gwefannau'r gweinyddiaethau datganoledig. .

## Cyfrinachedd a Diogelu Data

Caiff crynodeb o'r ymatebion i'r ymgynghoriad hwn ei gyhoeddi ar wefannau Llywodraeth y DU a'r gweinyddiaethau datganoledig yn: [www.gov.uk/defra](http://www.gov.uk/defra), [Ymgynghoriadau |](#)

[LLYW.CYMRU](#), [www.consult.gov.scot/](http://www.consult.gov.scot/), a [www.daera-ni.gov.uk/consultations](http://www.daera-ni.gov.uk/consultations). Bydd atodiad i'r crynodeb o'r ymatebion yn rhestru'r holl sefydliadau sydd wedi ymateb, ond ni fydd yn cynnwys enwau personol, cyfeiriadau na manylion cyswllt eraill.

Efallai y bydd Defra am gyhoeddi cynnwys eich ymateb i'r ymgynghoriad hwn er mwyn i'r cyhoedd gael ei weld ond ni fydd yn cyhoeddi'ch enw personol na'ch manylion cyswllt preifat (e.e. cyfeiriad cartref, cyfeiriad e-bost ac ati).

Os byddwch yn ateb 'Hoffwn' i'r cwestiwn sy'n gofyn a hoffech i unrhyw beth yn eich ymateb gael ei gadw'n gyfrinachol, gofynnir i chi nodi'n glir pa wybodaeth yr hoffech i ni ei chadw'n gyfrinachol a'ch rhesymau pam. Rydym yn gofyn am y gallem orfod ryddhau'r wybodaeth yn yr ymatebion i'r ymgynghoriad hwn i'r cyhoedd neu bartïon eraill yn unol â'r ddeddfwriaeth ynghylch gweld gwybodaeth (sef yn bennaf Rheoliadau Gwybodaeth Amgylcheddol 2004 (EIRs), Deddf Rhyddid Gwybodaeth 2000 (FOIA), y Rheoliad Cyffredinol ar gyfer Diogelu Data a Deddf Diogelu Data 2018 (DPA)). Mae rhwymedigaeth arnom, yn bennaf o dan yr EIRs, y Ddeddf Rhyddid Gwybodaeth a'r Ddeddf Diogelu Data, i ddatgelu gwybodaeth i dderbynwyr penodol neu i'r cyhoedd o dan rai amgylchiadau. O'r herwydd, bydd eich rhesymau dros ofyn am gadw'ch ymateb neu ran ohono, yn gyfrinachol yn ein helpu i gadw'r ddysgl yn wastad rhwng y rhwymedigaethau hyn i ddatgelu ac unrhyw rwymedigaeth i gynnal cyfrinachedd. Os cawn gais i gadw'r wybodaeth yr ydych wedi'i rhoi yn eich ymateb i'r ymgynghoriad hwn yn gyfrinachol, byddwn yn rhoi ystyriaeth lawn i'ch rhesymau dros ofyn am gadw'ch ymateb yn gyfrinachol, ond ni allwn warantu y gallwn ei gadw'n gyfrinachol ym mhob sefyllfa.

Os mai 'Na' fydd eich ateb i'r cwestiwn sy'n gofyn a hoffech i unrhyw beth yn eich ymateb gael ei gadw'n gyfrinachol, byddwn yn cael rhyddhau cynnwys eich ymateb i'r cyhoedd, ond ni fyddwn yn cyhoeddi'ch enw na'ch manylion cyswllt preifat i'r cyhoedd.

Fe all Defra ar adegau rannu'r wybodaeth a gafwyd gennych yn eich ymateb i'r ymgynghoriad, gan gynnwys unrhyw ddata personol, â dadansoddwyr allanol. Gwneir hyn yn unig er mwyn dadansoddi'r ymatebion i'r ymgynghoriad a darparu adroddiad o'r crynodeb o ymatebion.

Mae'r ymgynghoriad hwn yn cael ei gynnal yn unol ag 'Egwyddorion Ymgynghori' Swyddfa'r Cabinet sydd i'w gweld yn:

<https://www.gov.uk/government/publications/consultation-principles-guidance>.

Caiff ein hysbysiad preifatrwydd ei lanlwytho fel dogfen gysylltiedig ochr yn ochr â'n dogfen ymgynghori.

Os oes gennych unrhyw sylwadau neu gwynion am y broses ymgynghori, anfonwch nhw at:

Cydlynnydd Ymgynghoriadau Defra

Kings Pool, Unit 4 Foss House,

1-2 Peasholme Green,

York, YO1 7PX

Neu e-bostiwrch: [consultation.coordinator@defra.gov.uk](mailto:consultation.coordinator@defra.gov.uk)

## Cwestiynau'r Ymgynghoriad

1. Hoffech chi i ni gadw'ch ymateb yn gyfrinachol?
2. I ba raddau rydych yn credu y bydd y polisiau a ddisgrifir yn y JFS drafft yn cyflawni, neu'n cyfrannu at gyflawni'r amcanion ar gyfer pysgodfeydd? Eglurwch eich ateb, gan gyfeirio at gynnwys penodol yn y JFS pryd bynnag y bo modd.
3. Beth yw'ch barn am y cynigion ar gyfer datblygu Cynlluniau Rheoli Pysgodfeydd?
4. A oes unrhyw agweddau eraill ar bolisi pysgodfeydd y credwch y dylem eu cynnwys yn y JFS?

Mae ein cwestiynau ymgynghori wedi'u cynllunio i fod yn eang eu cwmpas a gobeithio eu bod wedi rhoi cyfle i chi fyneg barn ystyrlon am y JFS drafft hwn. Mae'r porthol ar-lein yn cynnwys blwch testun gwag ichi allu gwneud sylwadau pellach os dymunwch.

## Ymholiadau

Os oes gennych unrhyw gwestiynau, cysylltwch â: [jfs@defra.gov.uk](mailto:jfs@defra.gov.uk)

Ceir copi o'r Ddeddf yma: <https://www.legislation.gov.uk/ukpga/2020/22/contents/enacted>

# ATODIAD 1: Ymgynghoriad ar y Cyd-ddatganiad drafft ar Bysgodfeydd



Department  
for Environment  
Food & Rural Affairs



Llywodraeth Cymru  
Welsh Government



The Scottish  
Government  
Riaghaltas na h-Alba



Department of  
Agriculture, Environment  
and Rural Affairs

[www.daera-ni.gov.uk](http://www.daera-ni.gov.uk)

## Cynnwys

Crynodeb Gweithredol .....	16
Pam Cyd-ddatganiad ar Bysgodfeydd? .....	16
Pam mae pysgota'n bwysig? .....	16
Beth yw polisiau'r JFS? .....	16
Pam Cynlluniau Rheoli Pysgodfeydd? .....	17
Sut y byddwn yn mesur cynnydd? .....	17
Cyflwyniad .....	18
Pwysigrwydd pysgota i holl wledydd y DU.....	19
Fframwaith Rheoli a Chefnogi Pysgodfeydd y DU (y Fframwaith Pysgodfeydd) .....	19
Cytundebau Cenedlaethol a Rhyngwladol.....	20
Protocol Gogledd Iwerddon .....	20
Cwmpas y JFS .....	21
Effaith y JFS a'r FMPs .....	21
Atebolrwydd.....	22
1. Ein huchelgais cytûn .....	22
2. Amcanion ar gyfer Pysgodfeydd .....	23
2.1 Dehongli'r Amcanion .....	23
2.2 Cymhwyso'r Amcanion .....	27
2.3 Amcanion fesul Maes Polisi.....	28
3 Rhoi'r JFS ar waith .....	30
3.1 Egwyddorion.....	30
3.2 Gwyddoniaeth a Thystiolaeth .....	31
3.3 Y Broses Adrodd ac Adolygu.....	34
3.4 Monitro.....	34
3.5 Gweithio mewn Partneriaeth.....	35
3.6 Gwneud Penderfyniadau Cyfranogol.....	35

4	Rheoli Pysgodfeydd yn Gynaliadwy .....	36
4.1	Sut ydym yn Rheoli Pysgodfeydd .....	36
4.2	Cyflawni'r Amcanion Pysgodfeydd trwy'n Polisiâu.....	39
4.2.1	Cyfleoedd Pysgota .....	39
4.2.2	Stociau heb Gwota .....	44
4.2.3	Cysylltiadau Rhyngwladol Ehangach .....	44
4.2.4	Capasiti Pysgota .....	45
4.2.5	Hawl i bysgota yn nyfroedd y DU .....	45
4.2.6	Pysgota Anghyfreithlon, heb ei Gofnodi a heb ei Reoleiddio.....	45
4.2.7	Lleihau Sgil-ddalfeydd ac Osgoi Dal Rhywogaethau Sensitif .....	46
4.2.8	Dadleoli .....	47
4.2.9	Cynllunio Gofodol Morol .....	47
4.2.10	Ardaloedd Morol Gwarchodedig (AMG) .....	47
4.2.11	Sbwriel Môr.....	48
4.2.12	Dyfroedd Arfordirol a Dyfroedd Croyw .....	48
4.2.13	Newid Hinsawdd .....	48
4.2.14	Dyframaethu .....	50
4.2.15	Pysgota Hamdden yn y Môr.....	50
4.2.16	Cynhyrchu, Marchnata a Bwyta Bwyd Môr .....	50
5.	Cynlluniau Rheoli Pysgodfeydd .....	53
5.1	Cyflwyniad .....	53
5.2	Beth yw Cynllun Rheoli Pysgodfa?.....	54
5.3	Penderfynu pa stociau i'w cynnwys mewn FMP .....	55
5.4	Perthynas FMPs â'r Amcanion Pysgodfeydd.....	56
5.5	Perthynas rhwng FMPs a'r Cynlluniau Rheoli Presennol .....	57
5.6	Asesu Terfynau Cynaliadwy .....	57
5.7	Monitro ac Adolygu FMPs.....	57
	Atodiad A: Rhestr o'r Cynlluniau Rheoli Pysgodfeydd arfaethedig .....	59



# Crynodeb Gweithredol

## Pam Cyd-ddatganiad ar Bysgodfeydd?

Mae'r awdurdodau polisi pysgodfeydd wedi cydweithio i lunio Cyd-Ddatganiad ar Bysgodfeydd (JFS), yn unol â'r gofyn cyfreithiol yn adran 2 o Ddeddf Pysgodfeydd 2020 (y Ddeddf). Mae'r JFS yn nodi polisiâu'r awdurdodau polisi pysgodfeydd ar gyfer cyflawni, neu gyfrannu at gyflawni, yr amcanion ar gyfer pysgodfeydd ac mae'n rhan o Fframwaith Rheoli a Chefnogi Pysgodfeydd y DU (y Fframwaith Pysgodfeydd). Mae'r JFS yn nodi uchelgais y DU i barhau i reoli pysgodfeydd yn gynaliadwy at safon byd, yn unol ag amcanion y Ddeddf a sut y bydd yn gwneud hynny.

Mae'r JFS yn diffinio sut mae'r awdurdodau polisi pysgodfeydd wedi deall yr wyth amcan ar gyfer pysgodfeydd a sut y byddan nhw'n cael eu troi'n bolisiâu. Rydym hefyd wedi nodi drwy'r ddogfen yr amcanion sy'n berthnasol i bolisi penodol. Dylech nodi, oherwydd natur ryng-gysylltiedig yr amcanion, y bydd un polisi yn aml yn dod o sawl amcan.

## Pam mae pysgota'n bwysig?

Mae'r diwydiant pysgota yn sylfaen i ffyniant cymunedau arfordirol ledled y DU, ac yn cyfrannu'n sylweddol ato. Mae'r diwydiant yn falch ei fod yn darparu cyfleoedd gwaith gwerthfawr mewn ardaloedd sydd fel arall yn ddiarffordd, ac yn darparu bwyd iach a chynaliadwy i'r DU gyfan. Mae'r stociau pysgod o amgylch arfordir y DU yn adnodd cyhoeddus ac yn ased cenedlaethol, ac mae'r JFS yn nodi sut y bydd yr awdurdodau polisi pysgodfeydd yn sicrhau eu bod yn parhau i ddod â budd i gymunedau pysgota a'r DU, yn awr ac yn y dyfodol.

## Beth yw polisiâu'r JFS?

Mae'r JFS yn cydnabod pwysigrwydd pysgota i'r DU ac i lawer o'n cymunedau arfordirol, a hefyd yr angen i weithio gyda'r diwydiant ar gynlluniau olyniaeth, hyfforddiant, mynediad i lafur domestig, a thâl teg i annog newydd-ddyfodiaid. Mae'r awdurdodau polisi pysgodfeydd yn ymrwmo i annog pobl i fwyta bwyd môr lleol fel ffynhonnell protein iach, carbon isel, ac i gefnogi marchnadoedd ffyniannus a chryf yn y DU a thu hwnt. Mae'r JFS hefyd yn ymrwmo'r awdurdodau polisi pysgodfeydd i ddiogelu iechyd, diogelwch a lles y rhai sy'n gweithio yn y sector bwyd môr.

Mae'r JFS yn disgrifio sut y bydd y DU yn cyflawni'r amcan o ran y newid yn yr hinsawdd drwy nodi a chefnogi newidiadau all liniaru effeithiau a lleihau allyriadau ar draws y diwydiant pysgota i gefnogi datgarboneiddio. Mae hefyd yn cydnabod pwysigrwydd diogelu ac adfer cynefinoedd carbon glas i gefnogi'r gallu i wrthsefyll y newid yn yr hinsawdd, gan sicrhau ymrwymiad i weithio gyda'r gymuned wyddonol i ddatblygu'r sylfaen dystiolaeth.



Mae'r JFS yn cydnabod bod amgylchedd morol iach a chydnerth yn hanfodol ar gyfer sector bwyd môr llewyrchus a chymunedau arfordirol ffyniannus, a bod defnydd cynaliadwy o'r môr a'i gadwraeth yn ganolog i'n dull o reoli pysgodfeydd. Mae'n ymrwmo i weithio gyda'r diwydiant i leihau'r sgil-ddalffa a lle medrir, ei osgoi'n llwyr ac i beidio â rhwydo rhywogaethau sensitif. Bydd hefyd yn llywio ein gwaith rhyngwladol i sicrhau ein bod yn arweinwyr byd-eang ym maes rheoli pysgodfeydd cynaliadwy rhyngwladol.

## **Pam Cynlluniau Rheoli Pysgodfeydd?**

Mae Cynlluniau Rheoli Pysgodfeydd (FMPs) yn rhan allweddol o ymrwymiad y DU i bysgota cynaliadwy. Mae'r JFS yn nodi diben cyffredinol FMPs, gan gynnwys eu cysylltiad â'r amcanion ar gyfer pysgodfeydd a'r fframwaith pysgodfeydd ehangach a nodir yn y Ddeddf, ynghyd â'r cynlluniau y bydd yr awdurdodau polisi pysgodfeydd yn eu cyhoeddi.

Bydd yr awdurdodau polisi pysgodfeydd yn cyhoeddi FMPs unigol ar y cyd ar gyfer y stociau hynny sydd o ddiddordeb masnachol allweddol a bydd pob awdurdod polisi pysgodfeydd yn ystyried a ddylai gyflwyno ei FMPs rhanbarthol ei hun i reoli gweithgarwch bysgota o fewn ei ddalgylch neu a fyddai'n well cydweithio ag awdurdod polisi pysgodfeydd arall lle bo hynny'n briodol.

Bydd FMPs y DU yn canolbwyntio ar reoli stoc, gydag FMPs rhanbarthol yn estyn eu cwmpas i ystyried pryderon ehangach ynghylch rheoli pysgodfeydd.

## **Sut y byddwn yn mesur cynnydd?**

Yn unol â'r Ddeddf, bydd y JFS yn parhau'n weithredol nes y bydd yr awdurdodau polisi pysgodfeydd yn ei adolygu ac yn credu bod angen ei ddiwygio neu ei ddiweddarau, Ni fydd mwy na chwe blynedd o'i adolygiad diweddaraf.

Bydd yr awdurdodau polisi pysgodfeydd yn cyhoeddi adroddiad bob tair blynedd ar i ba raddau y mae'r polisiâu a nodir yn y JFS wedi'u rhoi ar waith ac wedi cyflawni neu gyfrannu at gyflawni'r amcanion pysgodfeydd. Bydd yr adroddiad yn pwysu a mesur hefyd i ba raddau y mae'r polisiâu yn yr FMP perthnasol wedi'u cyflawni ac wedi effeithio ar lefelau stociau pysgod.

# Cyflwyniad

Mae sector bwyd môr y DU yn rhan bwysig o economi cymunedau arfordirol ac mae ganddo dreftadaeth ddiwylliannol gyfoethog. O'r sector y daw ymdeimlad y cymunedau hynny o le ac o berthyn. Mae perthynas y DU â'r môr yn destun dathlu, a theg hynny. Ar hyd yr arfordir, o'r porthladd mwyaf i'r cei lleiaf, mae pysgotwyr a chymunedau pysgota yn ymfalchïo eu bod yn darparu cynnyrch o ansawdd uchel sy'n cael ei ddal yn gynaliadwy ac sy'n cyfrannu at ddiogelu cyflenwadau bwyd. Hefyd, mae'r DU yn adnabyddus am ei buddsoddiad mewn gwyddor pysgodfeydd, nid yn unig ar gyfer asesu iechyd stociau pysgod ac ecosystemau, ond hefyd i ddatblygu ac addasu ei dulliau pysgota a defnyddio technolegau newydd – rhywbeth pwysicach nag erioed o ystyried yr angen i fynd i'r afael â heriau hinsawdd sy'n newid. Yn y cyfnod hwn o newid, bydd y DU yn parhau i werthfawrogi pwysigrwydd y diwydiant pysgota i'w chymunedau arfordirol niferus a bydd yn darparu diwydiant pysgota ffyniannus ar gyfer cenedlaethau'r dyfodol tra'n diogelu, adfer a gwella'r amgylchedd morol y mae'r diwydiant a'r gymdeithas ehangach yn dibynnu arno.

Mae ein pysgodfeydd yn wynebu llawer o heriau a chyfleoedd a bydd angen i bedair gweinyddiaeth y DU gydweithio arnynt yn ystod oes y JFS hwn. Mae'n hanfodol ein bod yn parhau i adfer stociau pysgod, lleihau effeithiau amgylcheddol pysgota, a lleihau'r effeithiau andwyol ar y newid yn yr hinsawdd a helpu i addasu iddo er mwyn sicrhau sector bwyd môr bywiog sy'n addas ar gyfer y dyfodol. Mae sicrhau pysgodfeydd cynaliadwy yn hanfodol er mwyn gwireddu gweledigaeth y DU o gefnforoedd a moroedd 'glân, iach, diogel, cynhyrchiol a bioamrywiol'<sup>1</sup>.

Mae pysgod môr yn adnodd cyhoeddus. A ninnau wedi gadael yr Undeb Ewropeaidd (UE), mae gan y DU gyfrifoldeb i reoli ei physgodfeydd gyda golwg ar ofalu amdanynt yn gynaliadwy mewn ffordd sy'n cydnabod anghenion penodol ein diwydiant bwyd môr amrywiol a'n hamgylchedd morol.

Mae [Deddf Pysgodfeydd 2020](#) (y Ddeddf) yn nodi wyth amcan ar gyfer pysgodfeydd. Bydd awdurdodau polisi pysgodfeydd pob un o bedair gweinyddiaeth y DU yn rheoli'u pysgodfeydd ar sail yr amcanion hynny. Mae'r JFS hwn yn nodi y polisïau, y penderfynwyd arnynt trwy gytundeb yr awdurdodau polisi pysgodfeydd, ar reoli pysgodfeydd môr (dal a phrosesu), pysgota hamdden ar y môr, a dyframaethu, er mwyn cyflawni, neu gyfrannu at gyflawni, yr amcanion ar gyfer pysgodfeydd. Bydd yr awdurdodau polisi pysgodfeydd yn ystyried y polisïau hyn, ynghyd â'r amcanion ar gyfer pysgodfeydd, wrth iddynt ddatblygu'u polisïau eu hunain. Efallai y bydd gan awdurdodau polisi pysgodfeydd unigol strategaethau a dogfennau polisi datganoledig, fydd eisoes yn adlewyrchu polisïau yn y JFS, ac felly'r amcanion ar gyfer pysgodfeydd.

---

<sup>1</sup> Datganiad Polisi Morol y DU (<https://www.gov.uk/government/publications/uk-marine-policy-statement>)

Fel awdurdodau polisi pysgodfeydd, mae'r Ysgrifennydd Gwladol, Gweinidogion yr Alban, Gweinidogion Cymru a'r Adran Amaethyddiaeth, Amgylchedd a Materion Gwledig yng Ngogledd Iwerddon wedi paratoi a chyhoeddi'r JFS hwn ar y cyd yn unol â'r broses a ddisgrifir yn adran 2 o'r Ddeddf. Fel awdurdodau pysgodfeydd cenedlaethol, mae'n ofynnol iddynt hwy, a'r Sefydliad Rheoli Morol (MMO), arfer eu swyddogaethau yn unol â'r polisïau yn y JFS a'r FMPs perthnasol, ac ag adran 10 o'r Ddeddf.

## **Pwysigrwydd pysgota i holl wledydd y DU**

Mae'r sector bwyd môr yn y DU yn cynnwys dal pysgod (gan gynnwys pysgota hamdden ar y môr), dyframaethu morol, a phrosesu.

Yn y diwydiant dal, mae pysgodfeydd masnachol y DU yn amrywio o gychod pelagig mawr sy'n gallu dal cannoedd o dunelli o bysgod mewn un rhwydiad, i gychod pysgota bach yn y glannau a helwyr pysgod cregyn rhwng y ddau lanw. Mae fflyd pob gwlad yn amrywio'n fawr, ac mae pysgota'n bwysig o ran cynnal rhai cymunedau arfordirol bregus.

Mae pysgota môr hamdden hefyd yn fath poblogaidd o bysgota yn y DU ac, fel pysgota masnachol, mae'n esgor ar fuddiannau economaidd a chymdeithasol pwysig.

Fel un o sectorau cynhyrchu bwyd strategol y DU, mae dyframaethu morol yn helpu twf economaidd cynaliadwy mewn cymunedau gwledig ac arfordirol ac yn yr economi ehangach. Mae polisi dyframaethu wedi'i ddatganoli'n llwyr yn y DU ac felly mae pob un o'r awdurdodau polisi pysgodfeydd yn gweithredu o dan ddeddfwriaeth a pholisïau datganoledig.

Mae'r sector prosesu ac allforio bwyd môr yn gyflogwr arwyddocaol lleol yn y DU. Mae'n cynnwys prosesu sylfaenol (fel ffiledu a rhewi) a phrosesu eilaidd (fel rhannu, pacio, cochï, gorchuddio mewn briwsion ac ati), yn ogystal â chyfleusterau ar gyfer allforio pysgod heb eu prosesu. Ceir safleoedd prosesu bwyd môr ym mhob rhan o'r DU, yn amrywio o safleoedd bach i fusnesau prosesu mwy aml-safle, llawer ohonynt wedi'u clystyru mewn trefi rhanbarthol allweddol. Mae'r sector yn cynhyrchu ar gyfer y farchnad ddomestig a marchnadoedd rhyngwladol, gan ddibynnu ble rydych chi yn y DU. Mewn rhai rhannau o'r DU, mae pysgod yn cael eu hallforio hefyd fel nwyddau byw, heb eu prosesu, yn bennaf i farchnad yr UE.

## **Fframwaith Rheoli a Chefnogi Pysgodfeydd y DU (y Fframwaith Pysgodfeydd)**

Mae'r cyfrifoldeb am reoli pysgodfeydd yn y DU i raddau helaeth wedi'i ddatganoli. Mae'r JFS hwn yn rhan o Fframwaith Pysgodfeydd ehangach y DU. Mae'r Fframwaith Pysgodfeydd yn nodi'r meysydd lle gellir rheoli pysgodfeydd ar y cyd ar lefel y DU, a'r ddeddfwriaeth, y polisïau a'r egwyddorion cydweithio ar lefel y DU ar gyfer gwneud hynny. Mae'r Fframwaith Pysgodfeydd yn cynnwys y Ddeddf a'r offerynnau statudol cysylltiedig, cyfraith berthnasol yr UE sydd wedi'i dargadw, y JFS, FMPs, a'r Memorandwm Cyd-

ddealltwriaeth ar y Fframwaith Pysgodfeydd. Mae'r olaf yn nodi egwyddorion y ffyrdd o weithio a chydweithio ar reoli pysgodfeydd rhwng yr awdurdodau polisi pysgodfeydd.

Mae pob gwlad yn mynd ati yn ei ffordd ei hun i ddatblygu polisi, gan adlewyrchu natur ddatganoledig rheoli pysgodfeydd ledled y DU. Fodd bynnag, mae'r awdurdodau polisi pysgodfeydd trwy gydweithio a chydreoli ar sail y Fframwaith Pysgodfeydd, yn ceisio sicrhau canlyniadau cyffredin cytûn ond gan cydnabod eu hawl a'r angen i ddilyn eu polisiau eu hunain ac i barchu datganioli.

## **Cytundebau Cenedlaethol a Rhyngwladol**

Mae gofyn i'r awdurdodau polisi pysgodfeydd, wrth weithio yn unol â'r polisiau yn y JFS, roi ystyriaeth hefyd i ofynion deddfwriaeth genedlaethol ac ymrwymadau y mae'r DU wedi'u gwneud o dan gytundebau a datganiadau rhyngwladol. N Yn eu plith y mae [Cytundeb Masnach a Chydweithredu'r DU/UE \(TCA\)](#), [Confensiwn y Cenhedloedd Unedig \(CU\) ar Gyfraith y Môr \(UNCLOS\)](#), [Amcanion Datblygu Cynaliadwy'r CU](#), [Confensiwn y CU ar Fioamrywiaeth \(CBD\)](#), [Y Fframwaith Bioamrywiaeth Byd-eang](#), y [Confensiwn ar y Fasnach Rynwladol mewn Rhywogaethau mewn Perygl \(CITES\)](#), a [Chonfensiwn Gwarchod Amgylchedd Morol Gogledd-ddwyrain Cefnfor Iwerydd \(OSPAR\)](#).

A'r DU bellach wedi gadael yr UE, mae'r TCA yn cynnwys trafodaethau blynyddol ar gyfleoedd pysgota a mynediad i ddyfroedd a sefydlu Pwyllgor Arbenigol ar Bysgodfeydd (SCF) rhwng yr UE a'r DU i hwyluso cydweithredu ar reoli pysgodfeydd. Mae'r cytundeb yn cydnabod rhyddid y DU i benderfynu ar y rheolau ar gyfer rheoli pysgodfeydd yn nyfroedd y DU.

Mae [Rheoliadau Strategaeth Forol 2010](#) (OS 2010/1627) yn ei gwneud yn ofynnol i gyrrff pysgodfeydd yn y DU gymryd camau i sicrhau bod holl ddyfroedd y DU yn cyrraedd neu'n cadw Statws Amgylcheddol Da (GES) (ar wahân i rai eithriadau). [Strategaeth Forol y DU \(UKMS\)](#) yw un o bileri allweddol polisi morol y DU ac mae'r JFS yn fesur trawsbynciol a fydd yn helpu i sicrhau mewn pysgodfeydd masnachol yn cyrraedd statws GES. At hynny, bydd y JFS yn helpu i sicrhau nad yw arferion pysgota yn peryglu statws GES drwy effeithio ar elfennau eraill y GES fel bioamrywiaeth neu gyflwr gwely'r môr.

## **Protocol Gogledd Iwerddon**

Mae cydweithredu i reoli pysgodfeydd ar draws yr awdurdodau polisi pysgodfeydd yn rhan o gyd-destun [Protocol Gogledd Iwerddon/Iwerddon \(y Protocol\)](#). Mae'r Protocol yn nodi'r trefniadau y cytunodd y DU a'r UE arnynt i ddelio â'r amgylchiadau unigryw ar ynys Iwerddon ac a gyflwynwyd wrth i'r DU ymadael â'r UE. Mae Gogledd Iwerddon yn rhan o'r DU, gan gynnwys bod yn rhan o diriogaeth tollau'r DU, ond mae'r Protocol yn cymhwyso rhannau penodol o gyfraith yr UE i Ogledd Iwerddon rhag creu ffin galed (gweler Atodiad 2 y Protocol). Bydd hyn yn parhau nes y bydd Cynulliad Gogledd Iwerddon yn penderfynu fel arall.

## Cwmpas y JFS

Mae'r JFS yn ymdrin â pholisi a rheoli pysgodfeydd môr o fewn dyfroedd y DU, ac wrth drafod â gwledydd arfordirol eraill. Bydd y JFS yn llywio hefyd sut y byddwn yn ymdrin â chytundebau rhyngwladol ac â ffora rhyngwladol. Nid yw'n effeithio'n uniongyrchol ar Dirioogaethau Tramor y DU nac ar Ddibyniaethau'r Goron<sup>2</sup>. Fodd bynnag, bydd polisiau o fewn y JFS yn effeithio ar sut y byddwn yn cydweithio â Dibyniaethau'r Goron i reoli pysgodfeydd yn effeithiol ledled dyfroedd y DU a'r Dibyniaethau hynny.

Bydd angen i Awdurdodau Pysgodfeydd a Chadwraeth y Glannau roi ystyriaeth i'r Ddeddf, y JFS, a'r FMPs, lle gofynnir iddynt wneud hynny gan unrhyw ganllawiau a gyhoeddir gan yr Ysgrifennydd Gwladol ar sut i gyflawni eu swyddogaethau neu pan fyddant yn ymgymryd â swyddogaeth berthnasol a ddirprwyir iddynt gan yr MMO.

## Effaith y JFS a'r FMPs

Mae'r Ddeddf yn ei gwneud yn ofynnol i'r awdurdodau polisi pysgodfeydd a'r MMO (yn eu rôl fel awdurdodau pysgodfeydd cenedlaethol, fel y'u diffinnir gan y Ddeddf), arfer eu swyddogaethau o ran pysgodfeydd, pysgota a dyframaethu yn unol â'r polisiau yn y JFS neu'r FMPs sy'n gymwys i'r awdurdod oni bai bod newid perthnasol yn yr amgylchiadau yn gofyn fel arall<sup>3</sup>.

Mae newidiadau perthnasol yn yr amgylchiadau yn cynnwys (yn benodol) newidiadau o ran —

- Rhwymedigaethau rhyngwladol y DU;
- Pethau a wnaed (neu sydd heb eu gwneud) gan lywodraeth gwlad y tu allan i'r DU sy'n effeithio ar yr amgylchedd morol a dyfrol;
- Y dystiolaeth wyddonol sydd ar gael; neu
- Y dystiolaeth sy'n bod sy'n ymwneud ag elfennau cymdeithasol, economaidd neu amgylcheddol datblygu cynaliadwy.

Mae'n bolisi gan bob awdurdod polisi pysgodfeydd na wneir unrhyw newid ar chwarae bach. Esbonnir a chyhoeddir y rhesymau dros wyro oddi wrth bolisiau yn y JFS a/neu FMPs mewn unrhyw benderfyniad<sup>4</sup>.

---

<sup>2</sup> Dibyniaethau'r Goron yw Ynys Manaw, Jersey a Guernsey.

<sup>3</sup> Deddf Pysgodfeydd 2020 adran 10

<sup>4</sup> Deddf Pysgodfeydd 2020 adrannau 7 (5) a 10 (2)

## Atebolrwydd

Bydd polisïau a nodir yn y JFS hwn yn cael eu rhoi ar waith a'u gwerthuso drwy drefniadau arferol yr awdurdodau polisi pysgodfeydd perthnasol ac unrhyw fecanweithiau goruchwyllo cenedlaethol perthnasol, a thrwy brosesau'r Fframwaith Pysgodfeydd os oes angen.

# 1. Ein huchelgais cytûn

- 1.1 Ein huchelgais yw sicrhau bod ein pysgodfeydd môr a dyframaeth morol ledled y DU yn cael eu rheoli'n gynaliadwy at safon byd, a chwarae ein rhan i gefnogi'r gwaith o gyflawni hynny drwy'r byd.
- 1.2 Fel rhan o fod yn wlad arfordirol annibynnol, bydd awdurdodau polisi pysgodfeydd y DU yn gweithio gyda'i gilydd i gefnogi diwydiant pysgota bywiog, proffidiol a chynaliadwy, gydag amgylchedd morol iach sy'n gallu gwrthsefyll y newid yn yr hinsawdd yn sail iddo.
- 1.3 Ein nod yw gwireddu'r uchelgais hwn drwy dri phrif faes:

- **Diogelu a lle bo angen, adfer ein stociau pysgod.**

Mae pysgod gwyllt yn adnodd naturiol cyhoeddus ac yn dod â buddiannau mawr i'r DU, fel ffynhonnell bwyd a gwaith, drwy ddarparu gwasanaethau ecosystem a manteision cymdeithasol a lles. Byddwn yn gweithio gyda'n gilydd i sicrhau bod stociau pysgod yn cael eu rheoli a, lle bo angen, yn cael eu hadfer er lles ehangach pawb, gan sicrhau'r budd mwyaf posibl i gymunedau arfordirol.

- **Lleihau effeithiau pysgota ar yr amgylchedd morol ac arfordirol.**

Rydym yn cydnabod bod diwydiant pysgota ffyniannus yn dibynnu ar amgylchedd morol iach a bod stociau iach yn stociau cydnerth. Bydd yr awdurdodau polisi pysgodfeydd yn sicrhau bod penderfyniadau polisi pysgodfeydd yn ystyried y berthynas hon, a bod hynny'n golygu rheoli pysgodfeydd ar sail ecosystemau. Gan ddefnyddio amrywiaeth o fesurau fel Ardaloedd Morol Gwarchodedig a mesurau technegol, byddwn yn lleihau effeithiau pysgota ar yr amgylchedd morol ac ar stociau carbon y môr yn sylweddol yn ystod oes y JFS.

- **Cefnogi diwydiant pysgota modern, cydnerth ac amgylcheddol gyfrifol.**

Bydd yr awdurdodau polisi pysgodfeydd yn gweithio gyda'i gilydd i gynnal diwydiant pysgota proffidiol a chydnerth. Byddwn yn eu helpu i ddatblygu cadwyni cyflenwi cadarn ymhellach, fflyd amrywiol, modern ac isel ei hallyriadau, a gweithlu medrus, sy'n gallu ymateb yn gyflym ac ar y cyd i amodau cyfnewidiol y farchnad a'r amgylchedd a chyfleoedd newydd, tra'n cynnal pysgodfeydd cynaliadwy ac ecosystemau bioamrywiol ar gyfer cenedlaethau'r dyfodol.

Wrth i amgylchedd y môr newid, byddwn yn helpu ein diwydiannau pysgota a dyframaethu i addasu yn unol â hynny, er mwyn sicrhau eu bod yn parhau'n economaidd hyfyw a lleihau effeithiau a allai gwanhau ecosystemau morol.

## 2. Amcanion ar gyfer Pysgodfeydd

Mae polisiâu'r JFS yn seiliedig ar yr amcanion ar gyfer pysgodfeydd a nodir yn y Ddeddf. Gyda'i gilydd, maen nhw'n diffinio pysgota cynaliadwy ac maen nhw wedi'u llunio i helpu'r awdurdodau polisi pysgodfeydd i gadw'r ddysgl yn wastad rhwng sector bwyd môr proffidiol a ffyniannus ac amgylchedd morol iach a chydnerth yn y tymor hir.

Mae'r amcanion ar gyfer pysgodfeydd yn ategu ei gilydd, a gall un polisi gyfrannu at gyflawni sawl amcan.

### 2.1 Dehongli'r Amcanion

2.1.1 (1) Yr 'amcan cynaliadwyedd' yw bod:

(a) gweithgareddau pysgota a dyframaethu yn—

(i) gynaliadwy o safbwynt amgylcheddol tymor hir, a'u

(ii) bod yn cael eu rheoli fel eu bod yn esgor ar fanteision economaidd, cymdeithasol a gwaith ac yn cyfrannu at y cyflenwadau bwyd sydd ar gael a

(b) capasiti pysgota'r fflyd bysgota yn golygu bod y fflyd yn economaidd hyfyw ond nad yw'n gorbysgota stociau morol.

2.1.2 Ystyr pysgota cynaliadwy yw bod cydbwysedd priodol yn cael ei gynnal rhwng ystyriaethau amgylcheddol, economaidd a chymdeithasol wrth reoli ein pysgodfeydd er budd cenedlaethau heddiw ac yfory. Mae'n golygu sicrhau y gellir pysgota stociau pysgod, at ddibenion masnach a hamdden, yn awr ac yn y dyfodol. Wrth wneud hynny, bydd yr awdurdodau polisi pysgodfeydd yn ystyried effeithiau tymor byr a hirdymor penderfyniadau ar stociau pysgod a'r diwydiant pysgota cyn gweithredu; ni ddylai penderfyniadau economaidd-gymdeithasol tymor byr beryglu iechyd hirdymor yr amgylchedd morol yn fawr. Bydd angen i'r penderfyniadau gydnabod pwysigrwydd diwylliannol pysgota drwy gynnal a lle medrir, cryfhau cymunedau a bywoliaethau arfordirol law yn llaw â'r gofyn bod stociau pysgod yn cyrraedd ac yn cadw at lefelau cynaliadwy.

2.1.3 I gadw'r ddysgl yn wastad, bydd awdurdodau polisi pysgodfeydd yn defnyddio'r dystiolaeth orau sydd ar gael wrth wneud penderfyniadau ynghylch rheoli pysgodfeydd.

- 2.1.4 Yn ystod oes y JFS hwn, bydd yr awdurdodau polisi pysgodfeydd yn rhoi pwyslais lle bo angen, ar adfer stociau a diogelu'r amgylchedd. Bydd angen gwneud hyn mewn modd sy'n sensitif i anghenion buddiannau pysgota ac sy'n ystyried ffactorau amgylcheddol ehangach.
- 2.1.5 **(2)** Yr '**amcan rhagofalus**' yw bod —
- (a) pysgodfeydd yn cael eu rheoli mewn modd rhagofalus, a
  - (b) bod stociau morol yn cael eu pysgota mewn modd sy'n adfer ac yn cynnal poblogaethau'r rhywogaethau a gynaeafir uwchlaw'r lefelau o fiomas sy'n gallu cynhyrchu'r Cynnyrch Cynaliadwy Mwyaf (MSY).
- 2.1.6 Mae'r Ddeddf yn diffinio dull rhagofalus o reoli pysgodfeydd fel 'dull lle nad yw diffyg gwybodaeth wyddonol yn gyfiawnhad dros ohirio neu beidio â chymryd camau rheoli i warchod rhywogaethau targed, rhywogaethau cysylltiedig neu ddibynnol, rhywogaethau nad ydynt yn rhai targed neu eu hamgylchedd'.
- 2.1.7 Bydd yr awdurdodau polisi pysgodfeydd yn parchu'r dull rhagofalus, gan roi sylw penodol i sicrhau na ddefnyddir y gofyn am dystiolaeth ychwanegol i osgoi gwneud penderfyniadau rheoli anodd.
- 2.1.8 Mae'r Ddeddf yn diffinio MSY fel 'y cynnyrch cytbwys damcaniaethol uchaf y gellir ei gymryd yn barhaus ar gyfartaledd o stoc forol o dan amodau amgylcheddol presennol heb effeithio'n sylweddol ar y broses atgenhedlu'.
- 2.1.9 Mae'r amcan o gynnal lefelau biomas uwchlaw lefelau sy'n gallu cynhyrchu MSY yn offeryn gwerthfawr i awdurdodau polisi pysgodfeydd allu asesu a rheoli statws stociau pysgod. Fodd bynnag, mae asesiadau MSY yn gofyn am lawer o ddata sy'n golygu mai ond ychydig o stociau y gellir eu hasesu ar ei sail. Yn y JFS, cyfeirir at MSY neu brocsïau addas. Bydd defnyddio'r procsïau addas hyn ochr yn ochr â'r MSY i asesu cyflwr stociau a llywio penderfyniadau rheoli yn helpu i wella cynaliadwyedd nifer fwy o stociau.
- 2.1.10 **(3)** Yr '**amcan ecosystem**' yw bod —
- (a) pysgod a gweithgareddau dyframaethu'n cael eu rheoli ar sail ecosystem er mwyn sicrhau bod yr effeithiau negyddol ar ecosystemau'r môr yn cael eu cadw mor fach â phosibl a lle bo'n bosibl, eu gwyrddio, a
  - (b) bod cyn lleied o rywogaethau sensitif yn cael eu dal trwy ddamwain â phosibl a lle gellir, bod hynny'n cael ei osgoi'n llwyr.
- 2.1.11 Mae dull rheoli ar sail ecosystem yn cael ei ddiffinio yn y Ddeddf fel 'dull sydd (a) yn sicrhau bod pwysau cyfunol gweithgareddau dynol yn cael ei gadw o fewn lefelau sy'n gydnaws â chyrraedd GES o fewn ystyr Rheoliadau



Strategaeth Forol 2010, a (b) nad yw'n peryglu gallu ecosystemau morol i ymateb i newidiadau a ysgogir gan bobl.'

- 2.1.12 Mae'r diwydiant pysgota môr yn gweithredu o fewn ac yn dibynnu ar amgylchedd morol o ansawdd uchel a bydd gan yr awdurdodau polisi pysgodfeydd ymwybyddiaeth a gwerthfawrogiad o'r rhyngweithio amrywiol sy'n digwydd rhwng stociau pysgod, pysgodfeydd a'r amgylchedd.
- 2.1.13 Bydd yr awdurdodau polisi pysgodfeydd yn cyflawni, neu'n cyfrannu at gyflawni, yr amcan ecosystem a'r GES drwy drefniadau rheoli sy'n cynnal neu, lle bo angen, yn adfer, diogelu a gwella iechyd ecosystemau morol, drwy leihau effeithiau pysgota ar yr amgylchedd y tu hwnt i'e stociau unigol, megis difrod i gynefinoedd gwely'r môr a thrwy sgil-ddalffa ar rywogaethau sensitif, ond gan ganiatáu defnydd priodol gan bobl o'n moroedd er budd cenedlaethau heddiw ac yfory.
- 2.1.14 **(4) 'Amcan y dystiolaeth wyddonol'** yw bod —
- (a) data gwyddonol am weithgareddau rheoli pysgod a dyframaethu yn cael eu casglu,
  - (b) awdurdodau polisi pysgodfeydd yn gweithio gyda'i gilydd yn ôl y gofyn i gasglu a rhannu data gwyddonol o'r fath, a bod
  - (c) gweithgareddau rheoli pysgod a dyframaethu'n seiliedig ar y cyngor gwyddonol gorau sydd ar gael.
- 2.1.15 Mae amcan y dystiolaeth wyddonol yn golygu y bydd awdurdodau polisi pysgodfeydd bob amser yn rheoli ar sail tystiolaeth ac yn gwneud defnydd llawn o'r cyngor gwyddonol gorau sydd ar gael i'w helpu i wneud penderfyniadau. Mae hyn yn cynnwys gwella ein dealltwriaeth gyfunol o sut mae pysgota a dyframaethu yn effeithio ar yr amgylchedd morol gyda sectorau/gweithgareddau morol eraill.
- 2.1.16 **(5) Yr 'amcan o ran sgil-ddalffa'** yw —
- (a) lleihau'r sgil-ddalffa bysgod sydd o dan y maint cyfeirio cadwraethol lleiaf a sgil-ddalffa arall ddiangen, neu osgoi'r sgil-ddalffa honno'n llwyr,
  - (b) bod dalffeydd yn cael eu cofnodi a bod cyfrifi amdanynt, a
  - (c) bod y sgil-ddalffa bysgod yn cael ei glanio, ond dim ond lle bo hynny'n briodol ac yn arbennig, cyn belled nad yw'n cymell pysgotwyr i ddal pysgod sydd o dan y maint cyfeirio cadwraethol lleiaf.
- 2.1.17 Mae'r 'amcan o ran y sgil-ddalffa' yn anelu at osgoi dal pysgod na fwriedir eu dal neu sy'n llai na'r maint cadwraethol lleiaf neu at ddal llai ohonynt. Mae'r

awdurdodau polisi pysgodfeydd wedi ymrwymo i roi terfyn ar yr arfer gwastraffus o daflu pysgod yn ôl i'r môr a chynyddu'r atebolrwydd am weithgareddau pysgota yn y môr, gan ennyn hyder yn ein bwyd môr.

- 2.1.18 Mae'r awdurdodau polisi pysgodfeydd wedi ymrwymo i sicrhau bod cofnod o bob dalfa bysgod a bod pob dalfa bysgod sydd o dan amodau'r Cyfanswm y Ddalfa a Ganiateir (TAC), o ddewis yn cael ei glanio, oni bai:
- Bod tystiolaeth gref y gall y pysgod oroesi'r broses o'u dal neu
  - Bod terfyn ar ddefnyddio mesurau lliniaru neu
  - Ei bod yn costio gormod i gael gwared ar y pysgod sy'n cael eu ganio.
- 2.1.19 **(6)** Yr '**amcan mynediad cyfartal**' yw na effeithir ar hawl cychod pysgota'r DU i fynd i unrhyw ardal o fewn terfynau pysgota Prydain gan -
- (a) leoliad porthladd cartref y cwch pysgota, nac
- (b) unrhyw rai eraill o gysylltiadau'r cwch pysgota neu ei berchennog, ag unrhyw le yn y Deyrnas Unedig.
- 2.1.20 Mae'r awdurdodau polisi pysgodfeydd yn cydnabod bod gan yr holl gychod sydd wedi'u cofrestru a'u trwyddedu yn y DU yr un hawl â'i gilydd i bysgota yn nyfroedd y DU. Ar sail hynny, mae'r amcan mynediad cyfartal yn golygu na fydd unrhyw awdurdod polisi pysgodfeydd yn rhoi unrhyw fesurau ar waith i gyfyngu ar hawl unrhyw gwch sydd wedi'i drwyddedu yn y DU i fynd i unrhyw ran o ddyfroedd y DU oherwydd porthladd cartref y cwch.
- 2.1.21 Mae gosod cyfyngiadau ar hawl cwch i bysgota yn arf allweddol i'r awdurdodau polisi pysgodfeydd, ond bydd pob cyfyngiad o'r fath yn seiliedig ar feini prawf gwrthrychol ac ar yr angen i ddiogelu stociau a'r amgylchedd morol. Yn gyfnewid am hynny, bydd cychod yn cadw at y rheolau a bennir gan awdurdod polisi pysgodfeydd y dyfroedd y maen nhw'n pysgota ynddyn nhw.
- 2.1.22 **(7)** Yr '**amcan budd cenedlaethol**' yw bod gweithgareddau pysgota cychod pysgota'r DU yn dod â buddiannau cymdeithasol neu economaidd i'r Deyrnas Unedig neu i ran ohoni.
- 2.1.23 Mae amcan y budd cenedlaethol yn golygu bod yr awdurdodau polisi pysgodfeydd yn gosod amod ar bob cwch o'r DU y byddan nhw'n ei drwyddedu i ddod â budd economaidd a/neu gymdeithasol i'r DU neu i ran ohoni.
- 2.1.24 **(8)** Yr '**amcan newid hinsawdd**' yw bod —
- (a) effeithiau andwyol gweithgareddau pysgod a dyframaethu ar y newid yn yr hinsawdd yn cael eu cadw mor fach â phosibl, a

(b) bod gweithgareddau rheoli pysgod a dyframaethu'n addasu i hinsawdd sy'n newid.

- 2.1.25 Fel gweithgaredd cymharol garbon isel, gall pysgota fel ffynhonnell fwyd wneud cyfraniad gwerthfawr at ddyfodol carbon isel. Fodd bynnag, mae'r awdurdodau polisi pysgodfeydd yn cydnabod, er mwyn gwireddu'r potensial hwn, fod yn rhaid cymryd camau i leihau a lliniaru effeithiau andwyol gweithgareddau pysgota, prosesu a dyframaethu ar yr hinsawdd fel rhan o lwybr pob gwlad at fod yn sero net. I'r perwyl hwn, byddwn i gyd yn cymryd camau i annog y sector bwyd môr i ddatgarboneiddio.
- 2.1.26 Mae'r newid yn yr hinsawdd wedi newid yr amgylchedd morol ledled y DU a bydd yn parhau i wneud hynny, gan newid cyfansoddiad rhywogaethau ecosystemau morol. Yn unol â'r amcan o ran y newid yn yr hinsawdd, bydd yr awdurdodau polisi pysgodfeydd yn helpu pysgodfeydd i addasu i'r newidiadau a'r heriau hyn. Bydd yr awdurdodau polisi pysgodfeydd yn mynd ar drywydd polisïau priodol i reoli effeithiau pysgota ar stociau bregus ac i ddiogelu, adfer a gwella cynefinoedd carbon glas gwerthfawr.

## 2.2 Cymhwyso'r Amcanion

- 2.2.1 Yn ystod oes y JFS hwn, bydd yr awdurdodau polisi pysgodfeydd yn cymryd camau breision ymlaen i leihau effeithiau pysgota ar yr amgylchedd morol ac ar iechyd ein stociau pysgod – yn enwedig o ystyried y risgiau cynyddol yn sgil y newid yn yr hinsawdd. Byddwn hefyd yn ceisio sicrhau ein bod yn cynnal ac yn gwella'r manteision economaidd a diwylliannol y mae'n pysgodfeydd yn eu rhoi.
- 2.2.2 O ystyried cymhlethdod pysgodfeydd y DU a'n hamgylchedd morol, byddwn yn parhau i reoli ein pysgodfeydd ar sail ecosystem ac yn ceisio mynd ati mewn ffordd gytbwys a chymesur i gyflawni, neu gyfrannu at gyflawni, yr amcanion ar gyfer pysgodfeydd mewn modd sy'n cyfrannu at gyflawni a chynnal statws GES.
- 2.2.3 Dylid darllen polisïau'r JFS fel pecyn, wedi'u llunio i gyflawni'r holl amcanion pysgodfeydd. Mae'r polisïau cyffredinol yn y JFS yn berthnasol i benderfyniadau rheoli o ddydd i ddydd yr awdurdodau pysgodfeydd cenedlaethol.
- 2.2.4 Mae adran 2.1 yn esbonio sut mae'r amcanion ar gyfer pysgodfeydd yn cael eu dehongli. Yn y JFS hwn rydym yn defnyddio system cod lliw rhifol i nodi pa amcanion pysgodfeydd sy'n berthnasol i ba bolisïau ac i ddangos sut yr ydym yn eu cymhwyso. Yn adran 5, rydym yn nodi sut yr ydym am ddefnyddio FMPs i gyflawni neu gyfrannu at gyflawni'r amcanion ar gyfer pysgodfeydd.
- 2.2.5 Mae'n ofynnol i awdurdodau polisi pysgodfeydd bennu polisïau ar gyfer cyflawni, neu gyfrannu at gyflawni'r holl amcanion pysgodfeydd, ac rydym









wedi'u nodi yn y JFS hwn a'r FMPs sydd wedi'u rhestru. Mae'r holl amcanion pysgodfeydd yn bwysig, ond bydd rhai polisïau'n fwy perthnasol i amcanion penodol nag i rai eraill. Mae Tabl A yn adran 2.3 yn nodi perthnasedd y polisïau i'r amcanion.

2.2.6 Wrth lunio'r polisïau yn y JFS hwn, mae'r awdurdodau polisi pysgodfeydd yn cydnabod eu bod yn gysylltiedig â'i gilydd. Er enghraifft, heb reoli ein stociau'n gynaliadwy, ni fyddai gennym ddiwydiant pysgota sy'n cynnal swyddi a chymunedau arfordirol ar gyfer y dyfodol; ni fyddai gennym gynnyrch i'w farchnata; ac ni fyddem yn gallu gwireddu ein hymrwymiad i sicrhau statws GES gyda physgod yn elfen allweddol o'r ecosystem.

2.2.7 Weithiau bydd angen rhoi blaenoriaeth i un amcan pysgodfeydd ar draul un arall yn y tymor byr. Bydd angen penderfynu ar flaenoriaethau o'r fath fesul achos, gan ystyried amgylchiadau unigol. Er enghraifft, i helpu cymuned bysgota i addasu i fesur rheoli newydd, neu i fynd i'r afael â her amgylcheddol mewn pysgodfa fel sgil-ddalfa rhywogaethau sensitif mewn ardal neu fflyd benodol. Ond wrth wneud, bydd yr awdurdod polisi pysgodfeydd yn seilio ei benderfyniadau ar dystiolaeth, gan gofio'r amcan i fod yn rhagofalus ond gan sicrhau bod mesurau rheoli yn gymesur â risg y broblem dan sylw.

## 2.3 Amcanion fesul Maes Polisi

2.3.1 Rydym wedi rhoi rhif o 1 i 8 i bob un o'r amcanion pysgodfeydd, fel y gwelwch yn yr allwedd isod. Defnyddir y rhifau hyn yn adrannau 3-5 o'r ddogfen hon i nodi pa bolisïau sy'n cyfrannu at gyflawni amcanion unigol. Ceir crynodeb yn Nhabl A isod.

Amcan	Rhif
Amcan cynaliadwyedd	
Amcan rhagofalus	
Amcan yr ecosystem	
Amcan tystiolaeth wyddonol	
Amcan o ran sgil-ddalfa	
Amcan mynediad cyfartal	
Amcan budd cenedlaethol	
Amcan newid hinsawdd	

**Tabl A: Crynodeb o'r amcanion pysgodfeydd yn ôl meysydd polisi'r hwn**

Penawdau Polisi	1	2	3	4	5	6	7	8
<b>3.2 Gwyddoniaeth a thystiolaeth</b>	Ydy	Ydy	Ydy	Ydy	Ydy	Ydy	Ydy	Ydy
<b>4.1 Sut ydym yn rheoli pysgodfeydd</b>	Ydy	Ydy	Ydy	Ydy		Ydy	Ydy	Ydy
<b>4.2 Cyflawni amcanion pysgodfeydd trwy'n polisïau</b>								
4.2.1 Cyfleoedd pysgota	Ydy	Ydy	Ydy	Ydy	Ydy		Ydy	Ydy
4.2.2 Stociau heb gwota	Ydy	Ydy	Ydy	Ydy				Ydy
4.2.3 Cysylltiadau rhyngwladol ehangach	Ydy	Ydy	Ydy	Ydy	Ydy	Ydy	Ydy	Ydy
4.2.4 Capasiti pysgota	Ydy							
4.2.5 Hawl i bysgota yn nyfroedd y DU	Ydy					Ydy	Ydy	
4.2.6 Pysgota anghyfreithlon, heb gofnod a heb ei reoleiddio	Ydy		Ydy		Ydy			
4.2.7 Lleihau'r sgil-ddalfa ac osgoi dal rhywogaethau sensitif	Ydy		Ydy	Ydy	Ydy			

4.2.8 Adleoli	Ydy		Ydy				Ydy	
4.2.9 Cynllunio Gofodol yn y Môr	Ydy		Ydy	Ydy			Ydy	
4.2.10 Ardaloedd Morol Gwarchoddedig			Ydy	Ydy				Ydy
4.2.11 Sbwriel yn y môr	Ydy		Ydy	Ydy				
4.2.12 Dyfroedd arfordirol a chroyw	Ydy		Ydy					
4.2.13 Newid hinsawdd		Ydy	Ydy	Ydy				Ydy
4.2.14 Dyframaethu	Ydy		Ydy	Ydy				Ydy
4.2.15 Pysgota hamdden yn y môr	Ydy		Ydy	Ydy				Ydy
4.2.16 Cynhyrchu, marchnata a bwyta bwyd môr	Ydy		Ydy				Ydy	Ydy
5.0 Cynlluniau Rheoli Pysgodfeydd	Ydy	Ydy	Ydy	Ydy	Ydy	Ydy	Ydy	Ydy

## 3 Rhoi'r JFS ar waith

### 3.1 Egwyddorion

- 3.1.1 Bydd yr awdurdodau pysgodfeydd cenedlaethol yn rhoi'r polisïau yn y JFS ar waith drwy arfer eu swyddogaethau ac yn unol â'r amcanion pysgodfeydd. Bydd defnyddio'r dystiolaeth a'r cyngor gwyddonol gorau sydd ar gael, gwneud

penderfyniadau tryloyw, a gweithio mewn partneriaeth, yn egwyddorion craidd wrth roi'r polisiau ar waith.

- 3.1.2 Mae'r JFS yn fframwaith tryloyw sy'n nodi blaenoriaethau traws-Lywodraethol ar gyfer dyfroedd y DU i gyflawni'r amcanion pysgodfeydd sydd yn y Ddeddf, sy'n cael eu rhoi ar waith gan yr awdurdodau polisi pysgodfeydd ac sy'n cyfrannu at ddatblygu cynaliadwy yn y DU. Mae hyn yn debyg i'r ffordd y mae [Datganiad Polisi Morol y DU \(UKMPS\)](#) yn fframwaith ar gyfer paratoi cynlluniau morol a gwneud penderfyniadau sy'n effeithio ar yr amgylchedd morol.
- 3.1.3 Bydd yr awdurdodau polisi pysgodfeydd yn rhoi sylw i'r amcanion pysgodfeydd, yn ôl y gofyn, wrth ddatblygu polisiau yn y dyfodol, a byddant yn creu polisiau eraill yn eu priod feysydd cymhwysedd i helpu i gyflawni'r amcanion.

## 3.2 Gwyddoniaeth a Thystiolaeth



- 3.2.1 Mae'n hanfodol bod gennym wyddoniaeth dda a sylfaen dystiolaeth gadarn, sy'n ennyn ymddiriedaeth a hyder, ar gyfer cyflawni'r amcanion pysgodfeydd yn y Ddeddf. Mae gan y DU y cyfle fel gwlad arfordirol i wireddu ei huchelgais i fod yn arweinydd byd ym maes gwyddoniaeth ac arloesi. Mae arbenigedd y DU, ynghyd â'i chyfoeth o brofiad o gasglu data a gwybodaeth wyddonol am yr amgylchedd morol, yn golygu y gall barhau i ddatblygu tystiolaeth wyddonol o ansawdd uchel am bysgodfeydd a dyframaeth - biolegol, technegol, economaidd a chymdeithasol.

### **Sut ydym am fynd ati**

- 3.2.2 Yn unol â'r 'amcan tystiolaeth wyddonol', yr 'amcan rhagofalus' a'r 'amcan ecosystemau', bydd y DU yn rheoli pysgodfeydd a dyframaethu ar sail tystiolaeth, gan wneud defnydd llawn o'r dystiolaeth wyddonol orau sydd ar gael, a chefnogi'r DU i barhau i ysgwyddo'i rhwymedigaethau rhyngwladol. Ategir hyn gan raglen fonitro a fframwaith cynghori eang a chydgyssylltiedig, a fydd yn cael eu gwella ymhellach gan ymchwil.
- 3.2.3 Parheir i barchu cymhwysedd datganoledig pob awdurdod polisi pysgodfeydd i ddatblygu'r sylfaen dystiolaeth hon.

### **Y Cyngor Gwyddonol Gorau sydd ar gael**

- 3.2.4 Byddwn yn sicrhau bod yr awdurdodau polisi pysgodfeydd a thu hwnt yn cydweithio i ddatblygu a chaffael cyngor gwyddonol. Byddwn yn chwilio am gyfleoedd i gydweithio â sefydliadau rhyngwladol, gan gynnwys Sefydliadau

Rheoli Pysgodfeydd Rhanbarthol (RFMOs), ynghyd â sefydliadau amgylcheddol, y diwydiannau pysgota a dyframaethu a'r sector bwyd môr ehangach.

- 3.2.5 Mae'r DU yn deall pwysigrwydd a gwerth bod yn aelod o Gyngor Rhyngwladol Archwilio'r Môr (ICES). Byddwn yn parhau i chwarae rhan lawn a gweithgar yn ICES, lle mae gwyddonwyr y DU yn gwneud cyfraniad sylweddol ar bob lefel o'i broses gynghori, gan gynnwys ar y Pwyllgorau Gwyddoniaeth a Chynghori a thrwy gymryd rhan mewn grwpiau arbenigwyr.
- 3.2.6 Bydd y DU yn manteisio'n llawn hefyd ar ei swydd fel ceisydd cyngor annibynnol ar ICES, i gryfhau'r berthynas â ICES a cheisio cyfleoedd i wella gwyddor pysgodfeydd ac ecosystemau morol yng ngogledd ddwyrain Cefnfor Iwerydd.
- 3.2.7 Gall data a gwyddor pysgodfeydd fod yn gymhleth, ac nid yw ardaloedd asesu ICES ac ardaloedd rheoli TAC wastad yn cyfateb. Mae hynny'n gofyn am waith dehongli. Nid oes gan lawer o stociau'r data sydd eu hangen i allu asesu eu MSY ac felly mae angen asesiadau eraill i benderfynu ar eu hiechyd. Er mwyn bod yn fwy tryloyw, byddwn yn gweithio gydag ICES ac eraill i'w gwneud yn haws i bawb ddeall a yw'r terfynau dalfeydd y penderfynwyd arnynt trwy drafod wedi'u pennu o fewn terfynau cynaliadwy. Byddwn hefyd yn chwilio am ffyrdd o asesu effeithiau ehangach pysgota ar rywogaethau anfasnachol a'r amgylchedd morol ehangach.
- 3.2.8 Bydd y DU yn adrodd hefyd ar gynaliadwyedd stociau drwy gyfuniad o fesuriadau trosfwaol, gan adlewyrchu statws nifer fawr o stociau gyda'i gilydd ynghyd â gwybodaeth fanylach am stociau unigol.

### **Casglu a Rhannu Data Gwyddonol**

- 3.2.9 Trwy sicrhau bod gan yr holl awdurdodau polisi pysgodfeydd raglen gydgyssylltiedig ar gyfer casglu data, byddwn yn sicrhau bod data pysgodfeydd a dyframaethu yn cael eu casglu a'u rhannu mewn ffordd gyson a bod hynny'n parhau. Mae hyn yn angenrheidiol er mwyn i'r DU allu bodloni ei hymrwymyiadau a diwallu ei hanghenion.
- 3.2.10 Gwneir hyn drwy [Gynllun Gwaith](#) fydd yn benodol i'r DU, yn unol â'r Fframwaith Pysgodfeydd.
- 3.2.11 Byddwn yn casglu ystod o ddata a gwybodaeth - gwyddonol, technegol, economaidd a chymdeithasol - o ystod eang o ffynonellau. Er enghraifft, trwy arolygon annibynnol o bysgodfeydd, gwaith samplu mewn pysgodfeydd, data am weithgarwch pysgota a data a gwybodaeth gan y diwydiant a chan arbenigeddau rhyngwladol.
- 3.2.12 Mae monitro effeithiol yn allweddol i sicrhau dyfodol cynaliadwy sy'n seiliedig ar dystiolaeth dda i'r diwydiant pysgota a'r amgylchedd morol. Lle bo angen, bydd



yr awdurdodau polisi pysgodfeydd yn ymchwilio i'r defnydd o dechnolegau fel systemau monitro cychod a Monitro Electronig o Bell (REM) at ddibenion gwyddonol ac i helpu i reoli pysgodfeydd yn gynaliadwy.

- 3.2.13 Bydd yr awdurdodau polisi pysgodfeydd yn sefydlu rhaglenni monitro a goruchwylio priodol hefyd i ni ddeall yn well effeithiau gweithgareddau pysgota ar yr amgylchedd a'n helpu i gyflawni'r amcanion pysgodfeydd a sicrhau GES.
- 3.2.14 Bydd mesurau rheoli pysgodfeydd yn cael eu monitro i ni ddeall yn well a ydyn nhw'n effeithiol er mwyn gwella'n barhaus ein proses gwneud penderfyniadau.
- 3.2.15 Bydd yr awdurdodau pysgodfeydd cenedlaethol yn ceisio ei gwneud hi mor rhwydd â phosibl i bawb allu gweld gwybodaeth wyddonol a thechnegol ei gilydd. Bydd hyn yn hwb i fonitro pysgodfeydd y DU, cyflawni'r ymrwymadau adrodd a rheoli'r stociau a rennir.
- 3.2.16 Byddwn yn sicrhau bod yr wybodaeth hon ar gael i'r cyhoedd, lle bo'n briodol, gan annog gwell cydgysylltu, a mynediad at ddata a'u rhannu i'n helpu i reoli bysgodfeydd yn well.
- 3.2.17 Byddwn yn parhau i rannu data lle bo'n briodol â gwledydd eraill, gan gynnwys helpu i drefnu gwaith monitro rhanbarthol. Byddwn yn trafod â ffora priodol, ac yn eu sefydlu lle bo angen, i hwyluso cydweithredu.

### **Gwella'r Sylfaen Dystiolaeth**

- 3.2.18 Bydd y sylfaen dystiolaeth yn cael ei chynnal a'i gwella i gefnogi'r amcanion ar gyfer pysgodfeydd. Bydd yn cynnwys tystiolaeth am gynaliadwyedd, newid hinsawdd a rheoli ar sail ecosystemau, gan wella ein dealltwriaeth gyfunol o effaith pysgota a dyframaethu ar yr amgylchedd morol. Gwneir hyn drwy dargedu gwaith ymchwil, ymchwilio i arloesedd a manteisio ar ffrwyth partneriaethau pysgodfeydd, dyframaethu a morol - megis gyda diwydiant, academia a phartneriaid rhyngwladol.
- 3.2.19 Bydd yr awdurdodau pysgodfeydd cenedlaethol yn barod i archwilio ffynonellau data gwyddonol a gwybodaeth newydd ac arloesol posibl, a dulliau o'u casglu, er mwyn casglu data o ansawdd uchel yn well a chodi safonau cyngor. Bydd dulliau presennol a newydd yn cael eu gwerthuso'n barhaus i sicrhau eu bod yn darparu data a gwybodaeth ddefnyddiol a pherthnasol, yn ogystal â bod yn gost-effeithiol.
- 3.2.20 Byddwn yn ceisio cydweithredu mewn ffyrdd newydd â'r diwydiant, gan geisio atebion i broblemau rheoli pysgodfeydd, megis monitro effeithiol, cael y gorau o arferion gwaith, offer pysgota detholus a lleihau effeithiau. Byddwn yn gweithio i wella perfformiad amgylcheddol drwy bartneriaethau arloesol, prosiectau ar y cyd neu ffora sy'n canolbwyntio ar bynciau penodol.

## 3.3 Y Broses Adrodd ac Adolygu

- 3.3.1 Bydd y JFS yn aros fel ag y mae nes y caiff ei ddiwygio neu ei ddisodli. Mae'r Ddeddf yn ei gwneud yn ofynnol i'r awdurdodau polisi pysgodfeydd adolygu'r JFS pan fyddan nhw'n credu ei bod yn briodol gwneud hynny, ac o leiaf o fewn 6 blynedd ar ôl ei gyhoeddi neu ei adolygiad diweddaraf.
- 3.3.2 Cedwir yr FMP fel ag y mae nes y caiff ei ddisodli neu ei ddirymu. Gellir ei ddiwygio hefyd. Mae'r Ddeddf yn ei gwneud yn ofynnol i'r awdurdod neu'r awdurdodau perthnasol adolygu FMP pan fernir ei bod yn briodol gwneud hynny, ac o leiaf o fewn 6 blynedd ar ôl ei gyhoeddi neu ei adolygiad diweddaraf.
- 3.3.3 Mae'r Ddeddf yn ei gwneud yn ofynnol i bob awdurdod polisi pysgodfeydd baratoi a chyhoeddi adroddiad ar y cyd, bob 3 blynedd, ar y graddau y mae'r polisïau yn y JFS wedi'u rhoi ar waith, ac wedi cyflawni neu gyfrannu at gyflawni'r amcanion ar gyfer pysgodfeydd. Rhaid i'r adroddiad hefyd ddisgrifio i ba raddau y mae'r polisïau mewn FMP perthnasol wedi'u rhoi ar waith ac wedi effeithio ar lefelau stociau pysgod môr.
- 3.3.4 Ceir rhagor o wybodaeth am y broses adrodd ac adolygu ar gyfer y JFS a'r FMPs yn y Ddeddf yn adrannau 3, 8 ac 11, a Rhan 1 a Rhan 3 o Atodlen 1.

## 3.4 Monitro

- 3.4.1 Er mwyn mesur effaith y JFS, bydd yr awdurdodau polisi pysgodfeydd, yn y lle cyntaf, yn defnyddio'r ffynonellau data presennol, yn enwedig rhai ICES, i fonitro iechyd stociau pysgod gwyllt, a'r data economaidd-gymdeithasol cynhwysfawr a gesglir ar faint a chyfansoddiad fflyd y DU. Byddwn hefyd yn defnyddio dangosyddion a rhaglenni monitro perthnasol UKMS. Bydd y data yn caniatáu mesur yn gyson effeithiau'r mesurau a gymerwyd yn y JFS ar iechyd stociau pysgod a'r fflyd bysgota.
- 3.3.5 Os yw'r dangosyddion presennol yn annigonol, bydd yr awdurdodau polisi pysgodfeydd yn datblygu dangosyddion ychwanegol ac yn comisiynu rhagor o ymchwil.

## 3.5 Gweithio mewn Partneriaeth

- 3.5.1 O ystyried natur ddatganoledig pysgodfeydd y DU a bod y DU yn rhannu nifer o stociau â gwledydd eraill, mae rheolaeth effeithiol yn dibynnu ar atebion ar lefel y DU a rhyngwladol. Felly, nid oes modd rheoli pysgodfeydd ar wahân. Rhaid i awdurdodau polisi pysgodfeydd weithio gyda'i gilydd a chyda'n rhanddeiliaid, gwledydd arfordirol eraill, a phartneriaid rhyngwladol.
- 3.3.6 Er mwyn cyflawni, neu gyfrannu at gyflawni, yr amcanion ar gyfer pysgodfeydd, mae'r awdurdodau pysgodfeydd cenedlaethol wedi ymrwymo i weithio gyda'n partneriaid, a thrafod yn eang ag ystod o randdeiliaid, sydd â rhan bwysig o ran rheoli ein moroedd a'n hadnoddau naturiol. Mae'n hanfodol alinio ac integreiddio â mecanweithiau rheoli morol ehangach, gan gynnwys â'n rhwydwaith o safleoedd gwarchoddedig, system cynllunio morol y DU, ac UKMS.

## 3.6 Gwneud Penderfyniadau Cyfranogol

- 3.6.1 Ein gweledigaeth ar gyfer y dyfodol yw y dylai'r diwydiant rannu mwy o gyfrifoldeb am reoli pysgodfeydd yn gynaliadwy, a chyfrannu fwy at y costau. Gall hyn gynnwys, er enghraifft, datblygu arferion rheoli newydd a chyfrannu at wyddoniaeth pysgodfeydd, cymryd rhan fwy gweithredol mewn penderfyniadau am reoli pysgodfeydd, a chyd-lunio polisi yn y dyfodol.
- 3.3.7 Ceir gwahanol fodelau o benderfynu cyfranogol ledled y DU, sy'n rhoi llais i'r sectorau bwyd môr a morol, sefydliadau anllywodraethol a chymunedau arfordirol yn y penderfyniadau sy'n effeithio arnynt. Mae'r awdurdodau polisi pysgodfeydd wedi ymrwymo i ddatblygu a chryfhau'r trefniadau hyn ymhellach ar gyfer cyd-reoli ein pysgodfeydd a hyrwyddo cynwysoldeb a chyfranogiad ar draws pob rhan o gymdeithas wrth eu rheoli.
- 3.3.8 Bydd yr awdurdodau polisi pysgodfeydd hefyd yn parhau i ddefnyddio grwpiau sy'n bod eisoes, lle bo'n briodol, fel rhan o drefn effeithiol a chadarn ar gyfer gwneud penderfyniadau, a bydd yn annog rhanddeiliaid i gymryd rhan yn gynnar, i nodi problemau ac atebion posibl, yn ogystal â hyrwyddo tryloywder.
- 3.3.9 Mae'r awdurdodau polisi pysgodfeydd yn cydnabod bod angen trefniadau llywodraethu cryf, clir a thryloyw, er mwyn sicrhau bod ymgysylltu priodol yn digwydd a bod penderfyniadau'n cael eu gwneud ar y lefel gywir. Bydd angen nodi hynny mewn dogfennau polisi a gweithredu perthnasol a nodi rôl grwpiau sectoraidd, cenedlaethol a lleol o ran helpu'r broses benderfynu ac i reoli ein pysgodfeydd yn effeithiol, gan barchu mai rheoleiddwyr a Gweinidogion yn y pen draw sy'n atebol.

## 4 Rheoli Pysgodfeydd yn Gynaliadwy

### 4.1 Sut ydym yn Rheoli Pysgodfeydd



- 4.1.1 Mae sector bwyd môr bywiog a llewyrchus, sy'n cynnal cymunedau arfordirol ffyniannus, yn dibynnu ar amgylchedd morol iach a chydnerth, a dylai hyn fod yn sail ar gyfer pob penderfyniad. Mae pysgodfeydd yn gwbl ddbynnol ar yr ecosystemau y maent yn gweithredu ynddynt, a gall yr ecosystemau hyn gael eu peryglu gan bwysau o du pobl, gan gynnwys llygredd, sbwriel morol, a gordefnydd anghynaliadwy ar adnoddau morol. Er enghraifft, effaith lefelau stoc ar brosesau a gweithrediad yr ecosystem - er enghraifft, difa rhywogaethau ysglyfaethus.
- 4.1.2 Felly, i sicrhau pysgodfeydd cynaliadwy a phroffidiol hirdymor, rhaid eu rheoli i gadw effeithiau andwyol gweithgarwch pysgota ar weithrediad ecosystemau, a/neu gallu ecosystemau morol i ddelio â bygythiadau amgylcheddol fel y newid yn yr hinsawdd, mor fach â phosibl. Mae hyn hefyd yn cydnabod y rhwymedigaeth yn UKMS<sup>5</sup> i gyrraedd statws GES. Mae'r JFS yn bwysig o ran cyrraedd statws GES a chyflawni'r UKMS ar gyfer rhywogaethau pysgod sydd wedi'u targedu'n fasnachol a'r rhai sydd heb eu targedu, yn ogystal â chefnogi'r gwaith ar lu o dargedau eraill gan gynnwys morfilod, morloi, adar, gweoedd bwyd, cynefinoedd benthig, a sbwriel môr. Yn ei dro, cydnabyddir y bydd mesurau a gymerir i gyrraedd neu gadw statws GES o ran halogyddion mewn bwyd môr, halogyddion mwy cyffredinol, ac ewtroffigedd hefyd yn sail ar gyfer stociau pysgod iach.
- 4.1.3 Felly, mae'r defnydd cynaliadwy o gyfalaf naturiol y môr a'i ddiogelu ar gyfer cenedlaethau'r dyfodol, yn ganolog i'r ffordd rydym yn rheoli pysgodfeydd.
- 4.1.4 Gellir meddwl am reoli pysgodfeydd fel proses gylchol. Rydym yn gwneud gwaith ymchwil ac yn casglu data i ddeall yn well beth yw cyflwr stociau, perthynas pysgodfeydd â'r amgylchedd morol, a'r sector bwyd môr ei hun. Rydym yn cytuno ar gyfleoedd pysgota ac yn eu dyrannu; yn defnyddio mesurau i reoli cyfran y boblogaeth pysgod a leddir trwy bysgota (*marwoldeb pysgota*), lleihau effeithiau amgylcheddol, a gwella cynaliadwyedd y gadwyn gyflenwi; asesu effeithiolrwydd y mesurau rheoli; a defnyddio'r data hyn i wella ein gwyddoniaeth a'n sylfaen dystiolaeth, sydd wedyn yn llywio sut ydym yn

---

<sup>5</sup> [Marine Strategy Part One: UK updated assessment and Good Environmental Status \(publishing.service.gov.uk\)](https://publishing.service.gov.uk)

pennu cyfleoedd pysgota ac yn datblygu mesurau rheoli. Mae hyn yn cynnwys diogelu bioamrywiaeth ac ecosystemau morol iach.

- 4.1.5 Cydnabyddir hefyd rôl hollbwysig y sector bwyd môr o ran darparu bwyd a chyflogaeth, yn ogystal â'i werth diwylliannol sylweddol. Dylai penderfyniadau gan yr awdurdodau polisi pysgodfeydd ar reoli pysgodfeydd ystyried hyn yn unol â'r 'amcan cynaliadwyedd a'r 'amcan budd cenedlaethol' er mwyn sicrhau bod ei rôl yn cael parhau, ac i ddiogelu buddiannau hirdymor y sector a lles y cymunedau y mae'n eu cynnal.
- 4.1.6 Bydd yr awdurdodau polisi pysgodfeydd yn cymhwyso'r amcanion pysgodfeydd i'n gwaith domestig a rhyngwladol. Gartref, gwneir hynny wrth benderfynu sut i ddyrannu cyfleoedd pysgota ac wrth ddatblygu polisiau a mesurau rheoli pysgodfeydd yn y dyfodol. Yn ei thrafodaethau am bysgodfeydd gyda gwledydd arfordirol eraill ac mewn ffora pysgodfeydd rhyngwladol, bydd y DU yn ceisio cyflawni neu gyfrannu at gyflawni'r amcanion ar gyfer pysgodfeydd sydd yn y Ddeddf.
- 4.1.7 Bydd yr awdurdodau polisi pysgodfeydd ac awdurdodau pysgodfeydd cenedlaethol<sup>6</sup> yn rheoli ein pysgodfeydd ar sail ecosystemau<sup>7</sup>. Byddan nhw'n dal i ystyried yr angen am ecosystemau morol iach wrth iddyn nhw arfer eu swyddogaethau ac yn ystyried effeithiau pysgota a gweithgareddau dynol eraill ar yr amgylchedd morol. Bydd hyn yn ein helpu i gyflawni'r amcanion cynaliadwyedd, rhagofalus ac ecosystemau, yn ogystal â chyfrannu at y GES. Bydd yn cynnwys mesurau i reoli rhywogaethau targed yn gynaliadwy, diogelu rhywogaethau prae allweddol fel llymriod (GES: gweoedd bwyd), cynefinoedd hanfodol i bysgod h.y. ardaloedd silio pwysig, a rhywogaethau sensitif (GES: bioamrywiaeth), osgoi crafu gwely'r môr wrth bysgota (GES: integriti gwely'r môr) a rheoli sbwriel sy'n gysylltiedig â physgota (GES: sbwriel môr). Mae mesurau o'r fath yn cydnabod bod stociau iach ac amgylchedd iach yn dibynnu ar ei gilydd ac yn cefnogi diwydiant pysgota ffyniannus i'r dyfodol.
- 4.1.8 Bydd yr awdurdodau polisi pysgodfeydd yn gweithredu hefyd mewn ffordd ragofalus wrth reoli pysgodfeydd<sup>8</sup> yn unol â'r amcan rhagofalus, ac yn ceisio

---

<sup>6</sup> Yr awdurdodau pysgodfeydd cenedlaethol yw a) yr Ysgrifennydd Gwladol, b) y Sefydliad Rheoli Morol, c) Gweinidogion yr Alban, d) Gweinidogion Cymru, ac e) adran Gogledd Iwerddon (Deddf Pysgodfeydd 2020)

<sup>7</sup> Yn Neddf Pysgodfeydd 2000, diffinnir rheoli ar sail ecosystem fel a ganlyn: "an approach which— (a) ensures that the collective pressure of human activities is kept within levels compatible with the achievement of good environmental status (within the meaning of the Marine Strategy Regulations 2010 (S.I. 2010/1627)), and

(b) does not compromise the capacity of marine ecosystems to respond to human-induced changes"

<sup>8</sup> Yn Neddf Pysgodfeydd 2000, diffinnir rheoli pysgodfeydd mewn ffordd ragofalus fel a ganlyn "an approach in which the absence of sufficient scientific information is not used to justify postponing or failing to take

pysgota o fewn terfynau cynaliadwy yn ôl y cyngor gwyddonol gorau sydd ar gael, gan gynnwys yr MSY neu ddefnyddio procsi priodol os oes digon o ddata gwyddonol. Lle nad oes data, ni chaiff hyn ei ddefnyddio fel rheswm dros beidio â chymryd camau rhagofalus priodol i reoli neu i ddelio â'r risg i stociau a/neu'r amgylchedd morol. Bydd awdurdodau polisi pysgodfeydd yn ceisio lliniaru canlyniadau negyddol i'r amgylchedd, gan roi sylw i anghenion cymunedau pysgota fel sy'n ofynnol o dan yr amcan cynaliadwyedd a'r amcan budd cenedlaethol.

- 4.1.9 Bydd yr awdurdodau polisi pysgodfeydd yn parhau i weithio gyda'r diwydiant pysgota a rhanddeiliaid eraill ar draws ystod eang o bynciau megis cyflwyno mesurau rheoli ychwanegol gan gynnwys, ymhlith pethau eraill, mesurau i ddiogelu ardaloedd silio a meithrin stociau pwysig, lleihau dalfeydd ofer, neu ddefnyddio REM. Bydd y cydweithio hwn yn ffordd i bysgotwyr ddangos eu bod yn gweithredu mewn modd cynaliadwy a chyfrifol. Bydd symud at ddull mwy cydweithredol o reoli pysgodfeydd, fel y nodir yn adran 3 uchod, yn galluogi'r sector pysgota i gyfrannu ei wybodaeth am weithgareddau ac effeithiau i helpu i gyd-lunio camau rheoli. Wrth weithio fel hyn, gall yr awdurdodau polisi pysgodfeydd a'r diwydiant pysgota weithio gyda'i gilydd i gyfrannu at gyflawni'r amcanion ar gyfer pysgodfeydd.
- 4.1.10 Bydd yr awdurdodau polisi pysgodfeydd yn sicrhau nad yw ein cymorth ariannol yn tansilio ond yn cyflawni neu'n cyfrannu at yr amcanion pysgodfeydd.
- 4.1.11 Bydd ein FMPs yn nodi polisiau ar gyfer pysgodfeydd neu stociau penodol i gyfrannu at gyflawni'r amcanion ar gyfer pysgodfeydd (adran 5). Rhaid i bob FMP ddisgrifio'r dangosydd neu ddangosyddion perthnasol y bydd rheolwyr pysgodfeydd yn eu defnyddio i asesu effeithiolrwydd y cynllun. Lle medrir, y dangosydd fydd y gwerthoedd MSY (os oes modd eu nodi), fel arall defnyddir procsi addas ar gyfer stociau y ceir llai o ddata amdanynt. Lle bo hynny'n ymarferol, bydd yr FMP yn cynnwys cynlluniau ar gyfer casglu data ychwanegol er mwyn pennu gwerthoedd MSY neu bydd yn esbonio pam na chynigir unrhyw gynlluniau o'r fath.
- 4.1.12 Mae'r awdurdodau polisi pysgodfeydd yn deall bod angen cymryd camau cadarn i fynd i'r afael â'r newid yn yr hinsawdd. Mae'r cynnydd yn lefelau carbon deuocsid a'r newid yn yr hinsawdd<sup>9</sup> yn effeithio ar ecosystemau morol, gan gynhesu moroedd, gostwng lefelau ocsigen, asideiddio cefnforoedd, a chodi lefelau'r môr. Ar y llaw arall, mae'r ecosystemau morol yn rhoi cyfleoedd i'n

---

management measures to conserve target species, associated or dependent species, non-target species or their environment”.

<sup>9</sup> MCCIP (2020) Marine Climate Change Impacts: Marine Climate Change Impacts Report Card 2020

helpu i addasu i dymheredd uwch, ac i gloi a storio carbon glas. Mae ecosystemau sy'n gallu gwrthsefyll yr hinsawdd yn hanfodol ar gyfer stociau iach a rhaid ystyried hyn wrth reoli ein moroedd. Yn unol â'r amcan newid yn yr hinsawdd yn y Ddeddf, nod yr awdurdodau polisi pysgodfeydd yw lleihau effeithiau andwyol gweithgareddau pysgota a dyframaethu ar y newid yn yr hinsawdd. Bydd yr awdurdodau polisi pysgodfeydd ar y cyd â phartneriaid yn y diwydiant pysgota, yn chwilio am y llwybrau gorau i gyfrannu at dargedau carbon sero net o fewn yr amserlenni a bennir gan bob awdurdod polisi pysgodfeydd, gan gynnwys drwy ymchwilio i allyriadau cychod pysgota ac allyriadau'r gadwyn gyflenwi a'u lleihau (adran 4.2.12).

## 4.2 Cyflawni'r Amcanion Pysgodfeydd trwy'n Polisïau

### 4.2.1 Cyfleoedd Pysgota



Mae'r adran hon yn nodi sut y caiff cyfleoedd pysgota eu pennu, eu dosrannu a'u dyrannu, a sut y caiff yr amcanion pysgodfeydd eu hystyried ym mhob cam.

#### **Sut mae cyfleoedd pysgota'n cael eu pennu**

- 4.2.1.1 Yr Ysgrifennydd Gwladol sy'n pennu uchafswm y pysgod y caiff fflyd bysgota Prydain ei ddal (cwota dal) a'r nifer mwyaf o ddiwrnodau y caiff fflyd bysgota Prydain ei dreulio ar y môr (cwota ymdrech), hynny ar ôl ymgynghori â Gweinidogion yr Alban, Gweinidogion Cymru, adran Gogledd Iwerddon a'r MMO. Disgrifir cwotâu dal a chwotâu ymdrech, gyda'i gilydd, fel y cyfleoedd pysgota.
- 4.2.1.2 Bydd y penderfyniad hwn fel arfer yn cael ei wneud yn flynyddol a bydd yn pennu'r cyfleoedd pysgota ar gyfer y flwyddyn bysgota honno.
- 4.2.1.3 Mae'r rhan fwyaf o stociau pysgod yn rhychwantu dyfroedd y DU a dyfroedd gwledydd cyffiniol. O'r herwydd, bydd y cyfleoedd pysgota a bennir ar gyfer y stociau hyn fel arfer yn dilyn trafodaethau rhyngwladol ac yn adlewyrchu'r cytundebau a geir yn sgil y trafodaethau hynny. Cynhelir y trafodaethau hyn gan Lywodraeth y DU gyda chymorth arbenigwyr o bob rhan o'r awdurdodau polisi pysgodfeydd.
- 4.2.1.4 O dan rai amgylchiadau, gellir penderfynu ar gyfleoedd pysgota dros dro. Er enghraifft, os nad yw'r trafodaethau rhyngwladol wedi dod i fwcwl erbyn dechrau'r flwyddyn bysgota.
- 4.2.1.5 Ar gyfer stociau a geir yn nyfroedd y DU yn unig ac nad ydynt yn destun cytundeb â gwledydd eraill, y DU yn unig fydd yn pennu'r cyfleoedd pysgota.

- 4.2.1.6 Ar ôl i'r Ysgrifennydd Gwladol bennu'r cyfleoedd pysgota, bydd yn eu dosrannu rhwng yr awdurdodau polisi pysgodfeydd. Mater i bob awdurdod wedyn yw penderfynu sut i ddyrannu ei gyfran i'r diwydiant.
- 4.2.1.7 Gall yr awdurdod polisi pysgodfeydd ac unrhyw sefydliad sy'n cael gwneud hynny gan yr awdurdod polisi pysgodfeydd dan sylw, reoli a chyfnewid cyfleoedd pysgota yn ystod y flwyddyn bysgota.
- 4.2.1.8 Mae awdurdodau polisi pysgodfeydd yn cydnabod bod cael rheoli gweithgarwch pysgota yn bwysig er mwyn gallu ymateb i newidiadau naturiol, caniatáu ar gyfer natur ddeinamig ecosystemau morol ac er mwyn gallu gwrthsefyll pwysau pysgota, amrywiadau naturiol a'r newid yn yr hinsawdd. Ein nod felly yw cytuno a phennu cyfleoedd pysgota fydd yn caniatáu i ni weithio'n barhaus at adfer a chynnal yr holl stociau masnachol, boed â chwota neu hebdo, uwchlaw lefelau biomas sy'n cynhyrchu'n gynaliadwy yn y tymor hir.
- 4.2.1.9 Rydym yn cydnabod, er mwyn cadw'r ddysgl yn wastad rhwng ein hymrwymadau amgylcheddol, economaidd a chymdeithasol, y gallai fod angen i'r llwybrau (tuag at sicrhau'r lefelau biomas hyn) gyflymu neu arafu, a bydd sicrhau'r cydbwysedd hwnnw rhwng y tair elfen hon yn elfen ganolog o'r amcan cynaliadwyedd. Dylid bod yn ymwybodol wrth wneud y penderfyniadau hyn o'r effaith ar gymunedau arfordirol a pheidio â pheryglu adferiad hirdymor stociau neu ddarparu amgylchedd morol iach.

### **Pennu cyfleoedd pysgota drwy drafodaethau rhyngwladol**

- 4.2.1.10 Fel gwlad ag iddi arfordir, mae'r DU yn gorfod cadw at ofynion UNCLOS, sy'n ymrwymo gwledydd arfordirol i reoli'r adnoddau byw yn eu Parth Economaidd Neilltuedig (EEZ) mewn modd cynaliadwy. Mae hyn yn cynnwys cydweithio â gwledydd arfordirol eraill ar stociau pysgod sy'n rhychwantu'u EEZs.
- 4.2.1.11 Mae'n hanfodol ein bod yn gweithio mewn partneriaeth â'n cymdogion arfordirol er mwyn hyrwyddo'r defnydd cynaliadwy o stociau a rheolaeth gyfrifol o'n dyfroedd.
- 4.2.1.12 Gwnawn hyn yn bennaf drwy ymgynghoriadau blynyddol ffurfiol a chytundebau rhyngwladol, megis y TCA a'n cytundebau fframwaith pysgodfeydd gyda Norwy ac Ynysoedd Ffaro, ac o ran stociau pysgod mudol iawn a stociau sy'n rhychwantu, drwy drafodaethau â gwledydd arfordirol neu wledydd perthnasol eraill, ac yn yr RFMOs perthnasol.
- 4.2.1.13 Bydd y DU yn cynnal ei thrafodaethau ynghylch pysgodfeydd rhyngwladol yn unol â'r egwyddorion canlynol.

### **Egwyddorion Trafodaethau Rhyngwladol ynghylch Pysgodfeydd**

Drwy drafodaethau pysgodfeydd, bydd y DU yn ceisio cyflawni neu gyfrannu at gyflawni'r amcanion pysgodfeydd yn y Ddeddf. Yn benodol, bydd y DU yn ceisio:



- cynyddu cyfanswm nifer y stociau sy'n cael eu pysgota at lefel y MSY neu brocsi addas, yn unol â'r cyngor gwyddonol gorau sydd ar gael;
- sicrhau bod stociau'n cael eu pysgota'n gynaliadwy drwy sefydlu trefn gynhwysfawr ar gyfer rhannu cwota (TAC) yn seiliedig ar egwyddor y parth;
- sicrhau canlyniadau sy'n gyson â rhwymedigaethau ehangach ar gyfer defnydd cynaliadwy o'r amgylchedd morol gan gynnwys UKMS, ac ymrwymïadau rhyngwladol fel y Confensiwn ar Amrywiaeth Biolegol, Confensiwn OSPAR, a Nodau Datblygu Cynaliadwy'r Cenhedloedd Unedig;
- lleihau effeithiau negyddol pysgota ar rywogaethau nad ydynt yn dargedau, cynefinoedd morol ac ecosystemau drwy reoli ar sail ecosystem;
- rheoli'r gwaith o gynaeafu stociau a rennir yn gynaliadwy gan gynnwys stociau sydd heb gwota;
- cefnogi'r gwaith o roi'r polisiâu sydd wedi'u cynnwys mewn FMPs a Chynlluniau Rheoli Hirdymor ar waith;
- lleihau neu ddileu'r arfer niweidiol ac anhyfreithlon o daflu pysgod yn ôl i'r môr, a mynd i'r afael â'r risg o ddal pysgod nad oes eu hangen ('choke risk'), gan gynnwys drwy helpu i adfer stociau;
- sicrhau bod mentrau adfer stociau yn rhoi ystyriaeth briodol i ffactorau economaidd-gymdeithasol;
- rhoi sicrwydd a chanlyniadau proffidiol i'r diwydiant.

4.2.1.14 Mae pennu'r TAC (Cyfanswm y Ddalfa a Ganiateir) yn rhan allweddol o'r trafodaethau rhwng gwledydd arfordirol. Rhaid wrth y TAC, a chytundebau ar sut i rannu cwota, i sicrhau bod gwledydd arfordirol yn cadw o fewn terfynau dal.

4.2.1.15 Mae'r DU yn negodi TACs ar gyfer tua 70 o stociau gyda'r UE bob blwyddyn. Mae'r TACs y cytunir arnynt yn cael eu rhannu rhwng y DU a'r UE fel a nodir yn y TCA. Datblygir barn am gyfleoedd pysgota fel sail i'r trafod â'r UE drwy ymgynghori â'r awdurdodau polisi pysgodfeydd.

4.2.1.16 Mae'r TCA yn cydnabod bod gan y DU reolaeth sofran ar ei dyfroedd ers 1 Ionawr 2021. Mae cyfnod pontio o bum mlynedd a hanner o'r pwynt hwnnw i ganiatáu amser i bysgotwyr y ddwy ochr gynefino â'r trefniadau mynediad newydd. Yn ystod y cyfnod hwn, bydd gan bob parti yr hawl o hyd i fynd i'w dyfroedd ei gilydd ar lefelau sy'n cyfateb i'w gyfran o gyfleoedd pysgota ar gyfer bron pob stoc ac, ar gyfer stociau sydd heb gwota, ar sail lefelau hanesyddol. Fel

y nodir yn y TCA, ar ddiwedd y cyfnod pontio, bydd mynediad a chyfleoedd pysgota yn cael eu trafod bob blwyddyn.

- 4.2.1.17 Cynhelir trafodaethau rhwng y DU, yr UE a Norwy bob blwyddyn i bennu TACs ar gyfer stociau a reolir ar y cyd ym Môr y Gogledd. Pennir cyfleoedd pysgota pob parti gan y TACs a chytunir ar y cyfrannau fel rhan o'r trafodaethau hynny.
- 4.2.1.18 Rheolir stociau pelagig sydd â gwasgariad eang - yn arbennig, mecryll, swtanod glas a sgadan (penwaig) Iwerydd-Sgandinafia - ar y cyd drwy drafodaethau rhwng y DU a nifer o wledydd eraill yng ngogledd ddwyrain cefnfor Iwerydd. Yn ystod trafodaethau blynyddol, nod y partïon yw cytuno ar TAC pob stoc yn ogystal â mesurau rheoli eraill a threfniadau rhannu. Mae'r DU yn argymhell rheoli'r stociau hyn ar sail gwyddoniaeth a thystiolaeth a bydd yn parhau i wneud hynny wrth geisio cytundeb ar drefniadau rhannu cynhwysfawr.
- 4.2.1.19 Mae'r DU o'r farn bod gwybodaeth am wasgariad stociau pysgod yn hanfodol i allu pennu TAC a chyfran gwlad o stoc benodol, boed trwy drafodaethau dwyochrog, tairochrog neu amlochrog. Dylai'r wybodaeth hon hefyd fod yn sail i sut y dylid dosrannu dalfa pob stoc ar draws ardaloedd rheoli'r TAC.
- 4.2.1.20 Yn ei thrafodaethau blynyddol gydag Ynysoedd Ffaro a Norwy, bydd y DU yn anelu at ddod i gytundebau sy'n pennu cyfleoedd yn deg a chytbwys, drwy gyfnewid cwota a mynediad; a sicrhau'r fargen orau i fflyd y DU.
- 4.2.1.21 Fel arfer, rheolir pysgodfeydd mewn dyfroedd rhyngwladol (neu'r 'moroedd mawr' fel y'u gelwir) a stociau pysgod mudol iawn a physgod sy'n 'rhychwantu', gan Sefydliadau Rheoli Pysgodfeydd Rhanbarthol (RFMOs). Mae'r DU yn barti contractio annibynnol ar nifer o RFMOs, gan gynnwys Comisiwn Pysgodfeydd Gogledd-ddwyrain Cefnfor Iwerydd (NEAFC) a'r Comisiwn Rhyngwladol dros Warchod Tiwna Iwerydd (ICCAT). Bydd angen i safiad y DU yn nhrafodaethau'r RFMO gael ei lywio gan ein hamcanion domestig a rhyngwladol, gan gynnwys yr amcanion ar gyfer pysgodfeydd lle bo hynny'n berthnasol.
- 4.2.1.22 Yn ogystal â'r RFMOs, mae'r DU hefyd yn rhan o [Gytundeb Paris ar Spitsbergen](#) (Svalbard) 1920, sy'n cynnig cyfleoedd pysgota mewn dyfroedd y tu allan i EEZ y DU.

### **Pennu cyfleoedd pysgota ar gyfer stociau'r DU yn unig**

- 4.2.1.23 Byddwn yn ymdrin â'r stociau hynny yr ydym yn llwyr gyfrifol amdanynt yn yr un ffordd, gan ystyried yr amcanion ar gyfer pysgodfeydd a chan defnyddio'r wyddoniaeth a'r dystiolaeth orau sydd ar gael i benderfynu ar ein barn o ran cwotâu a rhywogaethau heb gwota. Y prif wahaniaeth yw nad oes gofyn trafod y farn honno, ac felly lle rheolir y stoc gan gwota, gallwn wneud hynny ein hunain drwy broses benderfynu'r Ysgrifennydd Gwladol (fel a ddisgrifir uchod). Byddwn

yn rhagofalus yn hyn o beth, gan ddefnyddio'r dystiolaeth a'r cyngor gwyddonol gorau sydd ar gael ar gyfer stociau sy'n bodoli yn nyfroedd y DU yn unig.

### **Cyfleoedd dosrannu ar draws y DU**

4.2.1.24 Nodir sut y caiff cyfleoedd pysgota eu dosrannu rhwng yr awdurdodau polisi pysgodfeydd yn Rheolau Rheoli Cwota'r DU (QMR) sydd ar gael i'r cyhoedd.

4.2.1.25 Gall y rheolau hyn ymdrin ag agweddau eraill ar reoli cyfleoedd pysgota rhwng awdurdodau polisi pysgodfeydd. Er enghraifft, sut y byddwn yn rheoli:

- Stociau nad ydynt wedi cael eu dosrannu;
- Cyfnewid cyfleoedd yn rhyngwladol ac yn ddomestig yn ystod y flwyddyn;
- Trosglwyddo cyfleoedd rhwng blynyddoedd (bancio a benthyca);
- Pysgota heb ganiatâd a chosbau;
- Symudiadau cychod rhwng awdurdodau polisi pysgodfeydd.

Bydd yr Ysgrifennydd Gwladol yn diweddarau'r rheolau hyn o bryd i'w gilydd ar ôl ymgynghori â'r awdurdodau pysgodfeydd eraill. Lle bo'n briodol, gall ymgynghori hefyd â'r diwydiant ac â rhanddeiliaid eraill yn ogystal ag â'r cyhoedd.

### **Dyrannu cyfleoedd pysgota o fewn pob awdurdod polisi pysgodfeydd**

4.2.1.26 Ar ôl dosrannu, mater i'r awdurdod pysgodfeydd cenedlaethol wedyn yw penderfynu sut i ddyrannu ei gyfran i'r diwydiant. Nodir y meini prawf a'r dulliau a ddefnyddir gan bob awdurdod yn ei QMR sydd ar gael i'r cyhoedd.

4.2.1.27 Bydd yr awdurdod polisi pysgodfeydd perthnasol yn diweddarau'r rheolau hyn o bryd i'w gilydd. Lle bo'n briodol, gall ymgynghori â'r awdurdodau pysgodfeydd cenedlaethol eraill, y diwydiant a rhanddeiliaid eraill yn ogystal â'r cyhoedd.

4.2.1.28 Yn unol ag adran 25(1) a (2) o'r Ddeddf, bydd pob awdurdod pysgodfeydd cenedlaethol yn cyhoeddi ac yn defnyddio meini prawf tryloyw a gwrthrychol i ddyrannu cyfleoedd pysgota. Ystyrir yr amcanion pysgodfeydd a ffactorau amgylcheddol, cymdeithasol ac economaidd, yn benodol:

- Effaith pysgota ar yr amgylchedd;
- Hanes cydymffurfio â gofynion y rheoliadau pysgota;
- Cyfraniad pysgota i'r economi leol;

- Lefelau dal hanesyddol.

4.2.1.29 Bydd yr awdurdodau pysgodfeydd cenedlaethol hefyd yn ceisio cymell:

- defnyddio offer pysgota mwy detholus, a
- defnyddio technegau pysgota a chychod sy'n cael llai o effaith ar yr amgylchedd (er enghraifft, yn defnyddio llai o ynni, neu'n achosi llai o ddifrod i gynefinoedd).

## 4.2.2 Stociau heb Gwota

4.2.2.1 Yn ogystal â'r cyfleoedd pysgota hynny yr ydym yn eu rheoli drwy gwota a dyraniadau, gallwn reoli stociau heb gwota hefyd, drwy osod terfynau, cau pysgodfeydd a mesurau technegol. Rydym yn rheoli llawer o'r stociau hyn ar y cyd â'r UE. Bydd y DU yn rhoi blaenoriaeth i ddatblygu ei dull ei hunan o'u rheoli, a bydd yn ceisio datblygu strategaethau aml-flwydd ar gyfer gwarchod a rheoli stociau heb gwota drwy'r SCF. Bydd cyfnewid data rheoli pysgodfeydd yn helpu'r DU a'r UE i ddeall yn well y stociau y maen nhw'n eu rhannu ac i lunio strategaethau rheoli.

4.2.2.2 Bydd y drefn a ddefnyddir gan y DU i reoli stociau heb gwota yn nyfroedd y DU yn llywio ein safiad wrth negodi strategaethau aml-flwydd ar gyfer eu gwarchod a'u rheoli yn y dyfodol.

4.2.2.3 Ar gyfer stociau heb gwota nad ydynt yn destun trafod rhyngwladol, bydd yr awdurdodau polisi pysgodfeydd yn defnyddio'r drefn rheoli pysgodfeydd a ddisgrifir yn adran 4.1 ac yn unigol neu gyda'i gilydd, byddan nhw'n rhoi mesurau priodol ar waith i reoli gweithgarwch pysgota stociau heb gwota yn well. Bydd hyn yn cynnwys ystyried sut i gynaeafu'r stociau hyn yn gynaliadwy, gan ddefnyddio'r dystiolaeth orau sydd ar gael a bod yn rhagofalus lle bo'n briodol. Gellir nodi mesurau ar gyfer stociau penodol heb gwota mewn FMPs neu baratoi dogfennau polisi amgen ar eu cyfer, fel bo'n briodol.

## 4.2.3 Cysylltiadau Rhyngwladol Ehangach



4.2.3.1 Yn ogystal â'i gweithgareddau yn yr RFMOs, a ddisgrifir ym mharagraff 4.2.1. 21 uchod, mae'r DU yn cymryd rhan amlwg mewn trafodaethau a chyfarfodydd ynghylch rheoli pysgodfeydd yn gynaliadwy yn y Cenhedloedd Unedig, yn Sefydliad Bwyd ac Amaeth y Cenhedloedd Unedig ac yn y Sefydliad ar gyfer Cydweithrediad a Datblygiad Economaidd.

4.2.3.2 Fel gwlad arfordirol gyfrifol ac arweinydd ym maes pysgodfeydd cynaliadwy, bydd y DU yn cymryd rhan amlwg yn y ffora rhyngwladol hyn i rannu arfer gorau

â'r byd a phwyso am reolaeth effeithiol ar weithgareddau pysgota ar y môr mawr. Bydd yr awdurdodau polisi pysgodfeydd yn ei helpu â'i chysylltiadau â'r ffora rhyngwladol hyn lle byddwn yn hyrwyddo rheoli pysgodfeydd at safonau uchel. Wrth wneud, byddwn yn hyrwyddo, lle bo'n briodol, egwyddorion ein hamcanion ar gyfer pysgodfeydd. Er enghraifft, hyrwyddo'r defnydd cynaliadwy o stociau a'u gwarchod, a hwyluso cydweithredu rhyngwladol i fynd i'r afael â'r newid yn yr hinsawdd, i helpu i gyflawni'r amcanion rhagofalus, cynaliadwyedd a newid hinsawdd. Lle medrir, bydd cytundebau o'r fath hefyd yn helpu i gyflawni'r amcan budd cenedlaethol drwy ddod â manteision economaidd-gymdeithasol uniongyrchol neu anuniongyrchol i'r DU.

- 4.2.3.3 Mae'r DU wedi llofnodi Memoranda Cyd-ddealltwriaeth â Gwlad yr Iâ ac â'r Ynys Las i gydweithredu'n well mewn pysgodfeydd. Er enghraifft, trwy rannu arbenigeddau mewn rheoli pysgodfeydd yn gynaliadwy; annog cydweithio rhwng ein sectorau preifat; a chydweithredu mewn ymchwil wyddonol. Mae'r cytundebau hyn yn enghreifftiau o sut y bydd y DU yn cyflawni'r amcanion ar gyfer pysgodfeydd ac yn gweithredu fel gwlad arfordirol gyfrifol, a chaiff egwyddorion tebyg eu hymgorffori mewn Memoranda Dealltwriaeth yn y dyfodol.

#### 4.2.4 **Capasiti Pysgota**

- 4.2.4.1 Wrth gyflawni'r amcan cynaliadwyedd, bydd yr awdurdodau pysgodfeydd cenedlaethol yn sicrhau bod capasiti pysgota eu fflyd yn cadw'r ddysgl yn wastad rhwng cynnal hyfywedd economaidd a chynnal iechyd stoc. Bydd rhagdybiaeth yn erbyn neilltuo cyllid cyhoeddus ar gyfer cychod pysgota newydd lle bydd hynny'n cynyddu capasiti pysgota y tu hwnt i lefelau cynaliadwy.

#### 4.2.5 **Hawl i bysgota yn nyfroedd y DU**

- 4.2.5.1 O ran hawl cychod pysgota'r DU i fynd i ddyfroedd y DU, mae'r Ddeddf yn cynnwys 'amcan mynediad cyfartal' i'w gymhwyso i bob polisi pysgodfeydd yn y dyfodol ledled y DU. Mae'r amcan hwn yn nodi na ddylai bod cyfyngiadau ar hawl cwch pysgota o'r DU i fynd i unrhyw ardal o fewn terfynau pysgodfeydd Prydain oherwydd lleoliad porthladd cartref y cwch pysgota neu gysylltiadau'r cwch pysgota neu ei berchnogion ag unrhyw le yn y Deyrnas Unedig.
- 4.2.5.2 Bydd y DU yn parhau i barchu trefniadau Voisinage o ran hawliau cychod i fynd i'w therfyn 0-6 milltir forol. Bydd gofyn i gychod o'r tu allan i'r DU sy'n manteisio ar y trefniadau hynny gydymffurfio â deddfwriaeth pysgodfeydd a mesurau rheoli sy'n berthnasol i gychod o'r DU sy'n pysgota yn yr ardal honno.

#### 4.2.6 **Pysgota Anghyfreithlon, heb ei Gofnodi a heb ei Reoleiddio**



- 4.2.6.1 Bydd yr awdurdodau polisi pysgodfeydd yn gweithio gyda'i gilydd i gefnogi ymrwymiad y DU i bysgota cynaliadwy a'i chyfraniad yn y frwydr fyd-eang yn erbyn pysgota anghyfreithlon, heb gofnod a heb ei reoleiddio. Bydd yr

awdurdodau pysgodfeydd cenedlaethol yn mynnu gorfodaeth lem yn erbyn pysgota o'r fath.

4.2.6.2 Bydd yr awdurdodau polisi pysgodfeydd yn gweithio gyda'i gilydd i lunio strategaeth ar lefel y DU yn 2022 i ddelio â physgota o'r fath.

4.2.6.3 Bydd yr awdurdodau pysgodfeydd cenedlaethol yn cydweithredu i reoli Rhestr y DU o Gychod sy'n Pysgota'n Anghyfreithlon, heb Gofnod a heb eu Rheoleiddio a Rhestr y DU o Wledydd nad ydynt yn cydweithredu yn y frwydr yn erbyn pysgota o'r fath.

## 4.2.7 Lleihau Sgil-ddalfeydd ac Osgoi Dal Rhywogaethau Sensitif



- 4.2.7.1 Mae'r awdurdodau polisi pysgodfeydd wedi ymrwymo i'r egwyddor o leihau'r sgil-ddalfa, gan gynnwys pysgod sy'n llai na'r maint cyfeirio cadwraethol lleiaf, ac i daflu llai o bysgod yn ôl i'r môr. Bydd yr awdurdodau polisi pysgodfeydd yn gweithio mewn partneriaeth â rhanddeiliaid i ddatblygu ystod o fesurau rheoli i helpu pysgotwyr i osgoi rhywogaethau cwota nad ydyn nhw am eu dal er mwyn lleihau cyfran y boblogaeth pysgod a leddir heb eisiau trwy bysgota ac a deflir yn ôl i'r môr. Bydd yr awdurdodau polisi pysgodfeydd yn sicrhau bod y dalfeydd hyn yn cael eu cofnodi a'u cyfrif ac yn datblygu polisiâu dal penodol yn unol ag anghenion amgylchedd morol a diwydiant y DU. Bydd yr awdurdodau polisi pysgodfeydd hefyd yn esbonio yn eu polisiâu cenedlaethol sut y byddan nhw'n mynd ati i leihau sgil-ddalfeydd eu cychod.
- 4.2.7.2 Gall pob awdurdod pysgodfeydd cenedlaethol ddatblygu eithriadau priodol yn eu dyfroedd o ran taflu pysgod yn ôl i'r môr. Bydd yr eithriadau hyn yn caniatáu lefel fach o daflu yn ôl ar gyfer rhai stociau, mewn rhai pysgodfeydd, o dan amgylchiadau penodol. Bydd unrhyw eithriadau newydd, neu newid i unrhyw eithriadau, yn dal i fod yn seiliedig ar dystiolaeth wyddonol gadarn.
- 4.2.7.3 Mae'r awdurdodau polisi pysgodfeydd yn ymrwymo bod y DU yn tynnu o'i TAC y gyfran honno o'r eithriadau y mae eu cychod yn eu defnyddio yn nyfroedd y DU neu ddyfroedd allanol (yn unol â'r trefniadau rhyngwladol perthnasol).
- 4.2.7.4 Mae'r awdurdodau pysgodfeydd cenedlaethol wedi ymrwymo i weithio gyda'r diwydiant pysgota i leihau'r sgil-ddalfa a lle medrir, i roi stop ar sgil-ddal a rhwydo rhywogaethau sensitif gan gynnwys teulu'r morfil (morfilod, dolffiniaid a llamhidyddion), morloi, adar môr, ac elasmobranchiaid (siarcod a morgathod). Drwy ddarparu Fenter Lleihau Sgil-ddalfeydd DU, bydd yr awdurdodau polisi pysgodfeydd yn ymrwymo i wella'r gwaith monitro ac ymchwil wyddonol, datblygu a mabwysiadu mesurau lliniaru effeithiol, helpu pysgotwyr i roi mesurau lliniaru ar waith, a gweithio gyda phartneriaid rhyngwladol i leihau'r sgil-ddalfa o rywogaethau sensitif trwy'r byd.

4.2.7.5 Lle bo angen, bydd yr awdurdodau pysgodfeydd cenedlaethol yn gweithio gyda'r diwydiant a rhanddeiliaid i ddatblygu a llunio polisiau ehangach i gyflawni'r amcanion hyn neu bolisiau o fewn yr FMP ar gyfer pysgodfeydd penodol.

#### 4.2.8 Dadleoli



4.2.8.1 Mae'r awdurdodau polisi pysgodfeydd yn cydnabod bod llawer yn defnyddio'r môr, a gall hynny, ynghyd â mesurau rheoli i warchod pysgodfeydd, greu pwysau a all arwain at orfodi pygsotwyr i bysgota mewn mannau eraill. Gall 'adleoli' o'r fath gael effeithiau cymdeithasol, economaidd ac amgylcheddol negyddol, a byddwn yn gweithio gyda defnyddwyr y môr i nodi a datrys problemau adleoli yn sgil mesurau rheoli a defnyddiau gofodol eraill gan gynnwys ffermydd gwynt.

#### 4.2.9 Cynllunio Gofodol Morol



4.2.9.1 Mae UKMPS, ynghyd â'r Cynlluniau Morol, yn fframweithiau ar gyfer gwneud penderfyniadau fydd yn golygu gallu rheoli gweithgareddau yn yr ardal forol mewn ffordd sy'n diogelu'r amgylchedd morol, tra'n cefnogi datblygu cynaliadwy. Un o brif egwyddorion UKMPS yw hyrwyddo cydnawsedd rhwng gwahanol weithgareddau a nodi cyfleoedd ar gyfer cydfodoli. Mae'r Deddfau Morol<sup>10</sup> yn ei gwneud yn ofynnol i awdurdodau cyhoeddus wneud penderfyniadau awdurdodi neu orfodi yn unol â'r dogfennau polisi morol perthnasol (sef UKMPS ac unrhyw gynllun morol sydd mewn grym yn ardal y cynllun morol), oni bai bod ystyriaethau perthnasol yn nodi fel arall.

4.2.9.2 Bydd yr awdurdodau polisi pysgodfeydd yn sicrhau bod cynlluniau morol yn cynnwys polisiau sy'n ystyried pysgodfeydd, dyframaethu a chynefinoedd sy'n cynnal stociau pysgod (meithrin neu silio). Gan fod gofyn ymgynghori ar gynlluniau morol drafft, mae'r broses cynllunio morol hefyd yn rhoi cyfle i ddefnyddwyr morol ddweud eu dweud ar sut y dylid rheoli'r ardal forol.

#### 4.2.10 Ardaloedd Morol Gwarchodedig (AMG)



4.2.10.1 Wrth weithio i sicrhau statws GES, bydd yr awdurdodau polisi pysgodfeydd yn parhau i ddatblygu'r rhwydwaith o safleoedd gwarchodedig yn y môr i ddiogelu cynefinoedd a rhywogaethau penodol o bwys cenedlaethol neu ryngwladol.

---

<sup>10</sup> Deddf y Môr a Mynediad i'r Arfordir 2009 (<https://www.legislation.gov.uk/ukpga/2009/23/section/9>), Marine (Scotland) Act 2010 (<https://www.legislation.gov.uk/asp/2010/5/contents>), a'r Marine Act (Northern Ireland) 2013 (<https://www.legislation.gov.uk/nia/2013/10/section/1/enacted>)

Bydd yr awdurdodau polisi pysgodfeydd yn sicrhau bod gweithgareddau pysgota'n cael eu rheoli i AMG allu cyflawni eu hamcanion cadwraethol.

#### 4.2.11 Sbwriel Môr

- 4.2.11.1 Bydd yr awdurdodau polisi pysgodfeydd yn parhau i helpu'r diwydiant i leihau ei effaith ar yr amgylchedd, gan hefyd hyrwyddo mentrau'r diwydiant fel Pysgota am Sbwriel i leihau effeithiau eraill ar yr amgylchedd morol.
- 4.2.11.2 Bydd yr awdurdodau polisi pysgodfeydd yn cefnogi twf yr economi gylchol drwy anelu at gasglu mwy o offer pysgota sydd wedi dod i ddiwedd ei oes a'i reoli'n gynaliadwy yn unol â'r hierarchaeth wastraff. Hefyd, bydd yr awdurdodau polisi pysgodfeydd yn annog dyluniad cylchol ar offer pysgota a dyframaethu rhag eu colli, er mwyn ei gwneud yn haws casglu offer coll a lleihau effaith amgylcheddol colli offer, ynghyd â gwella cyfleoedd i ailddefnyddio, trwsio ac auilgylchu.

#### 4.2.12 Dyfroedd Arfordirol a Dyfroedd Croyw

- 4.2.12.1 Mae GES yn ei gwneud yn ofynnol i ni reoli'n hamgylchedd morol ar sail ecosystem. O'r herwydd, mae'r Strategaeth Forol yn cynnwys nifer o fesurau trawsbynciol sy'n adlewyrchu'r cysylltiadau rhwng pysgod morol a rheoli amgylcheddau arfordirol ac afonydd. Mae'n bwysig bod y JFS hwn yn cydnabod y berthynas honno hefyd.
- 4.2.12.2 Mae cynefinoedd arfordirol ac afonydd yn hanfodol i fôr iach a physgodfeydd ffyniannus. Maen nhw'n bwysig i gylch bywyd nifer fawr o rywogaethau pysgod sy'n werthfawr i'n sector bwyd môr masnachol a hamdden. Er enghraifft, mae morfeydd heli ac aberoedd llanw yn gynefin meithrin a magu draenogiaid y môr, sewin a rhai rhywogaethau o ledod. Hefyd, mae angen i rywogaethau mudol fel eog, sewin a llyswennod allu pasio'n ddi-rwystr trwy systemau afonydd i gwblhau rhannau hanfodol o'u cylchoedd bywyd. Mae ansawdd dŵr da yn hanfodol er mwyn cynnal cynefinoedd arfordirol iach a dyframaeth mewn aberoedd ac ardaloedd arfordirol,
- 4.2.12.3 Mae'r awdurdodau polisi pysgodfeydd yn cydnabod y dylai mesurau i reoli ein hamgylcheddau arfordirol ac afonydd dŵr croyw ystyried yr effeithiau ar iechyd ein hamgylchedd morol. Gallen nhw gynnwys, er enghraifft, gwelliannau mewn MPAs a ffermydd pysgod cregyn i ansawdd dŵr a fyddai'n helpu i fynd i'r afael â phroblemau yn rhannau is yr yr afon a ffermydd pysgod cregyn, ac ystyried rhywogaethau pysgod morol wrth reoli'r arfordir.

#### 4.2.13 Newid Hinsawdd

- 4.2.13.1 Wrth ymateb i'r newid yn yr hinsawdd, mae gofyn i'r sector bwyd môr ystyried sut y gall leihau (neu liniaru) y newid yn yr hinsawdd, a sut y gall y sector addasu i hinsawdd sy'n newid.



- 4.2.13.2 Mae angen ystyried sut y gallwn liniaru'r newid yn yr hinsawdd ar draws y gadwyn gyflenwi. Bydd yr awdurdodau pysgodfeydd cenedlaethol yn gweithio i ddeall cyfraniad carbon gwahanol rannau'r gadwyn gyflenwi. Mae'n hanfodol nodi newidiadau technolegol, ymddygiadol a rheoleiddiol ymarferol i liniaru a lleihau allyriadau ar draws y gadwyn gyflenwi pysgodfeydd i gefnogi'r newid tuag at ddyfodol carbon sero net.
- 4.2.13.3 Bydd yr awdurdodau polisi pysgodfeydd yn chwilio hefyd am atebion arloesol i leihau allyriadau carbon trwy wella injans (cyn belled nad ydyn nhw'n cynyddu capasiti'r fflyd yn uwch na lefelau cynaliadwy), dewis offer a thechnoleg gwyrdd, a nodi cyfleoedd i leihau allyriadau cychod trwy ddefnyddio tanwyddau amgen. Byddwn hefyd yn cefnogi arloesedd i osgoi crafu gwely'r môr, am y gall difrodi gwely'r môr ollwng carbon.
- 4.2.13.4 Mae'r awdurdodau polisi pysgodfeydd yn cydnabod bod diogelu ac adfer cynefinoedd carbon glas a'u rheoli'n gynaliadwy yn ateb sy'n seiliedig ar natur a all ein helpu i ymaddasu i'r newid yn yr hinsawdd a'i wrthsefyll, ynghyd â dal a storio carbon a diogelu bioamrywiaeth.
- 4.2.13.5 Bydd yr awdurdodau pysgodfeydd cenedlaethol yn gweithio gyda'r gymuned wyddonol i nodi bylchau yn sylfaen dystiolaeth carbon glas y DU, ac yn gweithio i lenwi'r bylchau hynny. Bydd yr awdurdodau polisi pysgodfeydd hefyd yn ymchwilio i effaith gweithgareddau pysgota a dyframaeth ar gynefinoedd carbon glas ac yn ystyried hyn wrth wneud penderfyniadau yn y dyfodol.
- 4.2.13.6 Bydd yr awdurdodau polisi pysgodfeydd hefyd yn annog mentrau gwirfoddol y diwydiant i ddatgarboneiddio a gwella marchnata bwyd môr carbon isel.
- 4.2.13.7 Rydym yn cydnabod bod gan ddyframaeth yn benodol rôl gadarnhaol bosibl o ran mynd i'r afael â'r newid yn yr hinsawdd drwy ddarparu ffynonellau cynaliadwy o brotein carbon isel o ansawdd uchel. Cydnabyddir hefyd gyfraniad posibl is-sectorau dyframaeth fel gwymon a physgod cregyn at ddal carbon a chyfraniad dyframaeth at yr economi las. Fel gyda phob sector, bydd disgwyl i'r sector dyframaeth addasu i amgylchedd a hinsawdd sy'n newid. Byddwn yn ceisio cefnogi economi gylchol ac arloesedd o fewn y diwydiant.
- 4.2.13.8 Rhaid i'r sector bwyd môr addasu i effeithiau'r newid yn yr hinsawdd i lwyddo yn yr hirdymor ac i alinio â'n hymrwymiaadau o ran yr hinsawdd. Bydd yr awdurdodau pysgodfeydd cenedlaethol yn parhau i fonitro effeithiau hinsawdd sy'n newid ar rywogaethau, cynefinoedd a physgodfeydd y môr ac yn delio â'r effeithiau hynny, fel y'u hamlygwyd gan [Asesiad y Pwyllgor Newid Hinsawdd o Risgiau Newid Hinsawdd](#), drwy fecanweithiau fel y Rhaglen Effeithiau'r Newid yn yr Hinsawdd ar y Môr. Byddwn hefyd yn sicrhau bod y canfyddiadau ar gael yn rhwydd i randdeiliaid yr effeithir arnynt. Bydd yr awdurdodau polisi pysgodfeydd yn gweithio mewn partneriaeth â'r sector bwyd môr i ddeall effeithiau newid hinsawdd a i gyd-ddatblygu technegau rheoli pysgodfeydd ar

gyfer addasu i'r hinsawdd er mwyn gallu parhau i bysgota'n gynaliadwy am stociau y mae'r newid yn yr hinsawdd yn effeithio arnynt.

- 4.2.13.9 Bydd yr awdurdodau polisi pysgodfeydd yn cydweithio i fanteisio ar y cyfleoedd a wynebu'r heriau a all godi wrth i'r hinsawdd newid, megis datblygiadau ar gyfer dal pysgod newydd neu arallgyfeirio o fewn dyframaethu. Ni ddylid manteisio ar y cyfleoedd hyn oni bai eu bod yn gydnaws â sicrhau statws GES ac ag ymrwymadau rhyngwladol a bod marchnad ar gyfer y cynnyrch terfynol.

#### 4.2.14 Dyframaethu

- 4.2.14.1 Mae'r awdurdodau polisi pysgodfeydd yn cefnogi twf cytbwys a chynaliadwy, o dan arweiniad y diwydiant, ym mhob is-sector dyframaethu. Bydd y twf yn seiliedig ar y wyddoniaeth orau sydd ar gael yn yr is-sector hwnnw a'r diwydiant. Bydd y diwydiant yn un amrywiol ac economaidd hyfyw sy'n cyfrannu at ddiogelu'r cyflenwad bwyd gyda chyn lleied o effaith â phosibl ar yr amgylchedd. Rydym yn cydnabod y gall y gwahanol is-sectorau dyframaethu a geir yng ngwledydd y DU â'u dulliau tyfu amrywiol, ryngweithio i raddau gwahanol â'u hecosystemau a chyd-ddefnyddwyr yr amgylchedd. Felly, bydd angen i unrhyw ddatblygu ac ehangu ar unrhyw ran o'r sector dyframaethu fod yn seiliedig ar y dystiolaeth orau sydd ar gael a'r fframweithiau rheoli strategol a rheoliadau perthnasol, megis cynllunio morol, a hynny o fewn terfynau amgylcheddol. Gall dyframaethu drwy hynny barhau i fod yn amrywiol ac economaidd hyfyw, a chyfrannu at ddiogelu'r cyflenwad bwyd gyda chyn lleied o effaith â phosibl ar yr amgylchedd

- 4.2.14.2 Bydd yr awdurdodau polisi pysgodfeydd yn cydweithio ar ddyframaethu lle bo gofn i gyflawni nodau cyffredin a byddan nhw'n gweithio gyda'i gilydd i gynnal y safonau iechyd a lles anifeiliaid dyfrol sydd wedi'u mabwysiadu

#### 4.2.15 Pysgota Hamdden yn y Môr

- 4.2.15.1 Bydd yr awdurdodau polisi pysgodfeydd yn parhau i weithio gyda'i gilydd - lle bo'n bosibl, yn ymarferol ac yn briodol - i sicrhau bod pysgota hamdden yn y môr yn gynaliadwy o safbwynt amgylcheddol, cymdeithasol ac economaidd. Byddwn, lle medrwn, yn ystyried pysgota hamdden wrth reoli pysgodfeydd yn ehangach.
- 4.2.15.2 Byddwn yn parhau i ategu hyn trwy gasglu data ar ddalfeydd, eu heffaith economaidd a data am rywogaethau penodol y sector pysgota môr hamdden.

#### 4.2.16 Cynhyrchu, Marchnata a Bwyta Bwyd Môr Diwydiant a chymunedau cydnerth

4.2.16.1 Bydd yr awdurdodau polisi pysgodfeydd yn ceisio sicrhau bod cymunedau arfordirol yn gallu addasu i anghenion heddiw ac yfory y sector bwyd môr a'r diwydiannau cymorth cysylltiedig, gan gydnabod y ddeinameg leol wahanol â diwydiannau eraill, sydd er hynny yn eu hategu.

### **Gweithlu – sgiliau a safonau gwaith**

4.2.16.2 Bydd yr awdurdodau polisi pysgodfeydd yn gweithio gyda rhanddeiliaid yn y sector bwyd môr er mwyn i bobl allu ymuno â'r diwydiant ym mhob cam o'u gyrfa, gyda hyfforddiant ardystiedig, cynllunio olyniaeth ac amodau gwaith gwell a safonau i helpu i ddatblygu llwybr gyrfa deniadol. Bydd yr awdurdodau polisi pysgodfeydd yn ceisio gwella canfyddiad y cyhoedd o'r diwydiant fel lle i weithio a llwyddo, er mwyn denu newydd-ddyfodiaid i'r diwydiant.

4.2.16.3 Bydd yr awdurdodau polisi pysgodfeydd yn gweithio gyda'r sector bwyd môr i ddeall a hyrwyddo'r arferion talu mwyaf addas a theg i ddenu newydd-ddyfodiaid.

4.2.16.4 Bydd yr awdurdodau polisi pysgodfeydd yn annog y sector i gynyddu'r cyflenwad o lafur domestig sydd ar gael i weithio yn y sector bwyd môr, ac i drin pawb sy'n gweithio yn y sector yn deg.

4.2.16.5 Bydd yr awdurdodau polisi pysgodfeydd yn gweithio gyda'i gilydd i gynnal iechyd, diogelwch, lles, ac yn benodol diogelwch ar y môr pawb sy'n gysylltiedig â'r sector bwyd môr.

### **Cadwyni cyflenwi**

4.2.16.6 Bydd yr awdurdodau polisi pysgodfeydd yn ceisio cryfhau cadwyn gyflenwi'r sector bwyd môr drwy:

- Annog cydweithio ac arloesi ar draws y gadwyn gyflenwi i'w diogelu at y dyfodol ac i ymateb i gyfleoedd/heriau marchnad fwyd ddeinamig - er enghraifft, annog cyfleoedd i sicrhau arbedion drwy rannu gwybodaeth am arfer gorau a manteision cydweithio,
- Tynnu sylw at fanteision bwyta bwyd môr o farchnadoedd domestig, ond gan gadw golwg ar fudd economaidd masnach ryngwladol, a
- Bod yn dryloyw a thracio cynnyrch drwy ddefnyddio Dangosyddion Cynaliadwyedd ac Ansawdd i farchnata pysgodfeydd nodedig a'u cynnyrch.

### **Prosesu ein cynnyrch**

4.2.16.7 Bydd yr awdurdodau polisi pysgodfeydd am i'r sector prosesu allu ymateb i'r diwydiant pysgota a dyframaethu a newidiadau yn ymddygiad defnyddwyr a bod yn fwy cynaliadwy a chydnerth drwy fanteisio ar gyfleoedd i dyfu a newid cyn i ddatblygiadau yn y diwydiant ddigwydd.

### **Marchnadoedd – gwerthu a marchnata ein cynnyrch**

4.2.16.8 Bydd yr awdurdodau polisi pysgodfeydd yn hyrwyddo bwyd môr lleol - gwyllt ac wedi'i ddyframaethu – fel ffynhonnell protein iach, carbon isel a chynaliadwy bosibl; ac yn ceisio gwella ymwybyddiaeth defnyddwyr iddyn nhw allu gwneud dewisiadau gwybodus ac annog mwy o fwyta ar fwyd môr y DU fel opsiwn iach a hyrwyddo marchnad ddomestig lwyddiannus ar gyfer bwyd môr y DU.

4.2.16.9 Bydd yr awdurdodau polisi pysgodfeydd yn gweithio gyda'r sector bwyd môr i gefnogi marchnad ffyniannus a chydnerth yn y DU sy'n annog pobl i fwyta pysgod sy'n cael eu ffermio yn y DU a physgod sy'n cael eu dal gan gychod y DU drwy addysg a hyrwyddo, gan dynnu sylw at ddull cyfrifol y DU o ddyframaethu a rheoli pysgodfeydd.

4.2.16.10 Bydd yr awdurdodau pysgodfeydd cenedlaethol yn ceisio hwyluso'r gwaith o ddatblygu systemau labelu ac olrhain cadarn i gefnogi systemau achredu sy'n glir i'r defnyddiwr. Bydd hynny'n hyrwyddo bwyd môr.

4.2.16.11 Gan weithio ar y cyd lle medrir, bydd yr awdurdodau polisi pysgodfeydd yn gweithio am farchnad ryngwladol ffyniannus sy'n sicrhau'r elw gorau a'r gwerth ychwanegol i'r diwydiant ond gan barchu yr un pryd yr amcanion cynaliadwyedd a newid hinsawdd.

4.2.16.12 Bydd yr awdurdodau pysgodfeydd cenedlaethol yn parhau i weithio gyda'i gilydd i sicrhau bod y marchnadoedd gorau posibl ar gael ar gyfer cynnyrch y sector bwyd môr, boed y rhain yn farchnadoedd newydd neu'n farchnadoedd sydd eisoes yn bodoli.

4.2.16.13 Bydd yr awdurdodau pysgodfeydd cenedlaethol yn gweithio gyda'r sector bwyd môr i fonitro'r capasiti a helpu i gynefino/hyfforddi Swyddogion Ardystio er lles masnach ryngwladol.

4.2.16.14 Trwy'r polisiâu hyn bydd yr awdurdodau pysgodfeydd cenedlaethol yn cyfrannu at gyflawni'r amcan budd cenedlaethol yn y Ddeddf drwy ddarparu ar gyfer diwydiant pysgota a sector bwyd môr economaidd hyfyw sy'n cefnogi busnesau bwyd môr y DU.

### **Twf, arallgyfeirio ac arloesi**

4.2.16.15 Lle bo'n briodol, bydd yr awdurdodau polisi pysgodfeydd yn cefnogi cyfleoedd i arallgyfeirio i gryfhau cymunedau a'u helpu i ymateb yn well i anghenion y

sector bwyd môr a'r diwydiannau cymorth cysylltiedig heddiw ac yfory, gan gydnabod y ddeinameg leol.

- 4.2.16.16 Mae'r awdurdodau polisi pysgodfeydd yn cydnabod uchelgais y cymunedau arfordirol i ddatblygu ac yn annog arallgyfeirio i sicrhau a chynyddu cyfleoedd er budd y sector bwyd môr.
- 4.2.16.17 Bydd yr awdurdodau polisi pysgodfeydd yn annog cydweithio rhwng diwydiant, y byd academaidd a'r Llywodraeth i ddod o hyd i gyfleoedd arloesol ar gyfer llwyddiant economaidd cynaliadwy ac arallgyfeirio.

## 5. Cynlluniau Rheoli Pysgodfeydd



### 5.1 Cyflwyniad

- 5.1.1 Mae Deddf Pysgodfeydd (2020) yn diffinio Cynllun Rheoli Pysgodfa (FMP) fel dogfen sy'n disgrifio polisiau sydd wedi'u llunio i adfer neu gynnal un neu fwy o stociau pysgod môr at lefel gynaliadwy. Bydd pob cynllun yn nodi'r stoc(iau), y math o bysgota a'r dalgylch dan sylw.
- 5.1.2 Mae'r adran hon yn esbonio diben cyffredinol FMPs, gan gynnwys eu cysylltiad â'r amcanion ar gyfer pysgodfeydd, y fframwaith ehangach ar gyfer rheoli pysgodfeydd a'r cynlluniau y bydd yr awdurdodau polisi pysgodfeydd yn eu cyhoeddi. Mae Atodiad A yn rhestru FMPs arfaethedig gyda'u dyddiadau cyhoeddi.
- 5.1.3 Mater i bob awdurdod pysgodfeydd cenedlaethol fydd penderfynu pa FMPs sydd ei angen arno ac a ddylai eu paratoi ei hun neu ar y cyd ag awdurdod pysgodfeydd cenedlaethol arall. Bydd pob awdurdod pysgodfeydd cenedlaethol yn gweithio gyda'i gyrff cyflawni perthnasol i roi polisiau'r FMP ar waith.
- 5.1.4 Mae'r awdurdodau polisi pysgodfeydd wedi nodi ar y cyd y stociau hynny yn nyfroedd y DU y gallai cynlluniau ymdrin â nhw, ar sail data ICES, cytundebau rhyngwladol a data ar laniadau yn y DU. Mae'r rhestr yn cynnwys stociau sydd â chwota a rennir â gwledydd eraill a rhai heb gwota, a'r rheini sy'n gyfan gwbl o fewn dyfroedd y DU ac nad oes unrhyw gyd-reoli arnyn nhw. Mae Atodiad 1 yn dangos y stoc neu'r stociau sydd wedi'u cynnwys yn y cynlluniau arfaethedig.
- 5.1.5 Bydd pob FMP yn destun ymgynghoriad cyhoeddus cyn cael ei gyhoeddi'n ffurfiol gan yr awdurdodau polisi pysgodfeydd.

## 5.2 Beth yw Cynllun Rheoli Pysgodfa?

- 5.2.1 Dogfen yw FMP sy'n disgrifio'r fframwaith polisi ar gyfer diogelu cynaliadwyedd hirdymor ein stociau pysgod. Mae gofyn monitro FMPs yn ôl y Ddeddf am eu heffeithiolrwydd, a dylai awdurdodau polisi pysgodfeydd eu hadolygu ac adrodd arnyn nhw'n rheolaidd.
- 5.2.2 Ar ôl cyhoeddi FMP, mae dyletswydd ar awdurdodau pysgodfeydd cenedlaethol yn ôl y Ddeddf i arfer eu swyddogaethau yn unol â'r polisiau yn yr FMP. Felly, mae'r cynllun yn rhwymo awdurdodau pysgodfeydd cenedlaethol i gyflawni'r nodau sydd yn yr FMP.
- 5.2.3 Mae gofyn clir ar i FMP nodi a oes digon o dystiolaeth i asesu MSY y stoc<sup>11</sup>. Bydd FMP yn nodi polisiau i adfer neu gynnal y stoc at lefel gynaliadwy. Os nad oes digon o dystiolaeth, rhaid i'r FMP esbonio sut y bwriedir cael y dystiolaeth os yw hynny'n ymarferol. Os nad yw'n ymarferol, bydd yr FMP yn esbonio pam hynny, a sut y gall bennu terfynau cynaliadwy neu brocsi addas yn unol â'r dull rhagofalus.
- 5.2.4 Rhaid i bob FMP ddisgrifio'r dangosydd neu'r dangosyddion perthnasol y bydd rheolwyr pysgodfeydd yn eu defnyddio i asesu effeithiolrwydd y cynllun. Bydd y dangosyddion hyn yn helpu i ddangos sut mae'r FMP yn cyfrannu at yr amcanion pysgodfeydd hynny sy'n berthnasol i'r cynllun. Lle bo'n briodol, bydd y dangosyddion hyn wedi'u clymu wrth dargedau gydag amserlen, yn unol â nodau a thargedau'r FMP.
- 5.2.5 Bydd yr awdurdodau polisi pysgodfeydd yn cynnal gwaith monitro priodol ar sail y dangosyddion perthnasol. Bydd effeithiolrwydd yr FMPs yn cael ei asesu'n rheolaidd gan ddefnyddio dangosyddion priodol a chyhoeddir y canlyniadau o leiaf bob tair blynedd yn adroddiad y JFS y mae'r Ddeddf yn gofyn amdano. Bydd yr adroddiadau hyn yn cael eu rhoi gerbron pob un o ddeddfwrfeydd y DU ac yn nodi i ba raddau y mae FMPs wedi effeithio ar lefelau stociau yn y DU.
- 5.2.6 Bydd pob FMP yn cael ei adolygu o leiaf bob chwe mlynedd er mwyn sicrhau ei fod yn parhau'n effeithiol, er y gall awdurdodau polisi pysgodfeydd adolygu polisiau'r cynlluniau yn amlach ac yn fwy rheolaidd pan welir bod angen.

---

<sup>11</sup> MSY, yn ôl y diffiniad yn Neddff Pysgodfeydd 2020, yw'r cynnyrch cytbwys damcaniaethol uchaf y gellir ei gymryd yn barhaus ar gyfartaledd o stoc forol o dan amodau amgylcheddol presennol heb effeithio'n sylweddol ar y broses atgenhedlu.

## 5.3 Penderfynu pa stociau i'w cynnwys mewn FMP

5.3.1 Mae'r awdurdodau polisi pysgodfeydd yn cydnabod bod llawer o rywogaethau'n cael eu targedu gan bysgodfeydd masnachol y DU. Er bod rhai rhywogaethau o bwys economaidd a diwylliannol sylweddol, mae llawer o rywogaethau nad ydyn nhw'n cael eu targedu'n aml, os o gwbl. Mae'r awdurdodau polisi pysgodfeydd yn defnyddio'r meini prawf canlynol i benderfynu a ddylai stoc gael ei chynnwys mewn FMP:

- ddiddordeb masnachol ond lle ceir risg o orbysgota sylweddol o beidio â'i rheoli neu mae'r mesurau rheoli presennol wedi dyddio neu ddim yn bodloni'r nod rheoli;
- Gwerth economaidd y bysgodfa a'i chyfraniad economaidd ehangach i gymunedau arfordirol;
- Ei phwysigrwydd economaidd-gymdeithasol o ystyried ffactorau fel lefelau cyflogaeth, incwm lleol, manteision pysgota hamdden, cyfraniad at gymunedau arfordirol, a strwythurau cyfreithiol/gwleidyddol;
- Arwyddocâd ecosystemau gan gynnwys ffactorau fel pwysigrwydd y rhywogaeth darged, effaith y bysgodfa ar yr ecosystem a'i pherthynas â rhywogaethau nad ydyn nhw'n rhai targed gan gynnwys rhywogaethau sy'n cael eu gwarchod.

5.3.2 Mae'r stociau a ddangosir yn y rhestr FMPs yn Atodiad A yn bodloni'r meini prawf hyn a barnwyd ei bod yn briodol eu cynnwys o fewn FMP.

5.3.3 Ni fyddwn yn ystyried y stociau hynny nad ydyn nhw'n gynnwys o dan y meini prawf hyn ar gyfer eu cynnwys mewn FMP. Bydd yr awdurdod polisi pysgodfeydd perthnasol yn cadw golwg ar weddill y stociau ac os bydd amgylchiadau stoc yn newid, ystyrir ei chynnwys o fewn FMP presennol neu FMP newydd.

5.3.4 Bydd yr awdurdodau pysgodfeydd cenedlaethol yn parhau i ddefnyddio'r mesurau cadwraeth/rheoli presennol ar gyfer rhai stociau allweddol sy'n peri pryder megis stociau môr dwfn, rhywogaethau tiwna o dan ICCAT<sup>12</sup> a stociau fel llymrïod a swtanod Norwy a dargedir gan bysgodfeydd diwydiannol.

5.3.5 Bydd yr awdurdodau polisi pysgodfeydd yn cyhoeddi FMPs ar y cyd ar gyfer y stociau masnachol allweddol hynny sydd o ddiddordeb ledled y DU. Bydd y

---

<sup>12</sup> Comisiwn Rhyngwladol dros Warchod Tiwna Iwerydd

cynlluniau'n canolbwyntio ar y stoc fel y'i diffinnir gan gyrrff gwyddonol fel ICES yn hytrach na'r unedau rheoli presennol.

- 5.3.6 Gan gydnabod bod pob fflyd yn y DU yn wahanol, mae pob awdurdod polisi pysgodfeydd wedi ystyried hefyd a oes angen FMPs rhanbarthol i reoli gweithgarwch pysgota yn ei ddalgylch, neu i gydweithio ag awdurdod polisi pysgodfeydd arall lle gallai FMP rhanbarthol ar y cyd fod yn fwy priodol. Bydd yr FMPs rhanbarthol hyn yn ymdrin naill ai â stoc na fyddai'n briodol paratoi FMP ar lefel y DU ar ei chyfer er ei bod yn bwysig i'r awdurdod pysgodfeydd cenedlaethol dan sylw, neu â gweithgarwch pysgota yn ôl natur y fflyd yn ei ddyfroedd, a/neu ardaloedd penodol. Rhestrir y FMPs hyn hefyd yn Atodiad A.
- 5.3.7 Bydd sut mae awdurdod polisi pysgodfeydd yn defnyddio FMPs i wireddu ei bolisiâu yn dibynnu ar y polisiâu yn yr FMPs. Prif ffocws yr holl FMPs fydd sicrhau cynaliadwyedd hirdymor y stoc. Ar gyfer FMPs rhanbarthol, gellir estyn eu cwmpas i gynnwys ystyriaethau rheoli pysgodfeydd ehangach fel pryderon amgylcheddol, cymdeithasol ac economaidd.
- 5.3.8 Er enghraifft, gallai cynlluniau gynnwys manylion llywodraethu, ystyriaethau amgylcheddol ehangach effaith y bysgodfa, a'r mesurau rheoli sydd eu hangen i gyflawni nodau'r cynlluniau. Byddai unrhyw fesur rheoli yn effeithio ar bob cwch sy'n pysgota yn y bysgodfa honno. Dylai awdurdod polisi pysgodfeydd nodi targedau gydag amserlen i gyflawni'r nodau hyn lle bo hynny'n briodol.
- 5.3.9 Ar gyfer y stociau lle mae'r DU yn rhannu cyfrifoldeb rheoli â gwlad arfordirol arall, bydd FMPs yn helpu i bennu amcanion negodi'r DU ar gyfer y stociau hynny, tra'n cydnabod na all y DU gyflawni amcanion yr FMP ar ei phen ei hun.

## 5.4 Perthynas FMPs â'r Amcanion Pysgodfeydd

- 5.4.1 Paratowyd y rhestr FMPs yn Atodiad A gan yr awdurdodau polisi pysgodfeydd at ddibenion bodloni'r rhwymedigaeth a nodir yn adran 2(1)(b) o'r Ddeddf.
- 5.4.2 Mae perthynas uniongyrchol rhwng dyluniad a strwythur FMPs a'r amcanion 'rhagofalus', 'tystiolaeth wyddonol', 'ecosystem' a 'mynediad cyfartal' gan eu bod yn ymwneud â rheoli pysgod yn gynaliadwy ac â chasglu a defnyddio tystiolaeth wyddonol ac yn effeithio ar bob cwch sy'n pysgota yn yr ardal dan sylw.
- 5.4.3 Bydd FMPs gan awdurdodau polisi pysgodfeydd sy'n ceisio mynd i'r afael â materion rheoli pysgodfeydd ehangach yn cyfrannu at yr amcanion pysgodfeydd eraill, gan ddibynnu ar nodau/targedau penodol y cynllun. Bydd mesurau sy'n mynd i'r afael ag effaith pysgota ar yr amgylchedd yn cyfrannu at un neu fwy o'r amcanion 'cynaliadwyedd', 'ecosystem', 'sgil-ddalfa' a 'newid hinsawdd'. Gall cynllun sy'n cynnwys mesurau cymdeithasol ac economaidd gyfrannu at yr amcanion 'cynaliadwyedd' a 'budd cenedlaethol'.



## 5.5 Perthynas rhwng FMPs a'r Cynlluniau Rheoli Presennol

- 5.5.1 Bydd pob awdurdod polisi pysgodfeydd yn parhau i gynnal systemau ar gyfer rheoli pysgodfeydd ei ddalgylch gan ddefnyddio pwerau cyfreithiol sy'n bod eisoes ynghyd â'r pwerau newydd o'r Ddeddf. Ceir cynlluniau rheoli eisoes o dan y darpariaethau hyn sy'n rheoli rhai stociau a gweithgareddau pysgota. Nid oes gofyn ar hyn o bryd i droi'r cynlluniau hynny'n FMPs.
- 5.5.2 Mae Cynlluniau Amlflwydd (MAPs) yr UE (fel y'u dargedwir/diwygiwyd gan gyfraith y DU) yn parhau'n gymwys mewn moroedd gwahanol neu i rai rhywogaethau a, lle ceir digon o ddata gwyddonol am y rhywogaeth ar y rhestr, nodir trefniadau ar gyfer defnyddio'r stoc.
- 5.5.3 Bydd yr awdurdodau polisi pysgodfeydd yn ystyried pa elfennau, os o gwbl, yn MAPs yr UE y dylid eu cadw a'u hymgorffori yn y FMPs. Pan gyhoeddir FMPs, caiff MAPs yr UE eu diddymu o ddeddfwriaeth y DU (maes o law) er mwyn osgoi unrhyw wrthdaro yn y dyfodol â'r polisiau yn yr FMPs.

## 5.6 Asesu Terfynau Cynaliadwy

- 5.6.1 Defnyddir y data a'r cyngor sydd ar gael am bysgodfeydd i bennu targedau a therfynau dal ar gyfer pob stoc. Os oes llawer o ddata am y stoc a bod modd tracio newidiadau yn ei biomas, bydd y terfynau hyn yn nodi'r MSY. Defnyddir procsi ar gyfer stoc dlotach o ran data sy'n tracio amrywiadau yn ei biomas yn unig. Gall awdurdod polisi pysgodfeydd ddatblygu Manyleb Safon Cynaeafu i ddarparu fframwaith bras ar gyfer datblygu strategaethau cynaeafu ar gyfer stociau unigol.
- 5.6.2 Nid oes digon o dystiolaeth ar hyn o bryd am bob stoc i allu pennu terfynau fel rhai MSY. Ni fydd yn ymarferol yn wyddonol nac yn bosibl yn ariannol casglu dystiolaeth o'r fath ar gyfer rhai rhywogaethau. Lle bo'n ymarferol, bydd FMPs yn nodi strategaeth ar gyfer datblygu'r wyddoniaeth angenrheidiol, sut i gasglu, modelu a monitro data ac asesu'r risg i'r stoc a'i hecosystemau.
- 5.6.3 Bydd angen i'r DU drafod dulliau generig a phenodol ar gyfer pennu terfynau cynaliadwy stociau a rennir wrth ddatblygu FMPs a chytuno ar dargedau priodol drwy drafodaethau rhyngwladol. Bydd FMPs yn helpu i lywio safiad negodi'r DU, yn bennaf drwy nodi'n glir ein huchelgais i sicrhau stociau cynaliadwy.

## 5.7 Monitro ac Adolygu FMPs

- 5.7.1 Bydd yr awdurdodau polisi pysgodfeydd yn monitro'r FMP ar sail y dangosyddion perthnasol. Bydd effeithiolrwydd yr FMPs yn cael ei asesu'n rheolaidd a chyhoeddir y canlyniadau o leiaf bob tair blynedd yn adroddiad y JFS y mae'r Ddeddf yn gofyn amdano. Bydd yr adroddiadau hyn yn cael eu rhoi gerbron

deddfwrfeydd y DU ac yn nodi i ba raddau y mae'r polisïau yn yr FMPs wedi effeithio ar lefelau stociau pygsod môr y DU.

- 5.7.2 Bydd pob FMP yn cael ei adolygu o leiaf bob chwe blynedd neu cyn hynny os bydd tystiolaeth berthnasol, rhwymedigaethau rhyngwladol, neu ddigwyddiadau ehangach yn gofyn am newid y polisïau yn yr FMP.

## Atodiad A: Rhestr o'r Cynlluniau Rheoli Pysgodfeydd arfaethedig

Teitl yr FMP	Amserlen cyhoeddi	Math o stoc	Y prif fath o bysgota <sup>13</sup>	Ardal Bysgota	Awdurdod Arwain	Ar y cyd?	Awdurdod sy'n gyfrifol am gynllun ar y cyd				Rheswm nad yw ar y cyd?
							DAERA	Defra	Marine Scotland	Llyw. Cymru	
Cynllun Rheoli Pysgodfeydd Penfras Môr y Gogledd	2021-2022	Penfras	Treillrwyd ddyfnforol	Môr y Gogledd	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Penfras Arfordir Gorllewin yr Alban	2021-2022	Penfras	Treillrwyd ddyfnforol	Arfordir Gorllewin yr Alban	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Penfras Cefnfor Iwerydd	2021-2022	Penfras	Treillrwyd ddyfnforol	Rockall, Gogledd-ddwyrain Cefnfor Iwerydd	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Hadog Môr y Gogledd ac Arfordir Gorllewin yr Alban	2021-2022	Hadog	Treillrwyd ddyfnforol	Môr y Gogledd ac Arfordir Gorllewin yr Alban	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Hadog Cefnfor Iwerydd	2021-2022	Hadog	Treillrwyd ddyfnforol	Rockall, Gogledd-ddwyrain Cefnfor Iwerydd	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Gwyniaid Arfordir Gorllewin yr Alban	2021-2022	Gwyniaid môr	Treillrwyd ddyfnforol	Arfordir Gorllewin yr Alban	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Gwyniaid Môr y Gogledd	2021-2022	Gwyniaid môr	Treillrwyd ddyfnforol	Môr y Gogledd	Marine Scotland (yr Alban)	Ydy	Ydy	Ydy	Ydy	Ydy	

<sup>13</sup> Bydd pob Cynllun Rheoli Pysgodfeydd yn amlinellu'n fanwl yr holl fathau o bysgota wedi'u cynnwys yn y cynllun; dim ond y dechneg fwyaf cyffredin a ddefnyddir i gynaeafu'r stoc y mae'r cofnod yn y tabl yn cyfeirio ato.

Teitl yr FMP	Amserlen cyhoeddi	Math o stoc	Y prif fath o bysgota <sup>13</sup>	Ardal Bysgota	Awdurdod Arwain	Ar y cyd?	Awdurdod sy'n gyfrifol am gynllun ar y cyd				Rheswm nad yw ar y cyd?
							DAERA	Defra	Marine Scotland	Llyw. Cymru	
Cynllun Rheoli Pysgodfeydd Chwytylniaid Glas Môr y Gogledd ac Arfordir Gorllewin yr Alban	2021-2022	Chwitlyn Glas	Treillrwyd ddyfnforol	Môr y Gogledd ac Arfordir Gorllewin yr Alban	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Penddu Ysgafell y Gogledd	2021-2022	Penddu	Treillrwyd ddyfnforol	Ysgafell y Gogledd	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Cythreuliaid Môr Môr y Gogledd ac Arfordir Gorllewin yr Alban	2021-2022	Cythraul y Môr	Treillrwyd ddyfnforol	Môr y Gogledd ac Arfordir Gorllewin yr Alban	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Lledod Mair Môr y Gogledd ac Arfordir Gorllewin yr Alban	2021-2022	Lledod Fair	Treillrwyd ddyfnforol	Môr y Gogledd ac Arfordir Gorllewin yr Alban	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Honosiaid Ysgafell y Gogledd	2021-2022	Honos	Treillrwyd ddyfnforol	Ysgafell y Gogledd	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Cimychiaid Norwy Môr y Gogledd	2021-2022	Cimwch Norwy	Treillrwyd ddyfnforol	Môr y Gogledd	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Cimychiaid Norwy Arfordir Gorllewin yr Alban	2021-2022	Cimwch Norwy	Treillrwyd ddyfnforol	Arfordir Gorllewin yr Alban	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Mecryll Ysgafell y Gogledd	2021-2022	Mackerel	Treillrwyd ganolddwr	Ysgafell y Gogledd	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Sgadan/Penwaig Iwerydd/Sgandinafia	2021-2022	Sgadan/Penwaig	Treillrwyd ganolddwr	Môr y Gogledd a'r Arctig	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Sgadan/Penwaig Môr y Gogledd	2021-2022	Sgadan/Penwaig	Treillrwyd ganolddwr	Môr y Gogledd	Marine Scotland (yr Alban)	Ydy	Ydy	Ydy	Ydy	Ydy	

Teitl yr FMP	Amserlen cyhoeddi	Math o stoc	Y prif fath o bysgota <sup>13</sup>	Ardal Bysgota	Awdurdod Arwain	Ar y cyd?	Awdurdod sy'n gyfrifol am gynllun ar y cyd				Rheswm nad yw ar y cyd?
							DAERA	Defra	Marine Scotland	Llyw. Cymru	
Cynllun Rheoli Pysgodfeydd Sgadan/Penwaig Arfordir Gorllewin yr Alban (a Clyde)	2021-2022	Sgadan/Penwaig	Treillrwyd ganolddwr	Arfordir Gorllewin yr Alban	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Pysgod Arian Mawr Môr y Gogledd	2021-2022	Pysgodyn Arian Mawr	Treillrwyd ddyfnforol	Môr y Gogledd	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Pysgod Arian Mawr Arfordir Gorllewin yr Alban	2021-2022	Pysgodyn Arian Mawr	Treillrwyd ddyfnforol	Arfordir Gorllewin yr Alban	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Swtanod Glas Ysgafell y Gogledd	2021-2022	Swtan Glas	Treillrwyd ganolddwr	Ysgafell y Gogledd	Marine Scotland (yr Alban)	Ydy	Ydy	Ydy	Ydy	Ydy	
Cynllun Rheoli Pysgodfeydd Draenogiaid Môr	2021-2023	Draenog y Môr	Pob math o gêr	Dyfroedd Cymru a Lloegr	Defra (Lloegr)	Ydy		Ydy		Ydy	
Cynllun Rheoli Pysgodfeydd Cocos	2022-2024	Cocos	Llusgrwyd	Dyfroedd Lloegr	Defra (Lloegr)	Na					Yn nyfroedd y Weinyddiaeth yn unig
Cynllun Rheoli Pysgodfeydd Cocos	2021-2023/2024	Cocos	Casglu â llaw	Dyfroedd Cymru	Llywodraeth Cymru	Na					Yn nyfroedd y Weinyddiaeth yn unig
Cynllun Rheoli Pysgodfeydd Crancod a Chimychiaid	2021-2023	Crancod, Cimychiaid	Potiau a chewyll	Dyfroedd Lloegr	Defra (Lloegr)	Na					Yn nyfroedd y Weinyddiaeth yn unig
Cynllun Rheoli Pysgodfeydd Crancod a Chimychiaid	2021-2024/2025	Crancod, Cimychiaid	Potiau a chewyll	Dyfroedd Cymru	Llywodraeth Cymru	Na					Yn nyfroedd y Weinyddiaeth yn unig
Cynllun Rheoli Pysgodfeydd Cregyn y Brenin	2021-2023	Cregyn y Brenin	Llusgrwyd	Dyfroedd Cymru a Lloegr	Defra (Lloegr)	Ydy		Ydy		Ydy	
Cynllun Rheoli Pysgodfeydd Cregyn Moch yn nyfroedd Lloegr	2021-2023	Cregyn y Moch	Potiau a chewyll	Dyfroedd Lloegr	Defra (Lloegr)	Na					Yn nyfroedd y Weinyddiaeth yn unig
Cynllun Rheoli Pysgodfeydd Cregyn Moch yn nyfroedd Cymru	2021-2022	Cregyn y Moch	Potiau a chewyll	Dyfroedd Cymru	Llywodraeth Cymru	Na					Yn nyfroedd y Weinyddiaeth yn unig

Teitl yr FMP	Amserlen cyhoeddi	Math o stoc	Y prif fath o bysgota <sup>13</sup>	Ardal Bysgota	Awdurdod Arwain	Ar y cyd?	Awdurdod sy'n gyfrifol am gynllun ar y cyd				Rheswm nad yw ar y cyd?
							DAERA	Defra	Marine Scotland	Llyw. Cymru	
Cynllun Rheoli Pysgodfeydd Cregyn y Frenhines	2021-2024	Cregyn y Frenhines	Llusgrwyd	Dyfroedd Lloegr	Defra (Lloegr)	Na					Yn nyfroedd y Weinyddiaeth yn unig
Cynllun Rheoli Pysgodfeydd Dyfnforol Môr Iwerddon	2021-2024	Lleden goch, penfras, hadog, lleden chwythig, gwyniad môr, cimwch Norwy	Treillrwyd ddyfnforol	Môr Iwerddon	DAERA (Gogledd Iwerddon)	Ydy	Ydy	Ydy		Ydy	
Cynllun Rheoli Pysgodfeydd Pelagig Môr Iwerddon	2021-2023	Sgadan/Penwaig	Treillrwyd ganolddwr	Môr Iwerddon	DAERA (Gogledd Iwerddon)	Ydy	Ydy	Ydy		Ydy	
Cynllun Rheoli Pysgodfeydd Glannau Gogledd Iwerddon	2021-2024	Cranc coch, cranc llygatgoch, cimwch, cregyn y brenin a chregyn y frenhines	Potiau a chewyll, Llusgrwyd	Y Glannau ym Mharth Gogledd Iwerddon	DAERA (Gogledd Iwerddon)	Na					Yn nyfroedd y Weinyddiaeth yn unig
Cynllun Rheoli Pysgodfeydd Dyfnforol y Môr Celtaidd a Gorllewin y Sianel	2021-2025	<i>Cythraulaid y môr, penfras, hadog, lleden Fair, cimwch Norwy, lleden chwythig, gwyniad môr</i>  Cythraul y môr, lleden goch, morgath ddreiniog, lleden chwythig, honos glas, siarcod y dyfnfor, chwitlyn glas, morgath lygaid-bach, grenadwr trwyngwrn, merfog coch, morgathod, morgath gribog, morgath felen, morgath gron, morgath fannog, morgath lygadog, lleden fair bedwar smotyn, morlas	Treillrwyd ddyfnforol, rhwydi drifft a sefydlog, rhwydi sân dyfnforol	Y Môr Celtaidd a Gorllewin Sianel Lloegr	Defra (Lloegr)	Ydy		Ydy		Ydy	
Cynllun Rheoli Pysgodfeydd Pelagig y Môr Celtaidd a Gorllewin y Sianel	2021-2025	Sgadan/penwaig, pennog Mair, pysgodyn arian mawr, marchfacrell, brwyniad	Treillrwyd ganolddwr, rhwydi drifft a sefydlog	Y Môr Celtaidd a Gorllewin Sianel Lloegr	Defra (Lloegr)	Ydy		Ydy		Ydy	

Teitl yr FMP	Amserlen cyhoeddi	Math o stoc	Y prif fath o bysgota <sup>13</sup>	Ardal Bysgota	Awdurdod Arwain	Ar y cyd?	Awdurdod sy'n gyfrifol am gynllun ar y cyd				Rheswm nad yw ar y cyd?
							DAERA	Defra	Marine Scotland	Llyw. Cymru	
Cynllun Rheoli Pysgodfeydd De Môr y Gogledd a Dwyrain y Sianel	2021-2024	<i>Lleden goch, lleden chwythig, torbwt, lleden wrachwitsch</i>  Lleden fannog, lleden lefn, lleden chwythig, lleden dywod, lleden fwd, lleden Ffrengig	Treillrwyd ddyfnforol, rhwydi sân dyfnforol	De Môr y Gogledd a Dwyrain Sianel Lloegr	Defra (Lloegr)	Na					Yn nyfroedd y Weinyddiaeth yn unig
Cynllun Rheoli Pysgodfeydd Marchfecryll Môr y Gogledd	2021-2024	Marchfacrell	Treillrwyd ganolddwr	Môr y Gogledd	Defra (Lloegr)	Na					Rhan o'r budd yn fasnachol
Cynllun Rheoli Pysgodfeydd Corbenwaig Môr y Gogledd a'r Sianel	2021-2024	Corbennog	Treillrwyd ganolddwr	Môr y Gogledd a Sianel Lloegr	Defra (Lloegr)	Na					Rhan o'r budd yn fasnachol
Cynllun Rheoli Pysgodfeydd Merfog Du	2021-2025	Merfog Du	Treillrwyd ddyfnforol	Dyfroedd Lloegr	Defra (Lloegr)	Na					Yn nyfroedd y Weinyddiaeth yn unig
Cynllun Rheoli Pysgodfeydd rhywogaethau Gwrachod	2021-2025	Gwrachen Fair, cleiriach y gwymon, grŵp rhywogaethau'r gwrachod, gwrachen eurban, gwrachen y graig	Treillrwyd ddyfnforol, rhwydi drifft a sefydlog	Dyfroedd Lloegr	Defra (Lloegr)	Na					Yn nyfroedd y Weinyddiaeth yn unig
Cynllun Rheoli Pysgodfeydd Dyfnforol Heb Gwota De Môr y Gogledd	2022-2024	Chwyrnwr coch, ysgyfarnog fôr (tub gurnards), ystifflog, môrlawes, octopws, pysgodyn darn arian, mingrwn coch, morgi lleiaf, chwyrnwr llwyd	Treillrwydi dyfnforol, rhwydi sân dyfnforol	De Môr y Gogledd	Defra (Lloegr)	Na					Yn nyfroedd y Weinyddiaeth yn unig
Cynllun Rheoli Pysgodfeydd Dyfnforol Heb Gwota'r Sianel	2021-2023	Chwyrnwr coch, ysgyfarnog fôr (tub gurnards), ystifflog, môrlawes, octopws, pysgodyn darn arian, mingrwn coch, morgi lleiaf, chwyrnwr llwyd	Treillrwydi dyfnforol, rhwydi sân dyfnforol	Sianel Lloegr	Defra (Lloegr)	Na					Yn nyfroedd y Weinyddiaeth yn unig

Teitl yr FMP	Amserlen cyhoeddi	Math o stoc	Y prif fath o bysgota <sup>13</sup>	Ardal Bysgota	Awdurdod Arwain	Ar y cyd?	Awdurdod sy'n gyfrifol am gynllun ar y cyd				Rheswm nad yw ar y cyd?
							DAERA	Defra	Marine Scotland	Llyw. Cymru	
Cynllun Rheoli Pysgodfeydd Morgathod De Môr y Gogledd a'r Sianel	2021-2024	Morgath ddreiniog, morgath felen, morgath donnog, morgathod, morgath lygaid-bach, morgath fannog, morgath lygadog, morgath bigog	Treillrwyd ddyfnforol	De Môr y Gogledd a Sianel Lloegr	Defra (Lloegr)	Na					Yn nyfroedd y Weinyddiaeth yn unig



## Atodiad B: Geirfa

**Adleoli** – Y newidiadau mewn ymddygiad a phatrymau pysgota a allai ddigwydd mewn ymateb i fesurau rheoli newydd.

**Ansawdd dŵr** – Ffordd o fesur cyflwr dŵr ac a yw'n addas i gynnal amrywiaeth o fathau o ddefnydd er budd organeddau byw a phobl.

**Ar y môr** – Rhwng 12 a 200 milltir forol o linellau sylfaen môr tiriogaethol y DU.

**Arallgyfeirio** – Mae arallgyfeirio ym maes pysgodfeydd yn ffordd o helpu i ymaddasu i newid ac mae'n un ffordd i'r diwydiant pysgota fod yn fwy cynaliadwy, i ymateb yn well wrth i farchnadoedd newid, ac i fod yn fwy abl i wrthsefyll y newid yn yr hinsawdd. Mae arallgyfeirio'n cynnwys newidiadau o fewn y sector pysgota, er enghraifft, technegau ac offer pysgota newydd sy'n newid pa rywogaethau sy'n cael eu targedu a sut maen nhw'n cael eu targedu, neu newidiadau yn y gadwyn brosesu a'r gadwyn gwerth pysgod, er enghraifft, gwerthu'n uniongyrchol neu farchnata sy'n ychwanegu gwerth at gynhyrchion pysgod. Mae arallgyfeirio hefyd yn golygu bod y diwydiant yn ymgymryd â sawl math o weithgaredd; er enghraifft, yn ogystal â chreu incwm drwy bysgota, gall gweithgareddau ategol fel twristiaeth olygu bod cychod yn arallgyfeirio i sectorau eraill, os yw hynny'n briodol.

**Ardaloedd Morol Gwarchodedig (MPAau)** – Ardaloedd o'r môr sy'n cael eu gwarchod gan y gyfraith at ddibenion cadwraeth natur.

**Arloesi** – Creu dull, syniad neu gynnyrch newydd.

**Awdurdodau pysgodfeydd cenedlaethol** – Fel y'u diffinnir gan adran 25(4) o Ddeddf Pysgodfeydd 2020: (a) yr Ysgrifennydd Gwladol, (b) y Sefydliad Rheoli Morol, (c) Gweinidogion yr Alban, (d) Gweinidogion Cymru, ac (e) adran Gogledd Iwerddon. Mae'r term awdurdodau pysgodfeydd cenedlaethol yn wahanol i'r term awdurdodau polisïau pysgodfeydd oherwydd ei fod yn cynnwys y Sefydliad Rheoli Morol.

**Awdurdodau Pysgodfeydd y Glannau a Chadwraeth (IFCAau)** – Ardaloedd Awdurdodau Pysgodfeydd y Glannau a Chadwraeth sy'n gyfrifol am reoli gweithgareddau pysgota yn nyfroedd arfordirol Lloegr hyd at 6 milltir forol o linellau sylfaen y môr tiriogaethol. Mae gan y 10 ardal 'weledigaeth' gyffredin; sef arwain, hyrwyddo a rheoli amgylchedd morol cynaliadwy a physgodfeydd y glannau.

**Awdurdodau Polisi Pysgodfeydd** – Fel y'u diffinnir gan adran 52 o Ddeddf Pysgodfeydd 2020, yr awdurdodau polisi pysgodfeydd yw (a) yr Ysgrifennydd Gwladol, (b) Gweinidogion yr Alban, (c) Gweinidogion Cymru, a (d) adran Gogledd Iwerddon.

**Bioamrywiaeth** – Amrywiaeth yr holl fywyd ar y ddaear, gan gynnwys yr amrywiaeth o fewn a rhwng yr holl rywogaethau planhigion ac anifeiliaid, ac amrywiaeth ecosystemau.

**Carbon Glas** – Carbon sy'n cael ei ddal gan gefnforoedd ac ecosystemau arfordirol y byd. Cynefinoedd carbon glas yw'r cynefinoedd lle mae'n cael ei storio.

**Y Confensiwn ar Warchod Amgylchedd Morol Rhan Ogledd-ddwyreiniol yr Iwerydd (OSPAR)** – Cytundeb rhyngwladol er mwyn cydweithredu i ddiogelu amgylchedd morol Gogledd-ddwyrain yr Iwerydd. Caiff gwaith o dan y Confensiwn ei reoli gan Gomisiwn OSPAR, sy'n cynnwys cynrychiolwyr Llywodraethau 15 o'r Partïon i'r Contract a'r Comisiwn Ewropeaidd, sy'n cynrychioli'r Undeb Ewropeaidd. Mae gwaith i weithredu Confensiwn OSPAR yn cael ei wneud drwy fabwysiadu penderfyniadau, sy'n gyfreithiol rwymol ar y Partïon i'r Contract, a thrwy fabwysiadu argymhellion a chytundebau eraill.

**Confensiwn y Cenhedloedd Unedig ar Fioamrywiaeth (CBD)** – Term y Cenhedloedd Unedig ar gyfer yr offeryn cyfreithiol rhyngwladol i 'warchod amrywiaeth fiolegol'. Mae Targed 6 yn ymdrin â physgodfeydd cynaliadwy.

**Confensiwn y Cenhedloedd Unedig ar Gyfraith y Môr (UNCLOS)** – Cytundeb rhyngwladol amlochrog sy'n gosod cyfundrefn gynhwysfawr o gyfraith a threfn yng nghefnforoedd a moroedd y byd, gan sefydlu rheolau sy'n llywodraethu pob defnydd a wneir o'r cefnforoedd a'u hadnoddau. Fe'i llofnodwyd ym 1982 a daeth i rym ym 1994.

**Y Cyd-ddatganiad ar Bysgodfeydd (JFS)** – Dogfen sy'n amlinellu polisïau'r awdurdodau polisi pysgodfeydd ar gyfer cyflawni, neu gyfrannu at gyflawni, yr amcanion ar gyfer pysgodfeydd yn Neddf Pysgodfeydd 2020.

**Cydfodoli** – Lle mae llawer o ddatblygiadau, gweithgareddau neu fathau o ddefnydd yn digwydd ochr yn ochr â'i gilydd neu'n agos at ei gilydd yn yr un ardal neu ar yr un pryd.

**Cydnherthedd** – Gallu ecosystem, rhywogaeth, cynefin neu ddiwydiant i ymateb, adfer neu ymaddasu i newidiadau a/neu unrhyw aflonyddwch o fewn amserlen resymol heb golled neu ddifrod parhaol.

**Cyfalaf naturiol** – Yr elfennau o natur sy'n creu gwerth i bobl, er enghraifft, ecosystemau, rhywogaethau, dŵr croyw, tir, priddoedd, mwynau, ein hawyr a'n moroedd. Mae 'dull cyfalaf naturiol' yn un sy'n gwerthfawrogi'r manteision a gawn o'r amgylchedd naturiol, megis darparu bwyd, aer a dŵr glân, amddiffyn rhag llifogydd, a chyfleoedd i hamddena, gan gynnwys gwerthfawrogi bywyd gwylt, sy'n cefnogi iechyd a lles.

**Cyngor Rhyngwladol Archwilio'r Môr (ICES)** – Mae'n cydgysylltu ac yn hyrwyddo ymchwil forol ar eigioneg, yr amgylchedd morol, yr ecosystem forol, ac ar adnoddau morol byw yng Ngogledd yr Iwerydd.

**Cynllun Rheoli Pysgodfeydd (FMP)** – Dogfen, a baratowyd ac a gyhoeddwyd o dan y Ddeddf Pysgodfeydd, sy'n amlinellu polisïau y bwriedir iddynt adfer un neu fwy o stociau pysgod môr i lefelau cynaliadwy, neu eu cynnal ar lefelau cynaliadwy.

**Cynlluniau amflwydd (MAPs)** – Cynlluniau o dan Bolisi Pysgodfeydd Cyffredin yr UE (sydd bellach, i ryw raddau, yn rhan o gyfraith y DU ar ffurf cyfraith yr UE a ddargedwir) ar gyfer stociau pysgod a physgodfeydd pwysig sy'n pennu nodau ar gyfer rheoli stoc pysgod dros gyfnod o flynyddoedd. Gallant hefyd gynnwys rheolau penodol eraill ar gadwraeth.

**Cynlluniau Gofodol Morol (MSP)** – Cynlluniau morol ar sail ardal yn unol â'r Datganiad Polisi Morol.

**Cynnyrch Cynaliadwy Mwyaf (MSY)** – Diffinnir yn Neddf Pysgodfeydd 2020 fel y cynnyrch cytbwys damcaniaethol uchaf y gellir, ar gyfartaledd, ei gymryd yn barhaus o stoc forol o dan yr amodau amgylcheddol presennol heb effeithio'n sylweddol ar y broses atgynhyrchu.

**Y Cytundeb Masnach a Chydweithredu (TCA)** – Y Cytundeb Masnach a Chydweithredu rhwng Teyrnas Unedig Prydain Fawr a Gogledd Iwerddon, ar y naill law, a'r Undeb Ewropeaidd a Chymuned Ynni Atomig Ewropeaidd ar y llaw arall. Mae'r cytundeb hwn yn rheoli'r berthynas rhwng y DU a'r UE. Fe'i llofnodwyd ym mis Rhagfyr 2020, fe'i cymhwyswyd o 1 Ionawr 2021 ymlaen ac fe'i cadarnhawyd (ar ffurf y diwygiwyd ychydig arni) ym mis Ebrill 2021.

**Dalfa Fwyaf a Ganiateir (TAC)** – Mae cyfanswm y ddalfa a ganiateir (TAC) yn derfyn a bennir ar gyfer pysgodfa neu stoc benodol, fel arfer am flwyddyn neu dymor pysgota. Fel rheol, mynegir TAC mewn tunelli o bwysau sy'n cyfateb i bwysau byw ond weithiau pennir nifer y pysgod.

**Datblygu Cynaliadwy** – Fel y'i diffinnir gan adroddiad Brundtland (1987), ystyr datblygu cynaliadwy yw datblygu sy'n diwallu anghenion y presennol heb beryglu gallu cenedlaethau'r dyfodol i ddiwallu eu hanghenion eu hunain.

**Datganiad Polisi Morol y DU (UKMPS)** – Fframwaith polisi'r DU ar gyfer paratoi cynlluniau morol a gwneud penderfyniadau sy'n effeithio ar yr amgylchedd morol yn y DU.

**Dyframaethu** – Fel y'i diffinnir gan Ddeddf Pysgodfeydd 2020: bridio, magu, tyfu neu feithrin (a) unrhyw bysgod neu anifail dyfrol arall, (b) gwymon neu unrhyw blanhigyn dyfrol arall, neu (c) unrhyw organedd dyfrol arall. Gellir dyframaethu yn amgylchedd morol y glannau ac allan ar y môr, a gellir ei grwpio'n fras yn ôl y math o ddŵr (dŵr y môr neu ddŵr croyw), math o rywogaethau (pysgod asgellog, pysgod cregyn neu blanhigion) a dwysedd (dwys, lled-ddwys neu lai dwys).

**Y Diwydiant Pysgota** – Y gweithgareddau economaidd sy'n gysylltiedig â dal pysgod am fwyd neu ym maes chwaraeon.

**Ecosystem** – Cymuned fiolegol sy'n cynnwys yr holl organeddau a'r amgylchedd ffisegol y maent yn rhyngweithio â nhw.

**Y Glannau** – 0-12 milltir forol o linellau sylfaen môr tiriogaethol y DU.

**Gwasanaethau Ecosystemau** – Y manteision y mae pobl yn eu cael oddi wrth ecosystemau. Mae gwasanaethau ecosystemau yn cael eu categoreiddio fel a ganlyn o dan Ddull Cenedlaethol y DU o Reoli ar Lefel yr Ecosystem: gwasanaethau rheoli, gwasanaethau darparu, gwasanaethau diwylliannol a gwasanaethau cynnal.

**Gweithgareddau dyframaethu** – Fel y'u diffinnir gan Ddeddf Pysgodfeydd 2020, mae'n golygu unrhyw un o'r canlynol (p'un a ydynt yn gysylltiedig â busnes neu gyflogaeth ai peidio): (a) dyframaethu; (b) cynaeafu organeddau dyframaethu; (c) gweithredu llongau er mwyn cynaeafu neu brosesu organeddau dyframaethu; (d) storio neu gludo organeddau dyframaethu; (e) llwytho a dadlwytho organeddau dyframaethu; (f) prosesu organeddau dyframaethu.

**Gweoedd bwyd** – Y rhyng-gysylltiad naturiol rhwng cadwyni bwyd a chynrychiolaeth graffigol o beth sy'n bwyta beth mewn cymuned ecolegol.

**Memorandwm Cyd-ddealltwriaeth ar y Fframwaith ar gyfer Rheoli a Chefnogi**

**Pysgodfeydd (MoU ar y Fframwaith Pysgodfeydd neu FFMoU)** – Cytundeb rhwng pedair gweinyddiaeth y DU sy'n nodi'r egwyddorion y bydd y pedwar awdurdod polisi pysgodfeydd yn cydweithio yn unol â nhw wrth reoli pysgodfeydd. Mae'n cynnwys strwythurau llywodraethu a ffyrdd o weithio. Mae'n rhan o Fframwaith Rheoli a Chefnogi Pysgodfeydd y DU (y Fframwaith Pysgodfeydd).

**Monitro Electronig o Bell (REM)** – Systemau integredig ar fwrdd y cwch a all gynnwys camerâu, synwryddion offer, cyfarpar storio fideos, ac unedau System Leoli Fyd-eang, sy'n creu fideos cynhwysfawr ac sy'n cael eu defnyddio i fonitro gweithgareddau pysgota gan ddefnyddio gwybodaeth gysylltiedig a gesglir gan synwryddion a gwybodaeth am leoliad.

**Môr tiriogaethol** – Y dyfroedd sydd o dan awdurdodaeth gwladwriaeth, a ddiffinnir gan UNCLOS fel hyd at 12 milltir forol o'r llinell sylfaen neu'r llinell distyll ar hyd yr arfordir.

**Newid yn yr hinsawdd** – Mae'n cyfeirio at newid yn yr hinsawdd a achosir gan bobl ac allyriadau nwyon tŷ gwyr. Mae'n cynnwys cynhesu byd-eang, cefnforoedd yn cynhesu, mwy o berygl llifogydd, sychder a thywydd poeth.

**Nod Datblygu Cynaliadwy** – 17 o nodau gan y Cenhedloedd Unedig 'i drawsnewid ein byd' ac i hyrwyddo ffyniant, gan ddiogelu'r blaned ar yr un pryd. Nod 14 yw gwarchod a defnyddio'r cefnforoedd, y moroedd ac adnoddau morol mewn ffordd gynaliadwy fel y bo modd datblygu'n gynaliadwy.

**Parth Economaidd Neilltuedig (EEZ)** – Parth economaidd unigryw mewn parth yn y môr y darperir ar ei gyfer gan UNCLOS, sy'n ymestyn hyd at 200 milltir forol o linellau sylfaen môr tiriogaethol Gwladwriaeth arfordirol, ac y mae gan y Wladwriaeth honno hawliau arbennig drostynt o ran manteisio ar adnoddau naturiol a'u rheoli, gan gynnwys pysgodfeydd.

**Prosesu** – Mewn perthynas â physgod neu unrhyw organeddau dyfrol arall, mae'n cynnwys cadw neu baratoi'r organeddau, neu gynhyrchu unrhyw sylweddau neu eitemau ohonynt gan ddefnyddio unrhyw ddull, er mwyn iddynt gael eu bwyta gan bobl neu anifeiliaid.

**Protocol Gogledd Iwerddon** – Cytundeb rhwng y DU a'r Undeb Ewropeaidd (UE) sy'n nodi'r trefniadau ar gyfer mynd i'r afael â'r amgylchiadau unigryw ar ynys Iwerddon, a gyflwynwyd yn sgil ymadawiad y DU â'r UE.

**Pwyllgor Arbenigol ar Bysgodfeydd (SCF)** – Fforwm ar y cyd rhwng y DU a'r UE ar gyfer trafod materion pysgodfeydd o dan y Cytundeb Masnach a Chydweithredu.

**Pysgod** – Pysgod asgellog a physgod cregyn morol ac aberol, gan gynnwys rhywogaethau mudol fel llyswennod ac eogiaid.

**Pysgod cregyn** – Fel y'u diffinnir yn adran 52 o Ddeddf Pysgodfeydd (2020), molysgiaid a chramenogion o unrhyw fath a geir yn y môr a dŵr mewndirol.

**Pysgodfeydd** – Dal organeddau morol gwyllt (pysgod a physgod cregyn); gall pysgota masnachol ddefnyddio amrywiaeth o offer symudol a sefydlog, cychod a lleoliadau.

**Pysgota cynaliadwy** – Yn y Cyd-ddatganiad ar Bysgodfeydd, mae pysgota cynaliadwy yn golygu cadw'r ddysgl yn wastad rhwng ystyriaethau amgylcheddol, economaidd a chymdeithasol wrth reoli'n pysgodfeydd er budd cenedlaethau'r presennol a'r dyfodol. Mae'n golygu sicrhau bod modd pysgota stociau pysgod, yn fasnachol ac yn hamddenol, yn awr ac yn y dyfodol. Wrth wneud hynny, bydd yr awdurdodau polisi pysgodfeydd yn ystyried yn ofalus effeithiau tymor byr a hirdymor eu penderfyniadau ar stociau pysgod a'r diwydiant pysgota cyn gweithredu; ni ddylai penderfyniadau economaidd-gymdeithasol tymor byr beryglu iechyd hirdymor yr amgylchedd morol mewn ffordd arwyddocaol. Bydd angen i'r penderfyniadau hynny gydnabod pwysigrwydd diwyllianol pysgota drwy gynnal a, phan fo hynny'n bosibl, gryfhau cymunedau arfordirol a bywoliaeth pobl. Bydd angen hefyd fodloni'r gofyniad i sicrhau bod stociau pysgod yn cyrraedd lefelau cynaliadwy a bod y lefelau hynny'n cael eu cynnal.

**Pysgota hamdden ar y môr** – Term ymbarél sy'n cwmpasu amrywiaeth o weithgareddau hamdden, gan gynnwys pysgota hamdden ar y môr gan ddefnyddio gwialenni neu rwydi, a chychod siarter.

**Pysgotwr** – Person sy'n dal pysgod er mwyn gwneud bywoliaeth neu at ddibenion hamdden.

**Rheoli ar sail ecosystem** – Diffinnir yn Neddf Pysgodfeydd 2020 fel gweithredu mewn ffordd sydd (a) yn sicrhau bod yr holl bwysau a achosir gan weithgareddau pobl yn cael ei gadw o fewn lefelau sy'n gydnaws â sicrhau statws amgylcheddol da (yn unol â'r ystyr sydd iddo yn Rheoliadau'r Strategaeth Forol 2010 (O.S. 2010/1627)), a (b) nad yw'n peryglu gallu ecosystemau morol i ymateb i newidiadau a achosir gan bobl.

**Rheoli pysgodfeydd yn rhagofalus** – Dull rheoli lle nad yw'r ffaith nad oes digon o wybodaeth wyddonol ar gael yn gyfiawnhad dros ohirio neu beidio â chymryd camau rheoli i warchod rhywogaethau targed, rhywogaethau cysylltiedig neu ddibynnol, rhywogaethau nad ydynt yn rhai targed, neu eu hamgylchedd.

**Rhywogaethau prae** – Rhywogaethau bach sy'n bwyta plancton, a geir ar lefelau troffig canolradd mewn cadwyni bwyd morol, sy'n brae i bysgod ysglyfaethus mwy o faint. Fe'i gelwir hefyd yn bysgod prae neu'n bysgod abwyd.

**Sbwriel môr** – Unrhyw ddeunydd solet sydd wedi'i daflu'n fwriadol neu ei golli'n anfwriadol ar draethau, ar lannau neu ar y môr. Mae'r diffiniad yn cynnwys deunyddiau sy'n cael eu cludo o'r tir i'r amgylchedd morol gan afonydd, systemau draenio neu systemau carthion neu wyntoedd. Mae'n cynnwys unrhyw ddeunydd solet parhaus sydd wedi'i weithgynhyrchu neu ei brosesu (OSPAR).

**Y sector bwyd môr** – Unigolion neu fusnesau sy'n ymgymryd ag unrhyw un o'r gweithgareddau a ganlyn: (a) dal pysgod; (b) gweithredu cychod ar gyfer dal neu brosesu pysgod; (c) ymgymryd â gweithgareddau dyframaethu (d) cludo pysgod neu gynhyrchion pysgod; (e) llwytho a dadlwytho pysgod neu gynhyrchion pysgod; (f) prosesu pysgod.

**Y Sefydliad Rheoli Morol (MMO)** – Corff cyhoeddus anadrannol gweithredol yn y Deyrnas Unedig a sefydlwyd o dan Ddeddf y Môr a Mynediad i'r Arfordir 2009, sy'n gyfrifol am gynllunio a thrwyddedu gweithgareddau yn nyfroedd Lloegr rhwng 0-200 milltir forol, heblaw

gweithgareddau pysgodfeydd o fewn 0-6 milltir forol. Yr IFCA's sy'n gyfrifol amdanyn nhw. Mae gan y Sefydliad rai cyfrifoldebau ar lefel y DU hefyd.

**Sefydliad Rheoli Pysgodfeydd Rhanbarthol (RFMO)** – Corff neu gytundeb rhyngwladol amlochrog a sefydlwyd i reoli a gwarchod stociau pysgod mewn rhanbarth penodol.

**Sgil-ddalfa** – Diffinir gan adran 52 o Ddeddf Pysgodfeydd (2020) fel (a) pysgod sy'n cael eu dal wrth bysgota am bysgod o ddisgrifiad gwahanol, neu (b) anifeiliaid heblaw pysgod sy'n cael eu dal wrth bysgota.

**Statws Amgylcheddol Da (GES)** – Disgrifiad ansoddol o gyflwr y moroedd y mae'n ofynnol, yn unol â Rheoliadau'r Strategaeth Forol 2010, i awdurdodau ei gyrraedd neu ei gynnal erbyn y flwyddyn 2020. Mae cyrraedd statws amgylcheddol da yn ymwneud â diogelu'r amgylchedd morol, ei atal rhag dirywio a'i adfer pan fo hynny'n ymarferol, gan ganiatáu defnydd cynaliadwy o adnoddau morol ar yr un pryd.

**Stociau heb gwota** – Rhywogaethau nad ydynt yn cael eu rheoli drwy gyfanswm dalfeydd a ganiateir (terfynau cwota). Maent yn cynnwys rhai pysgod asgellog, y rhan fwyaf o rywogaethau pysgod cregyn masnachol, ac amryfal rywogaethau eraill.

**Tiriogaethau Dibynnol y Goron** – Awdurdodaethau hunanlywodraethol y Goron; Guernsey, Jersey ac Ynys Manaw.

**Tiriogaethau Tramor y DU** – Fe'u gelwir hefyd yn Diriogaethau Tramor Prydain. Mae 14 o diriogaethau sydd â chysylltiad cyfansoddiadol a hanesyddol â'r DU. Er nad ydynt yn rhan o'r DU, Brenhines Prydain yw pennaeth y wladwriaeth.

Yr Undeb Ewropeaidd (UE) – Undeb o 27 o aelod-wladwriaethau sydd wedi'u lleoli'n bennaf yn Ewrop.

## ATODIAD 2: Ffurflen Ymateb yr Ymgynghoriad ar y JFS

Enw:

**C1. Hoffech chi i ni gadw'ch ymateb yn gyfrinachol?**

Hoffwn

Na hoffwn

Os mai'ch ateb i'r cwestiwn hwn oedd 'Hoffwn', rhowch eich rheswm.

**C2: I ba raddau rydych chi'n gweithio neu y mae gennych fudd ynddi? Eglurwch eich ateb, gan gyfeirio at gynnwys penodol yn y JFS pryd bynnag y bo modd.**

**C3: Beth yw'ch barn am y cynigion ar gyfer datblygu Cynlluniau Rheoli Pysgodfeydd?**

**C4: A oes unrhyw agweddau eraill ar bolisi pysgodfeydd y credwch y dylem eu cynnwys yn y JFS?**

Ein bwriad oedd llunio cwestiynau ymgynghori bras a fyddai gobeithio'n rhoi cyfle ichi fynegi barn ystyrlon am y JFS drafft. Os oes gennych ragor o sylwadau, nodwch nhw yma:

# ATODIAD 3: Aseiad Effaith Naratif ar gyfer y JFS

<b>Teitl:</b> Aseiad Effaith Naratif ar gyfer y Cyd-ddatganiad ar Bysgodfeydd <b>Rhif Aseiad Effaith:</b> Ddim yn berthnasol <b>Rhif Cyfeirnod y Pwyllgor Polisi Rheoleiddiol (RPC: Ddim yn berthnasol)</b> <b>Adran neu asiantaeth arweiniol:</b> Aseiad effaith ar y cyd: Adran yr Amgylchedd, Bwyd a Materion Gwledig, Llywodraeth Cymru, Llywodraeth yr Alban a'r Adran Amaethyddiaeth, yr Amgylchedd a Materion Gwledig (Gogledd Iwerddon).	<b>(Aseiad Effaith)</b>			
	Dyddiad: Ionawr 2022			
	<b>Cam:</b> Ddim yn berthnasol			
	<b>Ffynhonnell y ymyriad:</b> Domestig			
	<b>Math o fesur:</b> Ddim yn berthnasol			
<b>Cyswllt ar gyfer ymholiadau:</b> Samantha King				
<b>Barn yr RPC:</b> Statws Barn yr RPC				

## Crynodeb: Yr Ymyriad a'r Opsiynau

Cost yr Opsiwn a Ffeirir (neu'r opsiwn mwyaf tebygol) (ym mhrisiau 2020/2021)			
Cyfanswm y Gwerth Cymdeithasol Net Presennol £ miliwn	Gwerth Net Presennol Busnes £ miliwn	Cost net i fusnes bob blwyddyn £ miliwn	Statws Targed yr Effaith ar Fusnes Darpariaeth gymwys

### Pa broblem sy'n cael ei hystyried? Pam mae angen i'r Llywodraeth weithredu neu ymyrryd?

Mae Deddf Pysgodfeydd 2020 (y Ddeddf) yn ei gwneud yn ofynnol i awdurdodau polisi pysgodfeydd y DU lunio a chyhoeddi Cyd-ddatganiad ar Bysgodfeydd (JFS) o fewn 24 mis iddi gael Cydsyniad Brenhinol. Mae'r Ddeddf yn amlinellu'r amcanion ar gyfer pysgodfeydd, sy'n pennu'r cyfeiriad strategol ar gyfer rheoli pysgodfeydd ledled y DU yn y dyfodol. Gyda'i gilydd, mae'r amcanion hyn yn nodi'r egwyddorion craidd y dylid eu dilyn er mwyn rheoli pysgodfeydd mewn modd llwyddiannus a chynaliadwy. Mae'r JFS yn amlinellu ein polisiâu ar gyfer cyflawni neu gyfrannu at gyflawni'r amcanion hyn. Felly, bydd yn chwarae rhan bwysig wrth arwain y gwaith o lunio polisiâu a gwneud penderfyniadau yn y dyfodol ar lefel y DU ac o fewn pob awdurdod polisi pysgodfeydd unigol.

### Beth yw amcanion polisi'r camau gweithredu neu'r ymyrryd a'r effeithiau arfaethedig?

Mae'r JFS yn ceisio sicrhau bod pysgodfeydd yn y DU yn cael eu rheoli mewn modd llwyddiannus a chynaliadwy. Wrth gydbwysu'r broses o roi'r amcanion ar gyfer pysgodfeydd ar waith, bydd y JFS yn bodloni gofynion y Ddeddf ac yn cefnogi diwydiant pysgota bywiog, proffidiol a chynaliadwy, sy'n seiliedig ar amgylchedd morol iach. Ei nod yw diogelu a (lle bo angen) adfer ein stociau pysgod, lleihau effeithiau pysgota ar yr amgylchedd, a chefnogi diwydiant pysgota modern, cadarn ac amgylcheddol gyfrifol a fydd yn ceisio lliniaru'r effaith mae'n ei chael ar yr hinsawdd ac yn ymaddasu lle bo modd. Bydd yr awdurdodau polisi pysgodfeydd yn paratoi ac yn cyhoeddi adroddiad, bob tair blynedd, ar y graddau y mae'r polisiâu yn y JFS wedi cyflawni, neu wedi cyfrannu at gyflawni'r amcanion ar gyfer pysgodfeydd. Bydd y JFS yn cael ei adolygu o fewn chwe blynedd iddo gael ei gyhoeddi.

### Pa opsiynau polisi sydd wedi cael eu hystyried, gan gynnwys unrhyw opsiynau yn lle rheoleiddio? Rhowch gyfiawnhad dros yr opsiwn a ffeirir (mae rhagor o fanylion yn y Sail Dystiolaeth)

- Opsiwn 1: Gwneud dim (achos sylfaenol). Mae awdurdodau polisi pysgodfeydd unigol yn parhau i reoleiddio pysgodfeydd yn annibynnol ac yn methu bodloni gofyniad y Ddeddf i gynhyrchu JFS.
- Opsiwn 2: Cynhyrchu a chyhoeddi JFS, gan amlinellu'r polisiâu ar gyfer cyflawni, neu gyfrannu at gyflawni'r amcanion ar gyfer pysgodfeydd. (yr opsiwn a ffeirir)

### A fydd y polisi'n cael ei adolygu? Bydd yn cael ei adolygu. Os yw hynny'n berthnasol, nodwch y dyddiad ar gyfer adolygu: -/2028

A yw'r mesur hwn yn debygol o effeithio ar fasnach a buddsoddiadau rhyngwladol?		Nac ydy		
A oes unrhyw rhai o'r sefydliadau hyn o fewn y cwmpas?	<b>Micro</b> Oes	<b>Bach</b> Oes	<b>Canolig</b> Oes	<b>Mawr</b> Oes
Beth yw'r newid cyfwerth â CO <sub>2</sub> mewn allyriadau nwyon tŷ gwydr? (miliwn tunnell cyfwerth â CO <sub>2</sub> )	<b>Wedi'i fasnachu:</b> Ddim yn perthnasol		<b>Heb ei fasnachu:</b> Ddim yn berthnasol	



***Rwyf wedi darllen yr Asesiad Effaith ac rwy'n fodlon, o ystyried y dystiolaeth sydd ar gael, ei fod yn ddisgrifiad rhesymol o gostau, manteision ac effaith debygol y prif opsiynau.***

1. Llofnod yr unigolyn cyfrifol: .....
2. Dyddiad: .....

## Disgrifiad:

### Asesiad Effaith Naratif

Blwyddyn Sylfaen Prisiau: Ddim yn berthnasol	Blwyddyn Sylfaen Gwerth Presennol 2020	Cyfnod Amser Blynnyddoedd	Manteision Net (Gwerth Presennol (£ miliynau))		
			Isel: Dewisol	Uchel: Dewisol	Amcangyfrif Gorau:
<b>COSTAU (£ miliwn)</b>	<b>Cyfanswm y Costau Pontio</b>		<b>Cyfartaledd Blynnyddol (heb Gostau Pontio) (Pris Cyson)</b>		<b>Cyfanswm y Costau (Gwerth Presennol)</b>
<b>Isel</b>	Heb ei Feintoli		Heb ei Feintoli		<b>Heb ei Feintoli</b>
<b>Uchel:</b>	Heb ei Feintoli		Heb ei Feintoli		<b>Heb ei Feintoli</b>
<b>Amcangyfrif Gorau</b>	Heb ei Feintoli		Heb ei Feintoli		<b>Heb ei Feintoli</b>
<p><b>Maint y prif gostau ariannol i'r 'prif grwpiau yr effeithir arnynt' a disgrifiad o'r costau hynny</b></p> <p>Mae'r JFS drafft wedi cael ei ddatblygu gan DEFRA a'r Gweinyddiaethau datganoledig. Mae'n cynnwys polisiâu strategol presennol a newydd, ac ymrwymadau i ddatblygu polisiâu yn y dyfodol sy'n ystyried yr amcanion ar gyfer pysgodfeydd. Rhagwelir, o ystyried natur strategol y JFS drafft, na fydd yn cael unrhyw effaith ar fusnes ar hyn o bryd. Ar ôl i'r JFS gael ei gyhoeddi, lle mae angen rhagor o fesurau manwl i fodloni'r amcanion ar gyfer pysgodfeydd a amlinellir yn y Ddeddf, bydd asesiadau effaith llawn o'r mesurau hyn yn cael eu cynhyrchu gan yr awdurdod polisi pysgodfeydd perthnasol.</p>					
<p><b>Costau allweddol eraill nad ydynt yn ariannol i'r 'prif grwpiau yr effeithir arnynt'</b></p> <p>Os bydd is-ddeddfwriaeth yn y dyfodol, mae'n bosibl y gallai fod costau ymgyfarwyddo i'r busnes, a chostau amser sy'n gysylltiedig â gofynion ychwanegol sy'n deillio o unrhyw reoliadau newydd. Efallai y bydd costau ychwanegol i'r Llywodraeth sy'n gysylltiedig â gweithgareddau monitro a gorfodi sy'n gysylltiedig ag unrhyw reoliadau newydd.</p>					
<b>MANTEISION (£ miliwn)</b>	<b>Cyfanswm y Costau Pontio</b>		<b>Cyfartaledd Blynnyddol (heb Gostau Pontio) (Pris Cyson)</b>		<b>Cyfanswm y Manteision (Gwerth Presennol)</b>
<b>Canolig</b>	Heb ei Feintoli		Heb ei Feintoli		<b>Heb ei Feintoli</b>
<b>Uchel:</b>	Heb ei Feintoli		Heb ei Feintoli		<b>Heb ei Feintoli</b>
<b>Amcangyfrif Gorau</b>	Heb ei Feintoli		Heb ei Feintoli		<b>Heb ei Feintoli</b>
<p><b>Maint y manteision ariannol ar gyfer y 'prif grwpiau yr effeithir arnynt' a disgrifiad o'r manteision hynny</b></p> <p>Fel gyda chostau, nid oes unrhyw fanteision uniongyrchol yn gysylltiedig â'r polisiâu lefel uchel yn y JFS drafft. Mae sawl polisi yn y JFS sy'n debygol o greu manteision i fusnesau a'r amgylchedd morol a'r amgylchedd dyfrol ehangach yn ystod y cam gweithredu, ond dim ond drwy asesiadau effaith llawn y pryd hynny y bydd modd amcangyfrif y rhain, ochr yn ochr ag unrhyw is-ddeddfwriaeth a wneir gan yr awdurdod polisi pysgodfeydd perthnasol.</p>					
<p><b>Manteision allweddol eraill nad ydynt yn cael ariannol ar gyfer y 'prif grwpiau yr effeithir arnynt'</b></p> <p>Disgwylir y byddai manteision i fusnesau, gan mai nod nifer o'r polisiâu yn y JFS fydd cynnal ac adfer stociau pysgod i lefelau cynaliadwy a gwella'r amgylchedd morol a'r amgylchedd dyfrol. Dylai'r rhain sicrhau manteision ar draws cadwyn gyflenwi gyfan pysgodfeydd a'r gymdeithas ehangach.</p>					
<b>Rhagdybiaethau/materion sensitif/risgiau allweddol</b>				<b>Cyfradd y disgownt</b>	3.5
Ddim yn berthnasol. Nid yw'r ddogfen hon yn darparu dadansoddiad meintiol o effeithiau'r JFS.					

### ASESIAD BUSNES (Opsiw 1)

Effaith uniongyrchol ar fusnes (Cyfartaledd Blynnyddol) £ miliwn:			Sgôr ar gyfer y Targed Effaith Busnes (darpariaethau cymwys yn unig) £ miliwn:
Costau:	Manteision:	Net:	
			Ddim Yn Berthnasol

# Adran 1: Cyflwyniad

## Y Cyd-ddatganiad ar Bysgodfeydd: Pwrpas a Chefnidir

Mae'r Cyd-ddatganiad ar Bysgodfeydd (JFS) yn rhan o Fframwaith ehangach y DU ar gyfer Rheoli a Chefnogi Pysgodfeydd (y Fframwaith Pysgodfeydd). Mae rheoli pysgodfeydd yn y DU wedi cael ei ddatganoli i raddau helaeth, ac mae'r Fframwaith yn nodi meysydd lle bydd dull ar y cyd o reoli pysgodfeydd ledled y DU yn cael ei ddilyn, yn ogystal â'r ddeddfwriaeth, y polisïau a'r egwyddorion cydweithio a ddefnyddir ledled y DU i'w gyflawni. Mae'r Fframwaith yn cynnwys Deddf Pysgodfeydd 2020 (y Ddeddf) a'r offerynnau statudol cysylltiedig, cyfraith yr UE a ddargedwir, y JFS, Cynlluniau Rheoli Pysgodfeydd a'r Memorandwm Cyd-ddealltwriaeth ar y Fframwaith ar gyfer Rheoli a Chefnogi Pysgodfeydd (y Memorandwm Cyd-ddealltwriaeth ar Fframwaith Pysgodfeydd neu'r FFMoU).

Mae'r Ddeddf yn amlinellu'r amcanion ar gyfer pysgodfeydd, sy'n pennu'r cyfeiriad strategol ar gyfer rheoli pysgodfeydd ledled y DU yn y dyfodol. Mae'r Ddeddf hefyd yn darparu y dylai'r awdurdodau polisi pysgodfeydd baratoi JFS sy'n cynnwys y polisïau ar gyfer cyflawni neu gyfrannu at gyflawni'r amcanion hyn, ac sy'n cynnwys datganiad ar y ffordd mae'r awdurdodau'n bwriadu defnyddio Cynlluniau Rheoli Pysgodfeydd er mwyn cyflawni neu gyfrannu at gyflawni'r amcanion. Ategir hyn gan elfennau eraill o'r Fframwaith wrth sefydlu fframwaith polisi i sicrhau bod pysgodfeydd yn y DU yn cael eu rheoli mewn modd llwyddiannus a chynaliadwy.

O ystyried y ffaith bod y gwaith o reoli pysgodfeydd yn y DU wedi cael ei ddatganoli i raddau helaeth, bydd y polisïau a'r ymrwymadau yn y JFS yn cael eu datblygu a'u gweithredu gan yr awdurdod polisi pysgodfeydd perthnasol, ac eithrio pan fydd hyn yn ymwneud â chymhwysedd a gedwir yn ôl, ac os felly Llywodraeth y DU fydd yn gyfrifol.

## Y dull o gynnal Asesiadau Effaith ar gyfer y JFS

Wrth gynhyrchu Asesiad Effaith ar gyfer y JFS rydym wedi cael ein harwain gan bolisïau perthnasol pob un o'r awdurdodau polisi pysgodfeydd (Gweler Adran 3 am fanylion dull gweithredu pob awdurdod polisi pysgodfeydd).

Mae'r JFS yn cynnwys cyfuniad o bolisïau strategol presennol a newydd, yn ogystal ag ymrwymadau i ddatblygu polisïau yn y dyfodol. Gan fod y JFS yn strategol, nid yw'r polisïau yn y JFS yn arwain at effeithiau mesuradwy uniongyrchol ar yr adeg hon.

Gan fod y gwaith o reoli pysgodfeydd wedi cael ei ddatganoli i raddau helaeth, bydd yr awdurdodau pysgodfeydd cenedlaethol yn gweithredu polisïau'r JFS yn unol â'r setliad datganoledig. Gall hyn gynnwys awdurdodau yn gweithio gydag awdurdodau pysgodfeydd cenedlaethol eraill fel yr ystyrir yn briodol. Penderfynir a fydd angen asesiadau effaith wrth ddatblygu'r polisïau yn ystod y cam hwn.

O ystyried hyn, bydd yr awdurdodau pysgodfeydd cenedlaethol yn datblygu asesiad o effeithiau polisïau unigol, yn unol â phrosesau asesu unigol pob awdurdod pysgodfeydd cenedlaethol, wrth i'r polisïau gael eu datblygu ymhellach. Mae'r Asesiad Effaith naratif

hwn yn disgrifio'r effeithiau a ragwelir o ganlyniad i'r polisïau o fewn y JFS drafft, ac yn disgrifio pryd y bydd effeithiau gweithredu polisïau'n cael eu nodi a'u hasesu.

Mae'r dogfen wedi cael ei strwythuro fel a ganlyn:

**Mae Adran 2** yn nodi'r effeithiau a ragwelir a'r cynlluniau ar gyfer Asesiadau Effaith.

**Mae Adran 3** yn amlinellu arferion a phrosesau asesu gofynnol yr awdurdodau pysgodfeydd cenedlaethol;

**Mae Adran 4** yn disgrifio'r mecanweithiau llywodraethu a gwerthuso allweddol ar gyfer adolygu'r JFS.

## **Adran 2: Polisïau lle y rhagwelir effeithiau ar bob Awdurdod Polisi Pysgodfeydd**

Mae'r adran hon yn trafod y polisïau a'r ymrwymadau yn y JFS, yn crynhoi'r prif effeithiau a ragwelir a'r grwpiau yr effeithir arnynt ar gyfer pob awdurdod polisi pysgodfeydd a, lle y bo hynny'n berthnasol, yn nodi cynlluniau ar gyfer Asesiadau Effaith.

### **Polisïau a'r effeithiau cysylltiedig**

Mae Adran **4.2.1 Cyfleoedd Pysgota** yn amlinellu sut mae cyfleoedd pysgota yn cael eu pennu, eu dosrannu a'u dosbarthu, a sut bydd yr amcanion ar gyfer pysgodfeydd yn cael eu hystyried yn ystod pob cam. Mae hyn yn cynnwys ymrwymadau i ddarparu tryloywder ynghylch y dulliau dan sylw drwy sicrhau eu bod yn cael eu cynnwys mewn rheolau rheoli cwotâu sydd ar gael i'r cyhoedd. Disgwylir y bydd hyn yn cyfrannu at ragor o dryloywder wrth ddosrannu a dosbarthu cwotâu ac yn galluogi rhanddeiliaid i gymryd rhan fwy yn y gwaith o ddatblygu polisïau. Pan fydd polisïau presennol yn parhau, ni fydd asesiad newydd o effeithiau. Fodd bynnag, os bydd yr awdurdod polisi pysgodfeydd perthnasol yn adolygu neu'n datblygu dulliau newydd o ddosbarthu cwotâu pysgota, bydd y cynnig yn cael ei brofi'n drylwyr, gan gynnwys drwy ymgynghori lle bo angen yn unol â gweithdrefnau'r awdurdod polisi pysgodfeydd unigol, i sicrhau eu bod yn cyflawni'r canlyniad polisi arfaethedig ac yn cydymffurfio â'r holl bolisïau trawsbynciol a dyletswyddau statudol, gan gynnwys gweithdrefnau ar gyfer asesu effeithiau. Bydd awdurdodau polisi pysgodfeydd hefyd yn profi unrhyw newidiadau arfaethedig i bolisïau yn erbyn gofynion y rheoliadau perthnasol fel sy'n briodol.

Mae Adran 4.2.1 hefyd yn cynnwys ymrwymiad i sicrhau bod stociau yn ein dyfroedd yn cael eu defnyddio mewn modd cynaliadwy, a'n bod yn cydweithredu â gwledydd arfordirol cyfagos er mwyn sicrhau bod stociau pysgod a rennir yn cael eu rheoli mewn modd cynaliadwy. Bydd dull y DU o drafod â'n partneriaid rhyngwladol yn cael ei lywio gan yr amcanion ar gyfer pysgodfeydd wrth inni geisio pysgota mewn modd cynaliadwy, a rhwymedigaethau rhyngwladol fel gofynion Confensiwn y Cenhedloedd Unedig ar Gyfraith y Môr (UNCLOS), er mwyn sicrhau'r canlyniadau gorau ar gyfer ffilyd y DU. Bydd effaith y polisïau hyn yn cael ei monitro a'i hasesu'n barhaus, a bydd yn cael ei hadlewyrchu yn ein trafodaethau dwyochrog ac amlochrog.

Mae Adran **4.2.2 stociau heb gwota** yn amlinellu cynlluniau i flaenoriaethu'r gwaith o ddatblygu dulliau rheoli ar gyfer stociau heb gwota. Mae effaith darparu fframweithiau ar gyfer rhywogaethau neu ardaloedd daearyddol drwy'r dulliau hyn yn ansicr ar hyn o bryd, ond bydd yn cael ei hadolygu. Lle bo hynny'n briodol, bydd yr awdurdodau pysgodfeydd

cenedlaethol yn cydweithredu ar broses asesu effaith ar gyfer y DU gyfan ond, o ystyried natur unigryw stociau lleol a'r mesurau rheoli mae debygol y bydd eu hangen, mae'n bosibl y bydd cynlluniau i ddatblygu dulliau rheoli ar gyfer y tymor hwy yn cael eu datblygu gan awdurdodau pysgodfeydd cenedlaethol. Bydd yr holl gynigion yn cael eu profi'n drylwyr, gan gynnwys drwy ymgynghori lle bo angen yn unol â gweithdrefnau'r awdurdod polisi pysgodfeydd unigol, i sicrhau eu bod yn cyflawni'r canlyniad polisi arfaethedig ac yn cydymffurfio â'r holl bolisiau trawsbynciol a dyletswyddau statudol, gan gynnwys gweithdrefnau asesu effaith. Bydd awdurdodau pysgodfeydd cenedlaethol hefyd yn profi unrhyw newidiadau arfaethedig i bolisiau yn erbyn gofynion y rheoliadau perthnasol fel sy'n briodol.

Mae Adran 4.2.3 **Ymgysylltu Rhyngwladol Ehangach** yn ymrwmo'r DU i gymryd rhan weithredol mewn fforymau rhyngwladol i hyrwyddo safonau uchel ar gyfer rheoli pysgodfeydd gyda phartneriaid byd-eang, a rhannu'r arferion gorau ar gyfer rheoleiddio gweithgareddau pysgota yn effeithiol ar y môr mawr, yn unol â'r amcanion ar gyfer pysgodfeydd. Gallai hyn arwain at hyrwyddo'r defnydd cynaliadwy o stociau, diogelu stociau, a hwyluso cydweithredu rhyngwladol i fynd i'r afael â newid yn yr hinsawdd. Nid ydym yn cynnig paratoi unrhyw asesiadau o'r effaith mewn perthynas â'r polisi hwn ar hyn o bryd.

Mae Adran 4.2.4 **Capasiti Pysgota** yn ailddatgan ein hymrwymiad i gydbwysedd priodol wrth gynnal hyfywedd economaidd ac iechyd stoc, fel rhan o gyflawni'r amcan cynaliadwyedd. Rhagwelir y bydd hyn yn parhau i gael effaith gadarnhaol o ran sicrhau bod lefelau pysgota'n parhau i fod yn gynaliadwy. Mae'r polisi o beidio â dyrannu cyllid cyhoeddus ar gyfer cychod pysgota newydd, lle mae hyn yn cynyddu capasiti pysgota y tu hwnt i lefelau cynaliadwy, eisoes wedi'i sefydlu. Felly, yn absenoldeb polisi newydd yn y maes hwn, nid ydym yn cynnig paratoi unrhyw asesiadau o'r effaith mewn perthynas â pharhau â'r polisi presennol hwn.

Mae Adran 4.2.5 **Hawl i bysgota yn nyfroedd y DU** yn egluro ymhellach ein hymrwymiad i'r 'amcan mynediad cyfartal'. O ystyried bod hyn yn codio a pharhau â'r arfer presennol, ac na chynigir unrhyw bolisiau newydd, nid ydym yn bwriadu paratoi unrhyw asesiadau o'r effaith

Yn adran 4.2.6 **Pysgota Anghyfreithlon, heb ei Gofnodi a heb ei Reoleiddio**, mae'r JFS drafft yn cynnwys ymrwymadau i'r awdurdodau polisi pysgodfeydd fynd i'r afael â physgota anghyfreithlon, heb ei gofnodi a heb ei reoleiddio. Disgwylir i ymdrechion i fynd i'r afael â physgota o'r fath fynd i'r afael â'i effeithiau negyddol ar yr amgylchedd morol ac ar fioamrywiaeth. Yn ogystal, bydd parhau i atal cynhyrchion a ddelir drwy bysgota anghyfreithlon, heb ei gofnodi a heb ei reoleiddio rhag cael eu mewnfurio'n parhau i fod o fudd cadarnhaol i ddiwydiant pysgota'r DU, gan y bydd yn atal pysgod a ddelir yn y ffordd hon rhag cyrraedd marchnadoedd domestig a marchnadoedd byd-eang. Fel rhan o'r ymrwymadau hyn, bydd strategaeth ar gyfer y DU ar bysgota anghyfreithlon, heb ei gofnodi a heb ei reoleiddio hefyd yn cael ei chynhyrchu, a bydd effeithiau unrhyw bolisiau newydd yn y strategaeth yn cael eu hasesu wrth iddi gael ei datblygu. Bydd pob cynnig yn cael ei brofi'n drylwyr, gan gynnwys drwy ymgynghori lle bo angen yn unol â gweithdrefnau'r awdurdod polisi pysgodfeydd unigol, i sicrhau ei fod yn cyflawni'r canlyniad polisi arfaethedig ac yn cydymffurfio â'r holl bolisiau trawsbynciol a dyletswyddau statudol, gan gynnwys gweithdrefnau asesu effaith. Bydd awdurdodau polisi pysgodfeydd hefyd yn profi unrhyw newid arfaethedig i bolisiau yn erbyn gofynion y rheoliadau perthnasol fel sy'n briodol.

Mae Adran **4.2.7 Lleihau Sgил-ddalfeydd ac Osgoi a Dal Rhywogaethau Sensitif** yn rhwymo awdurdodau polisi pysgodfeydd i weithio gyda rhanddeiliaid i leihau dalfeydd diangen a gwaredu pysgod yn wastraffus. Mae'r awdurdodau polisi pysgodfeydd eisoes wedi ymrwymo i leihau sgил-ddalfeydd, o ystyried yr effaith gadarnhaol y bydd y gostyngiad hwn yn ei chael ar yr ecosystem forol ac ar iechyd stociau. Ar yr adeg hon, bydd y Rhwymedigaeth Glanio yn parhau i fod yn gymwys ym mhob awdurdod polisi pysgodfeydd i ddiogelu iechyd stociau pysgod a rhoi sicrwydd i'r diwydiant. O ganlyniad i parhau â'r polisi hwn, nid oes unrhyw effaith uniongyrchol newydd ar fusnes. Fodd bynnag, bydd unrhyw bolisi yn y dyfodol yn cael ei asesu fel y bo'n briodol. Bydd yr holl gynigion newydd yn cael eu profi'n drylwyr, gan gynnwys drwy ymgynghori lle bo angen yn unol â gweithdrefnau'r awdurdod polisi pysgodfeydd unigol, i sicrhau eu bod yn cyflawni'r canlyniad polisi arfaethedig ac yn cydymffurfio â'r holl bolisiau trawsbynciol a dyletswyddau statudol, gan gynnwys gweithdrefnau asesu effaith. Bydd awdurdodau polisi pysgodfeydd hefyd yn profi unrhyw newidiadau arfaethedig i bolisi yn erbyn gofynion y rheoliadau perthnasol fel sy'n briodol.

Mae Adran **4.2.8 Dadleoli** yn cyflwyno ymrwymiad polisi parhaus i weithio gyda defnyddwyr y môr i nodi a mynd i'r afael â phroblemau dadleoli sy'n deillio o fesurau rheoli a defnyddiau gofodol eraill, gan gynnwys ffermydd gwynt ar y môr. Gall canlyniadau mesurau a gyflwynir yn absenoldeb tystiolaeth, neu gamau nad ydynt o reidrwydd yn targedu'r broblem, arwain at ragor o darfu ar ymddygiad pysgota, a all gael effeithiau canlyniadol ar yr amgylchedd morol, pysgotwyr ac ar sectorau morol eraill. Mae'r polisi hwn yn ceisio osgoi neu liniaru effeithiau negyddol ar bob defnyddiwr y môr yr effeithir arno gan ddadleoli, wrth sicrhau hefyd nad yw cynaliadwyedd amgylcheddol yn cael ei beryglu. Bydd effeithiau'r polisi'n cael eu monitro drwy ymgysylltu â defnyddwyr y môr sy'n gweithio ar broblemau dadleoli ac yn mynd i'r afael â nhw. Bydd yr holl gynigion newydd yn cael eu profi'n drylwyr, gan gynnwys drwy ymgynghori lle bo angen yn unol â gweithdrefnau'r awdurdod polisi pysgodfeydd unigol, i sicrhau eu bod yn cyflawni'r canlyniad polisi arfaethedig ac yn cydymffurfio â'r holl bolisiau trawsbynciol a dyletswyddau statudol, gan gynnwys gweithdrefnau asesu effaith. Bydd awdurdodau polisi pysgodfeydd hefyd yn profi unrhyw newidiadau arfaethedig i bolisiau yn erbyn gofynion y rheoliadau perthnasol fel sy'n briodol.

Mae Adran **4.2.9 Cynllunio Gofodol Morol** yn amlinellu sut mae Datganiad Polisi Morol y DU (UKMPS), ynghyd â'r cynlluniau morol, yn darparu fframwaith ar gyfer gwneud penderfyniadau. Mae hyn yn caniatáu i weithgareddau yn yr ardal forol gael eu rheoli mewn ffordd sy'n diogelu'r amgylchedd morol, wrth gefnogi datblygu cynaliadwy. Bydd hyn yn cael effaith gadarnhaol ar yr amgylchedd morol ac ar ecosystemau morol. Mae'r UKMPS a'r cynlluniau morol wedi bod yn destun prosesau asesu presennol, a bydd asesiadau'n cael eu diweddarau fel sy'n briodol yn dilyn adolygiad. Mae Arfarniad Cynaliadwyedd ac Asesiad Rheoliadau Cynefinoedd yn cael eu paratoi ar gyfer pob cynllun morol yn ystod y broses ddrafftio, ac mae'r fersiynau terfynol o'r rhain yn cael eu cwblhau ar yr un pryd â'r cynlluniau morol. Mae adolygiad ffurfiol o effaith ac effeithiolrwydd pob cynllun morol a fabwysiadwyd yn cael ei gynnal bob tair blynedd o'r dyddiad y cafodd ei fabwysiadu, gyda phenderfyniad yn cael ei wneud (yn seiliedig ar ganfyddiadau'r adolygiad hwnnw) ynghylch a ddylid diwygio neu ddisodli'r cynllun morol hwnnw.

Yn adran **4.2.10 Ardaloedd Morol Gwarchodedig** mae'r awdurdodau polisi pysgodfeydd yn ymrwymo i barhau i ddatblygu'r rhwydwaith o safleoedd gwarchodedig yn y môr, i ddiogelu cynefinoedd a rhywogaethau penodol sydd o bwysigrwydd cenedlaethol neu ryngwladol. Yn y safleoedd hyn, bydd pysgota'n cael ei reoli, a bydd swyddogaethau'n

cael eu harfer, er mwyn galluogi Ardaloedd Morol Gwarchodedig i gyflawni eu hamcanion cadwraeth. Mae pob awdurdod polisi pysgodfeydd yn gyfrifol am ddynodi Ardaloedd Morol Gwarchodedig o fewn eu gwahanol ddyfroedd. Mae asesiad o'r effaith economaidd-gymdeithasol yn rhan o'r broses ddynodi, sy'n ystyried yr effaith y gallai dynodi'r safle ei chael ar bob defnyddiwr. Byddai cynnig i ddynodi ardal hefyd yn cael ei ystyried i sicrhau ei fod yn cydymffurfio â pholisïau trawsbynciol a dyletswyddau statudol pob awdurdod polisi pysgodfeydd, gan gynnwys gweithdrefnau asesu effaith. Bydd awdurdodau polisi pysgodfeydd hefyd yn profi unrhyw newid arfaethedig i bolisïau yn erbyn gofynion y rheoliadau perthnasol fel sy'n briodol. Yn dilyn dynodi safle, bydd asesiadau effaith yn cael eu hystyried ymhellach wrth gyflwyno mesurau rheoli statudol. Bydd y rhain yn cael eu datblygu gan yr awdurdod pysgodfeydd cenedlaethol perthnasol, yn hytrach nag ar lefel y DU.

Mae Adran **4.2.11 Sbwriel Môr** yn amlinellu ymrwymiad yr awdurdodau polisi pysgodfeydd i weithio gyda diwydiant i leihau ei effaith amgylcheddol a chefnogi mentrau eraill i leihau sbwriel môr. Er bod gwaith i leihau sbwriel môr eisoes yn cael ei gynnal, gallai polisïau eraill sy'n cael eu hystyried i gyflawni'r ymrwymiad hwn gael effaith economaidd ar fusnes. Gallai effeithiau o'r fath gynnwys costau gweithredu, materol ac ymgyfarwyddo. Fodd bynnag, bydd yr effeithiau'n dibynnu ar natur y polisïau pellach a ddatblygir. Serch hynny, rhagwelir y bydd gweithredu polisïau i gyflawni'r ymrwymiad hwn yn cael effaith fuddiol ar yr amgylchedd – er enghraifft, drwy wella'r ffordd mae offer pysgota yn cael ei reoli ar ddiwedd ei oes. Gallai hyn gynnwys rhoi cymhellion ar gyfer casglu ac ailgylchu offer ar ddiwedd ei oes a gwella arferion rheoli gwastraff. Bydd yr holl gynigion newydd yn cael eu profi'n drylwyr, gan gynnwys drwy ymgynghori lle bo angen yn unol â gweithdrefnau'r awdurdod polisi pysgodfeydd unigol, i sicrhau eu bod yn cyflawni'r canlyniad polisi arfaethedig ac yn cydymffurfio â'r holl bolisïau trawsbynciol a dyletswyddau statudol, gan gynnwys gweithdrefnau asesu effaith. Bydd awdurdodau polisi pysgodfeydd hefyd yn profi unrhyw newidiadau arfaethedig i bolisïau yn erbyn gofynion y rheoliadau perthnasol, fel sy'n briodol.

Mae Adran **4.2.12 Dyfroedd Arfordirol a Dyfroedd Croyw** yn amlinellu natur hanfodol cynefinoedd ac afonydd arfordirol iach i amgylchedd morol iach a physgodfeydd ffyniannus. Bydd gweithredu'r JFS yn llwyddiannus yn cefnogi Strategaeth Forol y DU (UKMS) i sicrhau Statws Amgylcheddol Da ym moroedd y DU, drwy sicrhau bod y stociau pysgod sy'n cael eu cynaeafu yn aros o dan y Cynnyrch Cynaliadwy Mwyaf (MSY); bod stociau pysgod a gweithgareddau pysgodfeydd yn cael eu rheoli i sicrhau bod unrhyw effeithiau negyddol ar ecosystemau morol yn cael eu lleihau a, lle bo modd, yn cael eu gwrthdroi (gan gynnwys difrod i wely'r môr, pwysau niweidiol ar rywogaethau sy'n agored i niwed a sbwriel môr); a bod dalfeydd o rywogaethau pysgod na fwriedir eu dal yn cael eu hosgoi neu eu lleihau. Bydd yn cefnogi ymhellach weithgareddau dan gonfensiwn OSPAR i sicrhau Statws Amgylcheddol Da yng Ngogledd-ddwyrain yr Iwerydd, drwy leihau effaith niweidiol gweithgareddau pysgota a dyframaethu ar yr hinsawdd a chefnogi'r broses o ymaddasu i newid yn yr hinsawdd o fewn y sector pysgota a'r sector dyframaethu. Bydd cyflwr stociau pysgod masnachol y DU a dangosyddion ar gyfer iechyd bioamrywiaeth a sbwriel môr yn cael eu monitro a'u hasesu fel rhan o'r cylch chwe blynedd ar gyfer diweddarau'r UKMS ac asesiadau OSPAR. Bydd yr holl gynigion newydd yn cael eu profi'n drylwyr, gan gynnwys drwy ymgynghori lle bo angen yn unol â gweithdrefnau'r awdurdod polisi pysgodfeydd unigol, i sicrhau eu bod yn cyflawni'r canlyniad polisi arfaethedig ac yn cydymffurfio â'r holl bolisïau trawsbynciol a dyletswyddau statudol, gan gynnwys gweithdrefnau asesu effaith. Bydd awdurdodau polisi pysgodfeydd hefyd yn profi unrhyw newid arfaethedig i bolisïau yn erbyn gofynion y rheoliadau perthnasol fel sy'n briodol.

Mae Adran **4.2.13 Newid Hinsawdd** yn cynnwys ymrwymiad i nodi newidiadau ymarferol i dechnolegol, ymddygiad a rheoli er mwyn lliniaru a lleihau allyriadau ar draws cadwyn gyflenwi pysgodfeydd, er mwyn symud tuag at ddyfodol allyriadau carbon sero-net. Wrth i effeithiau niweidiol gweithgareddau pysgota a dyframaethu ar yr hinsawdd gael eu lleihau, mae'n bosibl yr effeithir ar amryw sectorau o fewn cadwyn cyflenwi pysgodfeydd. Gall symud tuag at ddatgarboneiddio'r fflyd bysgota a diogelu ardaloedd dal a storio carbon effeithio ar y rhannau hynny o'r gadwyn gyflenwi sy'n arbennig o ddwys o ran carbon neu sy'n dibynnu ar ardaloedd penodol o ddyfroedd y DU. Fodd bynnag, gall canlyniadau polisiâu ddarparu manteision amgylcheddol a chymdeithasol, gan gydnabod y bydd lliniaru prosesau carbon-ddwys yng nghadwyn gyflenwi'r sector bwyd môr hefyd yn cynnwys lleihau crafu ar wely'r môr, a fydd yn arwain at ragor o garbon yn cael ei storio. Bydd yr holl bolisiâu newydd yn cael eu profi'n drylwyr, gan gynnwys drwy ymgynghori lle bo angen yn unol â gweithdrefnau'r awdurdod polisi pysgodfeydd unigol, i sicrhau eu bod yn cyflawni'r canlyniad polisi arfaethedig ac yn cydymffurfio â'r holl bolisiâu trawsbynciol a dyletswyddau statudol, gan gynnwys gweithdrefnau asesu effaith. Bydd awdurdodau polisi pysgodfeydd hefyd yn profi unrhyw newidiadau arfaethedig i bolisiâu yn erbyn gofynion y rheoliadau perthnasol fel sy'n briodol.

Mae Adran **4.2.14 Dyframaethu** yn ailadrodd ymrwymiad pob awdurdod polisi pysgodfeydd i gefnogi twf cytbwys cynaliadwy, o dan arweiniad y diwydiant, ym mhob is-sector dyframaethu yn seiliedig ar y wyddoniaeth orau sydd ar gael. Mae hyn yn parhau â'r arferion presennol ac, o'r herwydd, mae'n ceisio sicrhau'r cydbwysedd cywir rhwng cefnogi gweithgareddau cymdeithasol ac economaidd a diogelu'r amgylchedd morol. Bydd unrhyw gynigion polisi newydd ar gyfer dyframaethu'n cael eu profi'n drylwyr, gan gynnwys drwy ymgynghori lle bo angen yn unol â gweithdrefnau'r awdurdod polisi pysgodfeydd unigol, i sicrhau eu bod yn cyflawni'r canlyniad polisi arfaethedig ac yn cydymffurfio â'r holl bolisiâu trawsbynciol a dyletswyddau statudol, gan gynnwys gweithdrefnau asesu effaith. Bydd awdurdodau polisi pysgodfeydd hefyd yn profi unrhyw newidiadau arfaethedig i bolisiâu yn erbyn gofynion y rheoliadau perthnasol fel sy'n briodol. At hynny, bydd datblygiad dyframaethu sy'n benodol i safle yn ddarostyngedig i systemau trwyddedu morol a chynllunio tir presennol, fel sy'n briodol, ac yn dibynnu ar natur y datblygu, bydd asesiadau'n yn cael eu cwblhau cyn awdurdodi unrhyw ffermydd arfaethedig.

Mae'r awdurdodau polisi pysgodfeydd eisoes wedi ymrwymo i sicrhau bod pysgota hamdden yn y môr yn gynaliadwy o safbwynt yr amgylchedd, y gymdeithas a'r economi fel yr amlinellir yn **4.2.15 Pysgota Hamdden yn y Môr**. O ystyried bod hyn yn parhau â pholisi presennol, nid oes angen asesiad arall o'r effaith.

Mae Adran **4.2.16 Cynhyrchu, Marchnata a Bwyta Bwyd Môr** yn ailddatgan ymrwymiad yr awdurdodau polisi pysgodfeydd i hwyluso sector bwyd môr a chymunedau arfordirol hyblyg a chynaliadwy. Gallai effeithiau'r ymrwymiad parhaus hwn ddeillio o fesurau gweithredu polisi fel systemau olrhain cadarn, mynediad i farchnadoedd a gweithgareddau pysgota cynaliadwy, a gallai'r mesurau hyn gael effeithiau cadarnhaol neu negyddol ar y sector neu ar y cyhoedd. Bydd unrhyw bolisiâu pellach yn cael eu datblygu gan yr awdurdodau pysgodfeydd cenedlaethol unigol, bydd eu heffaith yn cael ei hasesu yn unol â'u prosesau, a bydd pob cynnig newydd yn cael ei brofi'n drylwyr, gan gynnwys drwy ymgynghori lle bo angen yn unol â gweithdrefnau'r awdurdod polisi pysgodfeydd unigol, i sicrhau eu bod yn cyflawni'r canlyniad polisi arfaethedig ac yn cydymffurfio â'r holl bolisiâu trawsbynciol a dyletswyddau statudol, gan gynnwys gweithdrefnau asesu effaith. Bydd awdurdodau polisi pysgodfeydd hefyd yn profi unrhyw newidiadau arfaethedig i bolisiâu yn erbyn gofynion y rheoliadau perthnasol fel sy'n briodol.



Mae'r JFS drafft yn sefydlu polisiâu'r Cynllun Rheoli Pysgodfeydd (**5. Cynlluniau Rheoli Pysgodfeydd**) y bydd yr awdurdodau polisi pysgodfeydd yn eu dilyn. Mae'r JFS drafft yn gosod ymrwymiad i sicrhau cynaliadwyedd hirdymor ein stociau pysgod drwy Gynlluniau Rheoli Pysgodfeydd. Rhaid i gynlluniau nodi digon o dystiolaeth a manylion i ddangos sut mae'r dull rhagofalus wedi cael ei ddefnyddio ar gyfer pob stoc pysgod.

O ystyried natur y polisi, bydd Cynlluniau Rheoli Pysgodfeydd yn cael effaith gadarnhaol, gan wella'r gweithdrefnau presennol a chyfrannu at yr amcanion yn y Ddeddf ar gyfer pysgodfeydd drwy gynnig y cyfle i gynllunio dulliau pwrpasol, hyblyg a thryloyw. Gwneir hyn ar y lefel fwyaf priodol ar gyfer rheoli ymarferol a theilwra cynlluniau i rywogaethau, lleoliadau a gweithgareddau pysgota. Gall yr heriau gynnwys cael y cydbwysedd cywir wrth gynaeafu mewn modd cynaliadwy, gan ystyried manteision cymdeithasol, economaidd ac ecolegol ac amgylchiadau lleol neu ranbarthol penodol.

Fel rhan o'r gwaith o'u datblygu, bydd holl effeithiau Cynlluniau Rheoli Pysgodfeydd yn cael eu hasesu yn unol â gofynion yr awdurdod polisi pysgodfeydd unigol ar gyfer asesu effeithiau. Byddant yn cael eu profi'n drylwyr, gan gynnwys drwy ymgynghori, i sicrhau eu bod yn cyflawni'r canlyniad polisi arfaethedig ac yn cydymffurfio â'r holl bolisiau trawsbynciol a dyletswyddau statudol, gan gynnwys gweithdrefnau asesu effaith. Yn benodol, bydd awdurdodau polisi pysgodfeydd hefyd yn profi unrhyw newidiadau arfaethedig i bolisiau yn erbyn gofynion y rheoliadau perthnasol fel sy'n briodol.

### **Adran 3: Asesiadau Effaith gan yr Awdurdodau Pysgodfeydd Cenedlaethol**

Mae'r adran hon yn amlinellu arferion asesu a phrosesau gofynnol yr awdurdodau pysgodfeydd cenedlaethol. Wrth ddatblygu'r ymrwymadau yn y JFS, bydd pob awdurdod pysgodfeydd cenedlaethol yn asesu polisiâu newydd a'u effeithiau yn unol â'r gofynion unigol a amlinellir isod.

#### **Gogledd Iwerddon**

Mae Gweithrediaeth Gogledd Iwerddon wedi ymrwymo i ddatblygu polisiâu a fydd yn diwallu anghenion penodol ei dinasyddion ac yn gwneud gwahaniaeth cadarnhaol i'w bywydau.

Rhaid i adrannau Gogledd Iwerddon gydymffurfio â nifer o rwymedigaethau statudol wrth ddatblygu'r polisiâu hynny.

Mae Adran 75 o Ddeddf Gogledd Iwerddon 1998 yn ei gwneud yn ofynnol i awdurdodau cyhoeddus, wrth gyflawni eu swyddogaethau sy'n ymwneud â Gogledd Iwerddon, roi sylw dyledus i'r angen i hyrwyddo cyfle cyfartal rhwng:

- personau o wahanol gredoau, crefyddau, barn wleidyddol, grwpiau hil, grwpiau oedran;
- statws priodasol, neu gyfeiriadedd rhywiol;
- dynion a menywod yn gyffredinol;
- personau ag anabledd a phersonau heb anabledd;
- personau â dibynyddion (h.y. pobl â chyfrifoldebau gofalu) a phersonau heb ddibynyddion.

Heb amharu ar y rhwymedigaeth uchod, mae'n ofynnol hefyd i awdurdodau cyhoeddus, wrth gyflawni eu swyddogaethau sy'n ymwneud â Gogledd Iwerddon, roi sylw i ba mor ddymunol yw hyrwyddo cysylltiadau da rhwng pobl o wahanol greddoau, grefyddau, barn wleidyddol neu grwpiau hil.

Mae Deddf Gogledd Iwerddon hefyd yn ei gwneud yn ofynnol i awdurdodau cyhoeddus baratoi Cynlluniau Cydraddoldeb sy'n nodi sut y maent yn bwriadu cyflawni'r dyletswyddau hyn. Craidd yr holl Gynlluniau, o ran y ddyletswydd i roi sylw dyledus i hyrwyddo cyfle cyfartal ac mewn perthynas â hyrwyddo cysylltiadau, yw Asesiadau Effaith o Bolisiâu ar Gydraddoldeb. Fodd bynnag, nid oes angen Asesiad o'r Effaith ar Gydraddoldeb ar gyfer pob polisi. Nid oes angen Asesiad o'r Effaith ar Gydraddoldeb ar gyfer polisi os yw'r polisi wedi cael ei sgrinio yn hyn o berth yn gynnar yn y gwaith o'i ddatblygu.

Mae angen profi polisiâu hefyd mewn perthynas â Hawliau Dynol, ac mae gofynion yn cael eu cyflwyno naill ai gan Weithrediaeth Gogledd Iwerddon, neu o ganlyniad i rwymedigaethau Llywodraeth y DU neu rwymedigaethau rhyngwladol, ar gyfer asesiadau o'r effaith amgylcheddol, gwledig, rheoleiddio, cynaliadwyedd ac iechyd. Er enghraifft, mae Strategaeth Rheoleiddio Gwell Gogledd Iwerddon yn ei gwneud yn ofynnol i bob adran ystyried Asesiad Effaith Rheoleiddiol fel rhan o'u proses datblygu polisiâu.

Mae Deddf Anghenion Gwledig (Gogledd Iwerddon) 2016 yn gosod dyletswydd ar adrannau Gogledd Iwerddon i roi sylw dyledus i anghenion gwledig wrth ddatblygu, mabwysiadu, gweithredu neu ddiwygio polisiâu, strategaethau a chynlluniau. Mae hyn yn sicrhau bod adrannau'n rhoi sylw dyledus i anghenion cymdeithasol ac economaidd pobl mewn ardaloedd gwledig wrth ymgymryd â rhai gweithgareddau. Mae'n darparu mecanwaith ar gyfer sicrhau rhagor o dryloywder o ran sut mae adrannau'n ystyried anghenion gwledig wrth ymgymryd â'r gweithgareddau hynny.

Yn ogystal, byddai'r angen am Asesiad Rheoliadau Cynefinoedd ac Asesiad Amgylcheddol Strategol yn cael ei ystyried, lle bo hynny'n briodol, yn ystod y broses o ddatblygu polisiâu.

## **Yr Alban**

Mae Llywodraeth yr Alban wedi ymrwmo i ddatblygu polisiâu sy'n sicrhau canlyniadau mwy cyfartal a chynaliadwy i bobl yn yr Alban. O ystyried natur ddatganoledig polisiâu pysgodfeydd, mae Llywodraeth yr Alban wedi ymrwmo i adolygu'r angen am asesu effaith ar y lefel ddatganoledig yn unol â'r arferion presennol. Mae gan Lywodraeth yr Alban broses ar waith ar gyfer penderfynu a oes angen asesiadau effaith penodol, a byddant yn dilyn y broses hon pan fydd polisiâu'r JFS yn cael eu datblygu ymhellach a'u cyflwyno ar lefel ddatganoledig fel yr amlinellir uchod. Gall hyn gynnwys asesiad o'r effaith amgylcheddol, effaith busnes a rheoleiddiol, yr effaith ar gymunedau'r ynysoedd ac asesiadau o effeithiau eraill y byddai eu hangen yn ôl y math o bolisi sy'n cael ei gyflawni.

Mae gan Lywodraeth yr Alban ddull sefydledig ar gyfer asesu effaith:

Mae Deddf Asesu Amgylcheddol (Yr Alban) 2005 yn ei gwneud yn ofynnol i'r rhai sy'n paratoi cynlluniau a rhaglenni yn yr Alban gynnal Asesiad Amgylcheddol Strategol os ydynt yn debygol o gael effeithiau amgylcheddol sylweddol. Mae'n ofynnol i'r cynlluniau a'r rhaglenni hynny sy'n ymwneud â'r Alban yn unig, boed hynny yr Alban gyfan neu ran

ohoni, ystyried a fyddai Deddf 2005 yn berthnasol a chynnal Asesiad Amgylcheddol Strategol yn unol â'r gofynion a amlinellir yn y Ddeddf os oes angen gwneud hynny.

Mae Asesiad Effaith Busnes a Rheoleiddiol (BRIA) yn edrych ar gostau tebygol unrhyw ddeddfwriaeth sylfaenol neu is-ddeddfwriaeth arfaethedig. Maent hefyd yn ymdrin â rheoleiddio gwirfoddol, codau ymarfer, canllawiau, neu newidiadau i bolisïau a allai effeithio ar y sector cyhoeddus, y sector preifat neu'r trydydd sector. Mae'r BRIA yn amlinellu pam mae'r Llywodraeth yn bwriadu ymyrryd; opsiynau y mae'r Llywodraeth yn eu hystyried a'r opsiwn a ffeifrir; sut ac i ba raddau y gallai bolisïau newydd effeithio arnyn nhw, ar fusnesau ac ar gystadleurwydd yr Alban; ac amcangyfrifon o gostau a manteision y mesurau arfaethedig.

Bwriad Asesiad o'r Effaith ar Gymunedau'r Ynysoedd (ICIA) yw profi unrhyw bolisi, strategaeth neu wasanaeth newydd sy'n debygol o gael effaith ar gymuned yn yr ynysoedd sy'n wahanol iawn i'r effaith mae'n ei chael ar gymunedau eraill, gan gynnwys cymunedau eraill yn yr ynysoedd. Mae hon yn ddyletswydd gyfreithiol wrth ddatblygu bolisïau yn yr Alban o dan adran 8 o Ddeddf Ynysoedd (Yr Alban) 2018.

Fel Awdurdodau Polisi Pysgodfeydd eraill, mae Llywodraeth yr Alban wedi'i rhwymo o dan y Rheoliad Cyffredinol ar Ddiogelu Data y DU (UKGDPR) i gynnal asesiad o'r effaith ar ddiogelu data (DPIA) ar gyfer pob prosiect sy'n prosesu data personol y mae asesiad wedi dangos ei fod yn risg uchel. Fodd bynnag, polisi Llywodraeth yr Alban yw cwblhau DPIA ar gyfer pob prosiect sy'n ymwneud â data personol a phreifatrwydd gan yr ystyrir mai dyma'r arfer gorau.

Yn yr un modd ag awdurdodau polisi pysgodfeydd eraill, mae'n ofynnol i Lywodraeth yr Alban ystyried yr angen am Asesiad o'r Effaith ar Gydraddoldeb wrth lunio bolisïau yn yr Alban. Bwriedir i hwn nodi a gwarchod rhag risgiau posibl o wahaniaethu a helpu i ddatblygu bolisïau gwell.

Bydd y gofynion posibl ar gyfer asesiadau effaith eraill a gynhelir gan Lywodraeth yr Alban, fel Dyletswydd yr Alban Decach, asesu'r effaith ar hawliau a lles plant, hawliau dynol a diogelu deddfwriaeth at y dyfodol yn cael eu hasesu gan Lywodraeth yr Alban yn unol â'r arferion presennol.

## **Cymru**

Mae Llywodraeth Cymru wedi ymrwymo i ddatblygu bolisïau sy'n sicrhau canlyniadau mwy cyfartal a chynaliadwy i bobl yng Nghymru. Mae bron pob polisi pysgodfeydd wedi cael ei ddatganoli, ac mae Llywodraeth Cymru o'r farn bod rhan hanfodol o adeiladu achos cynhwysfawr a chytbwys dros bolisi yw arfarnu'r effeithiau mae'r polisi yn debygol o'u cael, yn gadarnhaol ac yn negyddol. Felly, cynhelir asesiadau effaith trylwyr wrth ddatblygu ein bolisïau, y bolisïau presennol a'r rhai y gallwn eu datblygu a'u gweithredu yn y dyfodol. Mae Deddf Llesiant Cenedlaethau'r Dyfodol (Cymru) 2015 yn darparu fframwaith ar gyfer ein dull o ymdrin ag asesiadau effaith o fewn y saith Nod Llesiant a'r Pum Ffordd o Weithio, gan sicrhau dull o lunio bolisïau integredig sy'n seiliedig ar synnwyr cyffredin.

Ym mhob maes polisi yn y JFS lle bydd dulliau datganoledig yn cael eu gweithredu yn y dyfodol, a bod angen datblygu bolisïau ymhellach, bydd yr asesiadau effaith angenrheidiol yn cael eu cynnal yn unol ag arferion safonol Llywodraeth Cymru. O'r cychwyn cyntaf, bydd Asesiad Effaith Integredig yn cael ei ddatblygu i'n helpu i gynnal asesiad cyflawn o effaith cam gweithredu arfaethedig, gyda'r nod o gynyddu lles economaidd, cymdeithasol,

diwylliannol ac amgylcheddol cymaint ag y bo modd, nid yn unig yn yr oes sydd ohoni, ond yn y tymor hir. Mae Deddf yr Amgylchedd (Cymru) 2016 hefyd yn nodi blaenoriaethau cenedlaethol y mae'n rhaid eu hystyried fel rhan o'r broses ar gyfer Asesiadau Effaith Integredig wrth lunio polisiau newydd.

Yn ogystal, bydd yr angen am Asesiad Rheoliadau Cynefinoedd ac Asesiad Amgylcheddol Strategol hefyd yn cael ei ystyried wrth ddatblygu polisiau.

Os bydd polisi newydd yn arwain at gyflwyno is-ddeddfwriaeth, byddwn yn sicrhau ei bod yn cydymffurfio â gofynion Cod Asesu Effaith Rheoleiddiol Gweinidogion Cymru ar gyfer Is-ddeddfwriaeth.

## Lloegr

Mae Llywodraeth y DU wedi ymrwmo i werthuso'r angen i asesu'r effaith a datblygu polisiau yn unol â'r gofynion a'r arferion gorau ar gyfer asesu. Bydd y prosesau asesu hyn yn cael eu dilyn wrth ddatblygu'r polisiau sy'n deillio o'r JFS, a bydd yr asesiadau a gynhelir yn dibynnu ar y polisi unigol sy'n cael ei gyflwyno.

Wrth lunio polisiau ac ystyried a oes angen Asesiad Effaith Rheoleiddiol, ystyrir Canllawiau'r Fframwaith Rheoleiddio Gwell a'r egwyddorion gwell ar gyfer rheoleiddio, sef tystiolaeth gadarn, tryloywder a chymesuredd. Pan ystyrir bod polisiau'n ddarpariaethau statudol, mae Asesiad Effaith Rheoleiddiol yn cael ei gynnal a'i gyflwyno i'r Pwyllgor Polisi Rheoleiddiol (RPC) er mwyn sicrhau proses graffu annibynnol cyn cyflwyno unrhyw is-ddeddfwriaeth ar gyfer pob mesur y mae'r gost net i fusnesau'n uwch na'r trothwy o £5 miliwn y flwyddyn. Cynhyrchir dadansoddiadau i gefnogi'r newidiadau hyn yn unol â methodoleg Llyfr Gwyrdd Trysorlys Ei Mawrhydi, ac mae'n cynnwys ystyried yr effaith ar fusnesau bach a micro.<sup>14</sup> Nid oes angen hyn ar gyfer mesurau sy'n is na'r trothwy ar gyfer costau uniongyrchol net i fusnesau o £5 miliwn y flwyddyn. Ar gyfer mesurau sy'n is na'r trothwy hwn bydd DEFRA yn cynhyrchu asesiadau rheoleiddiol o'r costau os yw hynny'n briodol.

Yn ogystal, byddai'r angen am Asesiad Rheoliadau Cynefinoedd ac Asesiad Amgylcheddol Strategol yn cael ei ystyried, lle bo hynny'n briodol, yn ystod y broses o ddatblygu polisiau.

Mae deddfwriaeth a gofynion rheoliadau eraill yn nodi rhai amgylchiadau lle mae'n rhaid cynnal asesiadau pellach. Er enghraifft, mae Adran 126 o Ddeddf y Môr a Mynediad i'r Arfordir (2009) yn gosod dyletswyddau penodol ar yr Sefydliad Rheoli Morol mewn perthynas â Pharthau Cadwraeth Morol a gwneud penderfyniadau ynghylch trwyddedau morol, a lle bo hynny'n briodol, cynhelir proses asesu Parth Cadwraeth Morol yn ystod y gweithdrefnau ar gyfer gwneud penderfyniadau ynghylch trwyddedau.

Yn ogystal, mae Deddf yr Amgylchedd 2021 yn amlinellu'r egwyddorion amgylcheddol o safbwynt y gyfraith, ac yn ei gwneud yn ofynnol cynhyrchu "datganiad polisi ar egwyddorion amgylcheddol" sy'n esbonio sut y dylai'r egwyddorion amgylcheddol gael eu

---

<sup>14</sup> Yn unol â chanllawiau'r RPC ar Asesiadau ar gyfer Busnesau Bach a Micro:

<https://www.gov.uk/government/publications/small-and-micro-business-assessment-samba-guidance>

dehongli a'u rhoi ar waith yn gymesur gan Weinidogion y Goron wrth lunio polisi. Disgwylir i'r ddyletswydd hon i roi sylw i'r egwyddorion amgylcheddol dod i rym yn 2023 o fewn blwyddyn gyntaf cyhoeddi'r JFS. Y pum egwyddor amgylcheddol yw'r egwyddorion integreiddio, atal, unioni, y llygrwr sy'n talu a rhagofal.

Mae dyletswydd cydraddoldeb y sector cyhoeddus yn ei gwneud yn ofynnol i awdurdodau cyhoeddus, wrth gyflawni eu swyddogaethau, roi sylw dyledus i'r angen i gyflawni'r amcanion a amlinellir o dan adran 149 o Ddeddf Cydraddoldeb 2010. Nid yw'r ddyletswydd cydraddoldeb gyffredinol yn nodi yn benodol sut y dylai awdurdodau cyhoeddus ddadansoddi effaith eu polisïau a'u harferion presennol a newydd ar gydraddoldeb, ond mae gwneud hynny'n rhan bwysig o gydymffurfio â'r ddyletswydd cydraddoldeb gyffredinol, a gwneir hyn fel sy'n briodol.

## **Adran 4: Llywodraethu a Gwerthuso**

Mae'r Ddeddf yn ei gwneud yn ofynnol i'r awdurdodau polisi pysgodfeydd adolygu'r JFS pryd bynnag y maent yn credu ei bod yn briodol gwneud hynny, ac o fewn chwe blynedd i'w gyhoeddi neu'r tro diwethaf iddo gael ei adolygu beth bynnag. I ddechrau, bydd yr awdurdodau polisi pysgodfeydd yn defnyddio ffynonellau data sy'n bodoli eisoes er mwyn monitro iechyd stociau pysgod gwyllt, a'r data economaidd-gymdeithasol cynhwysfawr a gesglir ar faint a chyfansoddiad fflyd y DU fel dangosyddion. Bydd awdurdodau polisi pysgodfeydd hefyd yn defnyddio dangosyddion a rhaglenni monitro perthnasol yr UKMS. Os bydd yr awdurdodau polisi pysgodfeydd, yn dilyn adolygiad, yn dod i'r casgliad bod angen newidiadau i'r JFS, rhaid iddynt baratoi a chyhoeddi JFS diwygiedig neu JFS newydd. Cynhelir adolygiad o'r Asesiad Effaith naratif hwn ar yr un pryd a chaiff ei ddiweddarau neu ei ddisodli yn unol â hynny.

Yn ogystal â'r cylch adolygu, mae'r Ddeddf yn ei gwneud yn ofynnol i bob awdurdod polisi pysgodfeydd, gan weithredu ar y cyd, baratoi a chyhoeddi adroddiad bob tair blynedd, ar y graddau y mae'r polisïau a amlinellir yn y JFS wedi cael eu gweithredu, ac wedi cyflawni neu wedi cyfrannu at gyflawni'r amcanion ar gyfer pysgodfeydd.